

濮川所聞記卷三

胡珠船先生

張文韓先生原本

楊蔭軒先生

人物

鄉達

宋濮 鳳字雲翔山東曲阜縣親賢鄉人與弟凰字雲隱俱仕宋

由貢入仕為著作郎兼羽林中衛護聖軍右騎尉駙馬都尉初

居廣德建炎三年己酉帝如杭州公悉以家產讓弟居之從仕

金

淮曉瀾

濮承鈞政衡

述

漢

鑽離宣

岳洙傳魯源



臨安後居語溪之梧桐鄉謂鳳棲梧桐事有適符攷即卜宅於此
唐濮雲山陰令至定州節度使孫萬石湘州刺史元孫超宋初官翰林學士九世孫原一作貞民字南巖仕徽宗朝為左僕射殉節生二子長鳳次凰一作龍

濮 梧字楚玉鳳長子仕河南中都路左衛指揮使后轉通事以子輝如貴封朝奉大夫

濮 桐改名士參字悅中家乘云原名知宗字楚珩鳳第二子國子監學錄歷官太尉工於詩與梅溪王十朋善王集中多和韻詩稱為提舉蓋其所歷官也其和牡丹十絕句有金枝玉葉之句故以為宋之懿戚云

濮 檉字楚珍鳳第三子仕温州司理

濮 棣字楚瑤鳳第四子以子輝國貴封儒林郎

濮 梓字文木鳳第五子官學正

濮 榛字楚玖鳳第六子由武學博士官至朝散郎知廣德軍

朱勝非字藏一蔡州人上舍登第陟歷州縣靖康初為東道副總管權應天府其外舅乃張邦昌之友使持檄至勝非械之以聞康王在濟首往詣言南京乃藝祖興王之地請幸之以圖大計遂定策命試中書舍人兼權直學士院時屬草創憑一敗鼓草改元制辭氣嚴正人咸服之疏言仁義者天下之大柄等語高宗嘉納之總制使錢蓋進職勝非封還錄黃建康二年除尚書

右丞言宰執蔭敘謬濫俄遷門下兼中書侍郎帝南幸爲控扼使三年拜尙書右僕射同中書門下平章事兼御營使苗傅劉正彥作亂保護之功居多復辟面請罷政事薦呂頤浩張浚自代授觀文殿大學士知洪州尋除江西安撫大使兼知江州頤浩力引復其相位會久雨累章自劾遂罷五年應詔言戰守四事起知湖州與秦檜有隙廢居八年卒諡忠靖著有秀水閒居錄三卷蓋居鄉時所作也

朱名佚

思明父也仕宋爲文林郎待科院官居濮鎮之幽湖西

濮輝如字光文梧長子紹熙四年癸丑陳亮榜進士任延平知府

濮輝然梧之次子官承坊誥諡

濮輝國字光遠棣子孝宗朝爲樞密使

濮法堯輝然之子華亭判官

濮贊堯梓之孫輝光之子光宗朝仕承仕郎

濮萬鏐字懷珍輝如之孫國學榜元任福州長樂令

濮奉鑑法堯之子官招討使選入安王府爲郡馬

濮遇鑑法堯子仕承事郎簽書信州軍節度判官

濮兼鑑字懷琛廣州僉判

朱智恩蔭國子生兼翰林院左右供奉元誥贈宣慰使總督萬

戶四府都漕運晉秩中衛大夫 以上濮鎮紀聞參家乘

濮遐涑字浪山萬鎰之子崇德縣學生理宗朝以同上舍出身特恩授通直郎太常寺博士

濮敏原名良材字奇槎遐涑之子嘉興縣學生由太學任安王府教授 以上家乘

濮斗南名一之 原名號拱辰檜五世孫也寧宗朝由進士任太僕

卿理宗朝擢吏部侍郎賜坊於宅之前曰濮院著有諸經說紀留忠齊夢爰徐販霖在衛校俱受知於俞教任禮俞善濮斗南俞以二人屬之徐魁南宮留亦中選時穆陵書后又克艱二語

以賜史嵩之謝表及記皆濮所為留刺得之不以語徐因以自

擬對策遂冠多士 周密癸辛雜識 謹按濮一之斗南載入 傳說彙纂引用姓氏 欽定詩經

濮上材斗南子嘉興府學生恩蔭國子監生承直郎樞密院主事家乘

濮世昌原名焰字公亮號碧峯寶慶二年丙戌賜禮部進士九百

人名與其中仕為承信郎 紀聞

濮承材官司令

濮並材斗南子恩蔭國子監生迪功郎候選縣丞 以上家乘

歸百九字朝鳳理宗朝為朝散郎 紀略

濮 煒字公耀號桐峯仕通直事郎國子監博士 紀聞參家乘

濮 振原名振垂字仲聲號麟石世昌子鑑之父也咸淳中舉鄉

進士仕為承節郎兩浙東路兵馬司副都監婺州駐劄好客廣

交多構宅第遂成聚落家有吉藹堂百客棲以館游客一時名

士爭往依焉遂有占籍為家者長子孫繁族姓焉嘗輯妝樓百

詠及范少伯扁舟集德祐中重建語兒亭并葺其橋 誌略參殘志

濮恩垂字叔沾煒之子仕龍神衛四廂指揮使 紀聞

歸謙吉度宗朝進士不仕 紀略

元朱 清為防海義民至元十一年參政董文炳遣招討使王世

強招之伯顏既平宋遣清載宋庫藏圖籍自崇明泛海入大都

授千戶時東南漕運維艱伯顏追憶前事謂海運可行於是請

於朝造平底船六十艘運糧從海道至京命羅璧及張瑄與清

共領之初清瑄熟於海道嘗引舟東行三日夜得沙門島又東

北見文登夷維諸山又北見燕山碣石私念南北海道徑直不

逢淺角識之及就撫遂倡海運自劉家港入海一歲之中往返

兩運漸多至二百餘萬石二十年征東行省阿塔海征日本命

清及瑄從行是年罷新開河專事海運以清為海道運糧萬戶

以海運有勞遙授宣慰使元貞元年增江西河南參政以清及

瑄為之後為江南僧石祖進告命御史臺鞠問坐罪并籍家拘其軍器海船等物武宗至大三年復用清子虎一作虛往治海漕以所籍宅一區田百頃給之

范重雯字松厦以文武全才應選為集賢殿供奉授承事郎出守漳州總管生平喜讀書騎射至元中張士誠寇湖州犯檣李時雯避地嘉興縣長水都率鄉兵禦寇保障閭閻里人德之至今圩滙圩府志作俞地方有范家橋白鶴橋皆其破賊遺址以上紀聞

濮鑑字明之一作明遠振子值宋元相代間無心仕進為善於鄉大德丁未浙西大水出米三千石賑飢微為富陽稅務官階將仕

郎擢淮安路屯田打捕同提舉至大二年乙酉捨居宅之左右為寺觀又於市中立四大牙行收貯土絹以待四方販賣萬壽山宋為神霄玉清萬壽宮今為本覺寺元大德中公建大悲閣雲閒堂捨田三百畝其餘如設義塾為井幹建津梁施榑櫝創永安祠諸善舉詳趙子昂所撰墓誌蓋積而能散者明初郡侯某從士庶之請立專祠於天寧寺曰漢風閣郡城天寧寺東北方舊有大閣明初有司所建祀提舉明之公神主於中扁為漢風閣擬與嚴將軍助高風並峙故名規制煥麗後為富僧慧燈所據棄投木主於穢地萬歷丁酉年公八代孫師韶讀書寺

中見而憤之抱之鳴府時張侯諱似良蜀人大為按劍親往勸
焉則傑閣已折為曲房几筵並徹牀榻交橫矣慧燈猶強辨謂
從無漢風閣名義師韶出郡志証之侯遂立董役夫毀去曲屏
以還其故見樑上有濟顛師題云火臨太白於寺有光五百年
後屬在子房侯大駭曰丁為火酉為金其太白也且我張氏而
名似良又與子房二字甚合計濟顛至丁酉約五百年殆此閣
重光之會乎後劉侯應珂重修舊志猶存漢風閣三字 李侯
秀邑志天寧寺洪武年間寺僧指南建徹見樓於寺之東北隅
一名漢風閣浦江趙左同有記以上誌略參殘志紀聞 李侯桐鄉縣

志忠義孝悌祠在學內提舉亦列祀中

漁艇紀聞

按家乘明之公四子長允中次貴一早亡又次兩子幼寄居陸門北後成濮家村因屢遷名次失考允中二子長彥仁次立仁

濮允中入仕更名也先不花

誌略云也先者元之官名借以命名祈貴也

至順元年徵

為兩淮鹽場轉運司令至元乙亥建三清閣於元明觀後又建
化壇菴大殿晚築知止堂以自樂因號樂閒子輟耕錄云汪佛
奴歌兒也姿色秀麗嘉興富戶濮樂閒以中統錢一千錠娶為
妾一日桂花盛開濮置酒佛奴奉觴濮有感於中潛然墮淚佛
奴請問其故濮曰吾老矣非久於人世者汝寧善事後人佛奴
亦泣下誓無貳志人莫之信既而濮果死佛奴獨居尼寺深藏

簡出操行潔白以終其身

誌略

朱竹垞詩兒孫鄰里堪娛日不用千金買佛如

濮彥仁字仲溫樂閒之子至元辛未仕爲吳興市官棄職歸延楊鐵崖館其家築松月寮桐香室鐵崖爲作記集一時名士爲聚桂文會父子偕隱埋名不出瑣志參紀聞朱竹垞靜志居詩話元季浙西有詩社濮市濮仲溫集一時名士爲聚桂文會以卷赴者五百人請楊廉夫評其優劣於是紀風土者目爲樂郊楊完者之亂州無完郭繆同知思恭猶招羣彥集南湖與會分韻者一十四人越二年曹教授睿復集於景德寺是時聞人麟彥昭葉廣居居仲金綱子尚潘著澤民劉堪子輿咸有詩名吳鎮仲

立居魏塘貝瓊廷琚居千金圩鮑恂仲孚居郡城之西溪郁遵子路居商陳村四方避地者溫州陳秀民庶子居竹隣巷閩人卓成大器之居甓川江陰孫作大雅居南湖崑山顧德輝仲瑛居合溪天台徐一夔大章居白苧里會稽江漢朝宗居濮院桐廬姚桐壽樂年居海鹽之峨溪河南高遜志士敏東平牛諒士良江都邱民克莊錢塘陳世昌彥博建德張翥翔南皆來僑居四明周棐以陸宣公書院山長留居黎林日以文酒唱酬詩成輒鏤板鑱壁間聞者以爲勝事誌略云立聚桂文會東南名彥以文卷赴會者五百餘人所取三十人自吳毅而下文皆傳

世鐵崖爲之題序 濮洙字聖源輯家乘云十月三日官籍仲
温宅仲温子宗孟及乳母持譜牒二十冊避匿大士蓮座下隨
即逃至虎林威儀巷儀一作乙太平橋西世姻俞氏家至今三百年
我祖譜尙在康熙丁卯友人省試有見之者云載當時盛事及
簪纓圖百餘葉濮川誌略不過僅存什一於千百而已誌略云
龐氏唐氏仲温公妾也永樂初窮治靖難諸臣仲温以楊任之
戚並坐籍其家二氏俱自經一門雙節又云永樂七年己丑陳
瑛請窮治革除間方孝孺楊任等外戚濮氏以楊氏姻親籍其
家充雲南戍前此寥寥僅歸者至此又復匿姓散處至萬歷十

二年吾鄉屠御史叔方以忠臣已褒外戚未宥乞恩超豁以培
綱常事具題隨經兵部尙書張學顏覆奏放回而濮氏赦免還
籍族人乃得漸次復歸漁艇紀聞 仲温公著有遊仙吟

朱 釗賜進士出身歷任刑部侍郎贈監察御史紀聞

朱賜谷總管府提督海運諸路總管兼理軍務都總制朱氏自籍
產戍邊子姓懼禍旁徙惟留鎮與郡居一支皆賜谷之後也紀聞

石朝用以進士仕元爲廉使無子卒葬鎮西因以石家墳名其橋

俗誤稱石蟹墳橋鎮之巨姓至今相傳燕雷濮石云邑志今鎮南有燕家

浜北有燕場市中有雷家橋雷家潭寺浜有石家場紀聞參

濮 鐘字金聲仕徵仕郎 家乘

濮 銓字令宸安慶路總管 紀聞

濮 銑字尚師梧之八世孫也至大中仕迪功郎泰定間勅往北
征為元帥晉階寧遠將軍歸里後築園林於莊涇之南隅優游
終老焉

濮 鑲字成之仕徵仕郎明初遷仁和作辭家行云我生不辰逢
戰爭少年離散逐飄萍盼望何時得寧宇家鄉炊粥話伶仃一
朝干戈幸乍息此身又自作飛英江流漂渺無窮極回首柴桑
淚雨傾暮靄蒼茫何處路姑投客舍買殘羹入門不復問湯火

但有四壁哀啼聲云我夫郎半塗失不死單惜懷中嬰叩伊何
事也零落低言姓濮總一情主人聞聲大詫愕恐及株連催早
程啞啞鳥啼天欲曉吞聲理擔前途行道旁大帽忽高叫怕是
官胥心膽驚無罪離家苦復苦誰云四海樂昇平 以上紀聞

濮 欽字敬之天歷初仕郡推官旋棄職歸與楊鐵崖江朝宗新
仲銘友善建雪筠齋新仲銘為文記之 瑣志

濮允淳尚寶司丞

朱思明進義縣縣尉轉嘉興縣錄事判官

朱仁甫思明子青陽縣教諭

朱 完樞密院判官同知樞密事

未大德萬戶府協理海防

施有政世居縉雲仕元爲密雲縣令至正間知天下必亂棄官南歸會紅巾兵梗道不得前及抵嘉興泊舟陡門有所感遂萌僑居意南進數里許爲濮院鎮因家焉有政之子卽有遣戍之事卒葬居西三里二十九都色字圩 以上紀聞

鮑 恂字仲孚父德歸安縣丞元元統間浙江鄉試三領浙元學士張翥御史劉彥博薦爲翰林不就洪武初禮部舉吉安余銓高郵張長年及恂明經老儒達於治體可備顧問遣使召至京

師恂年八十餘銓長年七十餘上見之喜甚賜坐顧問一日上召恂等命爲文華殿大學士輔導東宮恂等固辭上曰以卿等年高故授此職煩卿輔導東宮耳免卿早朝日晏而入從容侍對不久隨卿致仕歸鄉以終餘年庶不負生平所學恂復固辭翌日放歸恂受易臨川吳澄得其所傳著易傳大義及西溪漫稿與貝清江程柳庄結社於濮川之西溪學者稱爲西溪先生邑志周實曰西溪詩傳者絕少曩聞海鹽胡氏有刊本求之不得嘗見其題畫詩云山橫紅葉晚寺鎖碧雲涼亦佳句也府志西溪隱居元鮑西溪先生所築與徐一夔所記近城三里者各異此

在鎮吳涇之西至今近先生之舊隱者猶以西溪名焉蓋先生
生於吾里與貝清江程柳庄結社於此傳載桐鄉縣志考之甚
詳紀略

按明陳邦獻濮川八景詩序有云姚君廷玉謂予曰吾鄉前輩
鮑先生仲孚嘗摘是境勝槩謂之濮川八景桐志云恂與貝清
江程柳庄結社於濮川之西溪學者稱爲西溪先生於是紀略
列之士著人物謂西溪在鎮之吳涇西而以郡之西溪爲各異
今按府志云漕渠之西爲西溪有鮑恂隱居明徐一夔記略西
溪在嘉禾郡城之西三里緣溪上下長波平陸漫衍曲折若龍

蛇馳驚樹木散出篁竹叢生隱如深林絕壑今鮑先生之居在
焉初先生世居崇德州其門人有爲之卜築者徙此一十年矣
郡人比之武陵桃源云又鮑溪在爰山南鮑學士宅在涇之上
據此是鮑學士當祇結社濮川未必生長茲土且學士旣嘗結
社濮川尋又卜築西溪又曾結廬爰山涇上其爲不常厥居可
知瑣志

明貝 瓊字廷琚鎮人經聞云崇德人居千金鄉爰山南祖謙宋太學上舍瓊少

穎悟師同邑黃次山及會稽楊維禎元末隱居教授生徒洪武
初舉明經庚戌詔修元史壬子校士浙省召入爲國子助教分

教中都前後五年因疾歸徙居安山所著有清江集行世略子
翺楚府紀善翺都督府經歷翔國子學錄並以人才舉世其家

學紀聞

姚珽字廷玉洪武間由儒士舉房山縣教諭轉嘉興府訓導

楊公藝永樂初由儒士舉任嘉興府訓導

楊景春字仰齋永樂戊子舉人辛卯進士任大理寺評事

楊述字宗道成童遊庠永樂癸卯弱冠領鄉薦第一兩試春闈

不第因就乙榜分教宜興陞國子監掌教視學四川福建文衡
為天下最景泰間擢遼府長史勤於輔導遼王書公正二字賜

之卒於官所著有蘭谷集四卷按楊氏族譜楊述為楷之子景

茂之孫均顯之曾孫均顯字平山嘉興縣學生其先世居嘉興

德化鄉諱萬三者富而好禮遠近慕之生繩生雅生任任為高

廟所舉人才累官袁州知府緣太常黃湜匿其家執至京師磔

於市均顯當惠宗即位時隱於幽湖之梧桐里歷有年所獨邀

寬典以名福者列在親屬免死謫邊後又改戍澈浦嗣因屠御

史叔方疏請於萬歷十三年放回籍 以上紀聞

濮敬原名彥威字方南生而穎異日記千言嗜鍾王書法盡得

其妙永樂乙酉上徵以楷書貢明年廷試第一歷任湖廣糧儲

道參議居官清正治績彰彰解組歸肆志林泉游心書史為鄉里典型焉 紀聞參家乘

楊 青字士昂述子警敏過人景泰庚午領鄉薦明年聯捷春官授庶吉士改授禮科給事中外艱服闋仍補諫垣掌南京吏禮二科事尋召入拜刑科都給事中陞河南僉憲奉勅總理軍民招撫流移多所康濟居數月以勞卒於官時年止四十未竟所施人咸惜之桐邑志云本邑科甲從此始西湖志餘云正統丁卯海寧張靖之之母夢老人書孫字於牆其年靖之領鄉薦兩試春官皆下第辛未禱於京城隍夢登大山老人謂曰此崑崙

山也驚寤取禹貢織皮崑崙研省紬繹八場果出此題冬為所窘桐鄉楊青者席舍相近來懇靖之因為開陳義意詳述注疏青遂登第名第七梓文一篇靖之竟下第後科甲戊靖之始登第名亦第七梓文一篇其年狀元乃孫賢也母氏之夢至是始驗蓋已八年矣維織皮之夢雖驗而虛若為楊青設者然靖之名第事實一與青同鬼神之示人顯而隱如此

楊 瓊字廷用正統丁巳歲貢任兩淮運判

楊 瑛字廷玉任巡檢司

濮孟深字樂靜由太學生任歙縣二尹吏才卓犖毅然以興利除

害為已任廉明慈惠邑頌良吏焉

鍾 琦字廷佩成化甲辰歲貢任江寧府崇明主簿 以上紀聞

濮彥英字子奇宏治間應詔納粟七百石賜七品散官生平愿慤

寬厚甘淡泊好施與凡知交間雀角必曲為解紛雖傾貲不惜

事全不令人知歲祲出粟以賑兩舉賓筵公與原配吳氏八十

雙壽秀侯徐公以龐德聞特為褒錫通政使司湯懋昭為撰墓

誌銘 誌略參家乘

濮 淮字徐治一字大川號桐邱改號桐原以明經任仙遊縣教

諭陞延平府教授值倭亂日夜與其令筆畫城守賴以不潰載

在方掌科碑記海忠介公瑞亦以學職任閩深器重之適大田

令缺推轂代署甫半歲而吏民之習丕變歸里為鄉飲賓晚喜

讀易將卒告廟別友賦詩而絕年八十有五崇祀鄉賢劉郡侯

修志傳入儒林 紀聞參誌略

鍾 鏞字廷器 一作廷和成化乙酉中式任江西貴溪訓導改泰平教

諭仕至陝西布政司參議

施 惠字澤民宏治丁巳貢清河知縣

朱 綬字文佩成化丁未進士授翰林院檢討侍岐王講讀宏治

庚戌王出就府邸奄官專擅輔導臣僚殆為虛位綬據例抗疏

得俞旨頒行諸藩自是政務悉隸輔臣永遵舊典越遷楚藩左相尋改相晉藩時王年髦世子世孫俱薨有欲竊柄者幽王曾孫於別宮潛奏權國上下疑莫能決綬密疏有王曾孫在乃得封乞歸楚王以綬奏請于朝復起相焉勅賜別有洞天四字建坊先後藩國二十餘年為人方正不阿著有四書輔註易經精蘊等書按祠墓在幽湖里馮夢植嘗題讚云初筮中秘道重岐師出相兩藩功恢晉嫡留孤忠於志乘享世祀於鄉邦紀其實也紀按府志鄉賢祠在嘉興府學內綬亦列祀中聞

濮師灼號見湖身長八尺力舉千鈞年十五值倭寇至禾欲聚少

年禦之從兄師韶力阻乃止師灼為周氏甥故從周姓萬歷中授東粵遊擊數以軍功加都指揮使太倉王世貞贈詩云緩帶諸生談碣石飛書一箭下扶桑可想見其概云子應祥襲嘉興守禦所總旗周師灼本姓濮載桐邑志

濮天輝字堯華號鴛湖丰姿韶秀以廩監任大鴻臚典謁神宗御極初年祭壇禮畢見濮從事奔走顧左右曰何方人中官以浙之嘉興人對上曰江南人乃有如此白晢特賚雞二隻酒兩瓶豕肉兩肩及二表裏舉朝艷為盛事擢侍經筵復加寵錫有經筵侍臣之額後解組歸里郡延鄉飲大賓子翰圻號景鴛天啓

間由雍貢授別駕辭不就職

按前二人本郡人濮氏家乘列通籍中仍郡中修譜略之舊也夫譜考同宗誌分異地誌略不分郡鎮一姓羅列蓋以吾鎮巨族城鎮迭居者甚多既為梓里不嫌並錄耳以上紀聞參誌略

馮 孜字子漸號原泉少孤力學嘉靖甲子舉人隆慶戊辰進士

觀政都察院授太倉州知州內擢刑部郎恤刑江右備兵河朔歷官至湖廣布政司所著有古今將略載明史經籍志又有明刑錄明儒要錄桐鄉志寧儉編貞節錄孜初登第即具疏請褒母張氏貞節得俞旨後膺誥封建貞節坊邑志參紀聞

馮 敏字次泉孜弟內閣中書紀聞

濮 謙字謙三鑑曾孫八歲能文髫齡補嘉邑諸生累試冠軍不獲售尋入胄學任江西贛縣訓導未幾卒于官家乘謙三公性慷慨宗姬交鄰以緩急告者無不應應必副其欲而不責其報故謙三濮先生之稱遠近咸推重焉誌略

陸 塔字允升號吉菴萬歷丙子舉人為入素敦孝友清介其天性也就羅山學博道誼自高捐俸却餽陞石埭縣知縣痛懲往弊嚴禁里胥包攬櫃書勒耗以清節自甘卒于官囊無餘財士民肖像立碑無子以眾好公舉于鄉得崇祀焉邑志參紀聞

劉應兆字泰徵萬歷間歲貢河南開封府通判 紀略

施 乾字一元曾祖茂永樂初以楊任姻黨被逮充順天武清衛軍父容業醫為活神廟初平湖御史屠叔方上言革除中外仗節諸臣宜與優卹修治邱隴矜其子孫其交游姻黨無辜株連世世編戍請一體赦宥詔許之一時蒙赦者千有餘家容因得歸乾於隆慶中以歲貢任懷遠訓導遷武進教諭終濮州學正生平慎取與辨析名義諸弟子翕然向化監司檄署平陰縣事乾辭不獲輒稱疾歸人服其清介為立碑學宮卒後崇祀鄉賢

紀略



時詔元聲具疏以祖宗朝從未有元子封王者儀制主事顧允成張納陛見而躓之列名同奏被旨切責復詣朝房詰責首輔至貽書比之李林甫許敬宗於是太倉引責並封得寢晉郎中極論關白稱亂始於大司馬石星倚沈惟敬朝鮮封貢之議輔臣趙志臯墮其術中趙深啣之借刑部主事朱長春疏勒為民里居二十五年究心理學建天心書院嘉興析縣時嘉善民倡為正疆界之說欲割嘉秀田為隱匿地元聲力持之著田糧沿革年譜三邑分縣圖籍考天啓改元議國本功起補南主事歷擢南兵部侍郎署部事會坐營都司陸超剝軍激變元聲參革

陸超而杖繫之事平以聞時逆闖竊政元聲曾與同官陳道亨具疏劾奏闖銜之至是遂以軍變削籍而復超官蓋超亦魏黨也崇正初復原官方大用而病不起卒贈南京兵部尙書崇祀鄉賢所著有潛初子集黃山稿易乘譚莊圖書編

岳和聲字爾律號石梁以進士授汝陽令與利除害修常平倉以備荒招撫流亡一千二百餘名建天中書院著天中語錄先是汝無隄多水患爲築隄七十二處柔延百餘里人稱岳公隄云歷擢禮部精饈司員外郎會本生父歿疏請終喪爲人後者得爲本生給假終喪自此始假滿補儀制司出守慶遠平反冤獄

十餘案建香林書院著香林語錄奉詔歸起補東昌守值亢旱首議賑恤全活貧民四十餘萬建攝城書院著攝城語錄旋陞福建提學副使兼攝海防調永平兵備道陞都察院右副都御史巡撫順天八上疏乞休居三年召撫延綏署總督事以疾乞罷著有同生錄澹漠錄餐微子集崇祀鄉賢

岳駿聲原名金聲字季有號石鐘別號齋菴萬歷丙午舉人庚戌進士昆弟皆早第時比三鳳筮仕刑曹值張差獄起意在調護宮闈力持風顛之說不欲窮治遂與東林諸公忤出守汝寧備兵淮徐調督漕事優擢楚臬時黔方用兵撫臣疏請駿聲監軍

言者撫張差事媒孽之遂拂衣歸乙丑起補楚臬晉勲寺拾級容臺秋三殿成加銜右都進大銀臺奉命祭告東嶽便道歸居數載卒生平歷官循次非有不次之擢在都時正議自持惟張差一事與東林忤耳著有景留堂稿齋菴集 以上家譜參紀聞

岳封公墓表云公少以文雄諸生丁時徭賦重沓拮据萬狀猶時手一編伊唔不輟與馮開之太史周彥雲孝廉篝燈蕭寺中數奇不售乃日討兩子而訓之季子金聲亦以文行負俊聲公父子間自相師友處則訓之學出則教之忠媿媿昕夕俾各發聞於時而後已公起詩書之廢疾而世莫見用韞經濟之器業

而人未蒙福安知非留其羸為來者地耶况公重義而無固於位也故子獲遂其強直秉節而無疚於利也故子獲遂其廉明

岳 潢字天一元聲子官南京光祿寺寺丞 一作詹事府主簿 紀聞

漢 焯字雅堂由藩掾任上饒巡檢救禳弭盜地方德之擢嵯縣棄職歸有雲遊老衲贈以萬應膏方試之無不效年八十有二而卒

濮繼學字連城由附例官主簿 府志由掾叙任巡檢

濮瑞昇字日卿天啓四年貢於郡庠任太平縣教諭 以上誌略

馮登瀛萬歷丙午舉人癸丑進士肇慶知府秀水籍府志參紀略

濮鳴科字用賓號心泉萬歷間由太學任戶部知印池州通判誌

吳應旻萬歷乙卯舉人廣東清遠知縣桐邑志徽州籍紀略

濮萬鎔字公治崇正己卯以貢任武康訓導陞遂安教諭

濮之符字采之天啓中由歲貢授揚州府經歷遷高郵州判弟之

葦字杭之歲貢以上誌略

姚 遲字士元號若麓萬歷戊午舉人令德化均屯租除胥蠹弭

盜清獄署垣有古木槁而復生人以爲惠政所感作瑞樹錄以

紀之歸里後栽花飲酒有五柳風紀略

朱治憫字子暇天啓辛酉舉人選授肇慶通判宣勞戎務卒于官

其詩磊落嶽嵴不沿時習府志

陳其德字太華號松濤天啓丁卯歲貢任嚴州府學教授忠誠持

重盛德著於里著垂訓樸語沈堯咨山臞編校并爲之鈔板詩

不多作其立春前題云水底竹邀雲共冷梅邊人和月同清風

致可想邑志云浙江採輯遺書總目垂訓樸語陳其德撰統論

讀書敦行處世之要中舉崇正十四五年災荒事後附松濤

遺詩十章

劉洪義字二方崇正年恩貢江西臨江府經歷

劉洪禮字三讓崇正年恩貢高郵主簿

周之學字冲字鎮江府通判陞王府長史不赴著濮溪志草

以上瑣志

金夢麒字寧所由掾吏任靈璧縣丞崇正九年任滿將去值流寇

攻城甚急邑令避去夢麒拒守兩月以援兵不至城潰巷戰死

之妻氏冒險入城遍覓得屍草草就斂奔控巡撫次年奉祀

名宦蔭一子世襲百戶 以上紀略

鍾廷耀字二舍以掾吏任廣東靈山縣丞遇難死

府志

鍾概字吳泉中書科中書

鍾煥號明宇吳泉子任廣西忠州同知

吳化龍字在田以縣吏授福建永春尉廉潔勤慎甫二載以父憂

去任士民感其德捐貲相贈化龍只取錢一二百文銀三四錢

餘令捐修大橋以便行旅人因立去思碑于橋下 紀略

濮德字文喬一字龍橋號葵菴任登仕佐郎南京倉庫局大使

家金陵十載始回籍 誌略

濮有容 一作有宏字德遠號居元分水籍秀水濮院鎮人崇正癸酉舉

人知安陸縣流寇攻陷之一門十九人死難

國朝乾隆四十一年

賜諡節愍載入

欽定勝朝殉節諸臣錄

府志

國朝鍾

彝

原名元圭

字紫錫號彤菴順治丙戌舉人任鳳翔府推官

家譜

鍾人超字南溟號子蜚彝弟順治戊子科由拔貢順天中式任山

東濮州知州

家譜

仲宏道字開一號改庵順治戊子拔貢除嶧縣知縣絕科派杜罰
緩歲更徭夫禁僉庫吏設立徠安社招撫流移萬家驛協濟銀
兩詳歸本縣坐編修文廟培士類絕賄賂禁誣告獎節義拔孤
寒於移風易俗之故尤加意焉作哀嶧吟十二章人比元結春
陵行蒞任六年著有理嶧拙言子來堂稿等書嶧志載入循良

傳歸田後杜門著書桐邑令徐公纂修縣志皆出其手并捐刻
印嘗九赴賓筵有擬易廣義改庵偶集等書詩有甌香集而史
韻正續兩編俱刻行世生平著述甚多政事文章推重當世高
年碩德模範閭閻為

國朝鄉先生之首

邑志參紀聞

邑志浙江採輯遺書總目增定史韻四卷仲宏道撰因明趙南
星原本而增輯之補帝王世紀於前而續明紀於後各以史事
編為韻語

顧高嘉原名項嘉字靖昭

一作昭靖

號南樓順治丁酉戊戌聯捷授翰

林院庶吉士改知縣以少年詞林出膺民社判如流水纖毫不爽邑稱神明由六合令擢河間府同知陞都勻府知府以終養歸卒于家

紀聞參瑣志

歸國禮字明所順治年

恩貢連江縣丞遷鬱林州判

紀略

馮貞秀字爾介順治辛丑歲貢衛輝府汲縣縣丞生平刻苦好學方正嚴毅不肯苟容少枉大節素不善詩甲申聞李闖之亂悲憤激楚作集唐十八拍以見志其自序云有忠臣孝子而不由寧靜沒漠者哉有忠臣孝子而不出才人學士者哉其志亦可

見矣 紀略參紀聞

濮 棻字芳標順治年拔貢任柘城知縣

家乘

朱 振字千仞康熙乙卯舉人已未進士知舒城縣邑遭寇躪振均賦役嚴保甲勸農桑興學校師征武昌道經舒城振令悉陳市物於庭平價鬻之兵不擾舒有七門堰灌田二千頃壅塞已久下流苦旱振考舊志排眾議卒與其利淮南諸郡種雜糜芑新令紅白分貯民病檢納力請得如故夏旱請減賦蝗不入境後攝六安裁革耗羨民咸德之以旱步禱致病卒著有龍舒治

府志 崇祀鄉賢

陳飛聲字元上號凝庵附例監生由舉人任江西上高知縣

瑣志

朱鳴吉字佑宸號迴齋康熙己酉經魁金華教諭 紀聞

鍾鳴盛字夔園號定山又號臯亭夔子康熙癸酉舉人任廣西武

宜知縣屢著惠政在任九載卒于官士民莫不懷德建祠奉祀
家譜

郁珍簧字嗣徽諸暨訓導 紀略

曹德潤字申吉由商籍撥入杭州府學貢生任遂安訓導

曹士璋字廷玉錢塘商籍康熙壬午順天中式任廣西思恩府同

知

曹懋華字燮亭江南閘官 紀略作縣丞

夏天祚石門籍字簡蒼號席珍康熙壬午武科舉人任本省衢協

右營千總

朱光國字人千康熙壬午武科舉人任都司僉事山東東平守禦
府撥運曾孫潤林字傅巖庠生

翟堯佐字亮工少孝友為單邑令除羨稅庫董家口患水開引河
修廢堤開涵洞號翟公堤葺城治河溢新宓子巫馬子祠修橫
舍設義學平倉量均徭役又歸王廣文殯復周尉官稱循吏云

崇祀鄉賢

翟枚吉字維藩號蠡洲堯佐子任隨州知州時湖廣流民萬育生

煽誘愚民集衆數百人謀于隨之光化鋪起事沿途焚掠居民大恐公馳入賊中獲其巨魁六七人賊衆駭散悉不究王雲衢爲作翟侯平賊記後遷郡城子燕貽字安期宜良知縣遷叙州判官照庭字深勗寧國知府亮工姪懷寧字嵩來莆田知縣枚吉著蠡洲詩鈔

孫起鰲字駕山康熙年

恩貢仁和訓導

王者香字懷績貢生由遂安教諭陞山東安邱知縣

以上紀聞

葉祥光字吉暉康熙癸巳舉人山陰教諭乾隆甲子科福建鄉試

同考官

瑣志

吉暉先生號韞山

楊

瑄字自崑號栗齋由國子生考授州同康熙丙申年充古今

圖書集成館纂修分纂樂律典一百三十六卷字學典一百六

十卷歷九年又六月書成議叙雍正丙午授直隸趙州柏鄉知

縣乾隆庚申夏圉圍空蝗不入境又嘗誠格甘霖時有政成三

異之頌士民肖像立祠壬戌擢江寧府同知卒于官著栗齋詩

稿二卷已刻柏鄉縣志云清廉勤慎懲匪愛民嘗步禱雨澤沾

被秋禾修理橋梁諸多惠政陞任江寧郡佐北關道左有祠

瑣志

濮元孝字武姚號東瀛歲貢生出海寧訓導歷任沙河平鄉二縣

知縣

紀聞

桐鄉徐志云康熙辛未科例貢考授儒學教諭

馮景夏字樹臣號伯陽原泉之後康熙癸酉舉人授陝西長安知縣

王師西征準噶爾景夏預備資糧輿馬而達諸境羽書使傳雲委雨集蒞事聽訟肆應如常醴泉縣有殺人兇犯張九思寄長安獄景夏察其冤力請上官審出之遷膠州知州州濱海南郭支河爲潮溢築堤障之尋以長安時賠案罷官

世宗憲皇帝御極特超授廬州府知府旋陞蘇松常鎮太督糧道五府州糧儲甲天下奸弊莫能究有溫鐵匠者善造斛便吏浮取訪而斃之法老奸宿蠹盡收之衆始大快徵糧時乘小舟微服雜農

民入倉廩或突陞廳事呼召倉中人飲食寤寐間惴惴若景夏臨其上造小口斛定尺寸制度上其議不果行後十餘年各督撫會議得

旨準用其式鑄鐵斛十一一存部餘頒各省畫一改造通行至今民稱小

口斛爲馮斛陞安徽按察使歷都察院副都御史刑部左侍郎告歸景夏工文章善寫山水頗自矜重不輕作子錦宜川縣丞以子貴 贈編修府志鈐歷官巡撫孫浩御史累葉簪纓由厚德

之報馮氏籍自桐鄉後遷郡治鎮實梓里云紀府志馮銘字積一歸安大匏村人元末移居梧桐鄉濮院鎮銘爲馮氏之始祖

八世孫敏仍居濮鎮布政司致析居桐鄉治西人猶呼爲馮家河云

張景穆字西嶠由諸生入京以二尹擢隴西閬中二縣陞靜寧州知州以老乞休卒于家

紀聞

王應綵字天章號萊堂康熙庚子亞魁雍正庚戌進士刑部主事乙卯充廣東副考官得侯君弼等七十八人轉本部湖廣司員外一切疑難案件推勘務得真情遷江南道監察御史督學湖南考試二府一州旋丁母艱接任者爲漳州蔡相國新嘗寓書曰足下臨蒞茲土不滿三月而兩湖人士稱道弗衰何施得此

服闋補湖廣道御史巡視西城遷工科給事中年六十餘卒於官著有清慎堂奏稿邑志引畜德略編云濮川王應綵館于塘棲徐氏歲暮歸家遇暴風舟泊五杭村比夜聞哭聲達旦晨往詰之見老嫗告曰予子負宦家租拘囚將比計售媳以償成事在今日耳王問其數視束脩不數步回館中典衣得金借往償焉明年登賢書

屠嘉正字時若號恂齋高祖應韶明直隸新樂縣丞以廉直聞世居秀水嘉正始籍桐鄉雍正甲辰進士由刑部員外郎出知廣西太平府鄧橫蠻抗逆督撫議進勦檄府參贊軍務嘉正親冒

礮矢屢出奇挫之歷十月事始竣叙功不與思明土官黃觀珠請以五十寨歸流土民乘機爲亂議者欲發兵勦之先奪觀珠職嘉正馳啓督撫止兵單騎往曉以禍福解散其衆密購首犯寘之法不逾月事遂定改山西大同府遷福建糧道以母憂歸服除補湖北荆宜施道江漢水利督撫悉委統理凡荊州安陸襄陽德安四府隄工千餘里並以時修舉前後條議數萬言悉中肯綮尋擢貴州按察使改貴東兵備道引疾歸著恂齋集別集共十六卷平思明蠻事載

大清一統志及廣西通志子洪緒字葆和詳篤行

以上府邑兩志參瑣志紀聞

周呂桐字虞封號琴邨雍正癸卯武科舉人原任金山衛守備虞封父元龍由杭遷濮兄斗瞻亦登武科子泰桐庠生

瑣志

馮樹字惠衡江西宜黃縣尉

阮林字松年

一作松山廣東巡檢

方學沆字靖公號菑園雍正丙午舉人辛酉赴部挑選得通籍官於康城十餘年久之量移越雋衛參軍卽辭疾旋里年八十餘適遇乾隆丙午擬重赴鹿鳴先期卒著有遜志齋古文正續兩編初刻二刻三刻詩集并制義一卷

按菑園先生候選知縣借補橫浦場員加捐衛經歷

卜義明字書常號麗東雍正壬子舉人任福建鹽大使句容知縣

改歸安教諭卒于官任鹽大使時恤竈戶却商規去任時紳士為詩以送之

孟寶中字天叙嘉興籍乾隆年貢選湯溪訓導卒于官 以上紀聞

李枝昌字介繁 邑志作 號蓼匪又號莪村乾隆丁卯科五經中式

戊辰進士由山東樂陵單縣歷陞東平知州饒州知府調江西

贛州知府署吉安建寧兵備道修復宗祠重建會龍橋 即長木改築石

橋 繼祖志也年八十餘卒于家 瑣志

濮啓元字顯仁號玉巖少受業於桑水部調元乾隆庚午舉人選嚴州分水教諭癸未進士補湖北來鳳縣知縣調廣西灌陽縣

知縣攝博白縣事署龍州通判己亥庚子癸卯三科同考試官所著有玉巖詩鈔又著嘉禾百咏金壇于相國有序縣志云調灌陽知縣培植多士捐俸修葺學宮民勒石銘其德引疾歸宦橐蕭然以舌耕老 瑣志參紀聞

馮萬年字申藩由郡人贅于方氏遂入籍乾隆壬申科副榜由江蘇銅山主簿遷鎮江通判 瑣志

沈琳字潤輝號華坪少受業於杭太史世駿父雍嘉詳孝義傳琳乾隆丙子舉人辛巳進士授武選司主事洊擢員外郎中琳久任選司熟成例吏不能奸論事於上官直言無隱以故皆委

重焉改職方郎中陞御史轉吏科給事中巡漕江南擢光祿寺少卿卒于官自通籍後歷任京職二十餘年迎養二親孝如其父事叔謹與從弟同爨數十年無間言兼通醫求疹視者雖臧獲無不應生平恬澹寡營著有瞻雲堂文集

府志參瑣志

屠 亮字載熙號丹崖桐鄉籍乾隆丙子己卯兩科副榜補處州

龍泉教諭卒於官

瑣志

吳 瓌榜名襄字駕璜號文溪性誠篤事母以孝聞瀏覽經史善屬文尤工於詩乾隆己卯科舉人授中書充

武英殿纂修官歷陞內閣侍讀清慎自矢劉文正公極器重之著有

釣魚譜松聲閣刻鵠集

府志參紀聞

鄭邦柱字孝儀原籍吳江贅于宋氏遂入桐鄉籍乾隆己卯舉人任江西瑞州同知

陸 震字雄萬號省堂乾隆壬午舉人考 咸安宮教習第一挑

發山東補德平知縣五年乞終養歸卒于家有小題文選刊行吳奕傳字紹虞號葵園秀水籍乾隆庚寅舉人署四川樂至縣不攜家以二僕從居官有慈惠聲甫十月卒貧無以斂制府李恭勤公世傑察其賢囑守以下助之始克舉喪歸之日民送數十里肖像文昌閣下祀之著有葵園集

以上府志參瑣志紀聞

楊樹本字大立號蔭軒乾隆癸酉副榜戊子又中順天副榜國子監教習由考職第一授州同銜任江西寧州州同卓異推陞湖北鶴峯知州乾隆五十五年恭遇

覃恩授奉直大夫著有文房備覽濮院瑣志等書

忻溥字象天號博菴秀水籍乾隆辛卯科舉人補寧波鎮海訓導卒于官

陳徵餘

寄姓戴

字晚蘭號香圃秀水籍乾隆辛卯科舉人補嚴州遂安教諭

安教諭

胡琢字其章號珠船乾隆甲午舉人補温州平陽訓導卒于官

著有濮鎮紀聞採入伊郡伯府志又著法眼觀

沈潤芳字芳舍號譜蘭又號漱六鏐穎子乾隆庚子舉人任山西

猗氏陽曲二縣知縣陞保德州知州

項熊字太占號月舟焜弟乾隆丙午舉人任武康訓導

屠本仁字任之號鏡原

瑣志云字道甫號菴諸廉使之孫

乾隆庚子科優貢任臨

安訓導己酉舉人補麗水教諭著有濮院志等書

王士端字端思應綵孫乾隆甲午科優貢補山東高唐州吏目

宋貴字慎諸由吳江入桐鄉籍乾隆乙酉拔貢寧海教諭

沈鴻達字驤衢號鑑齋潤芳從弟乾隆甲寅科舉人署安徽懷遠

懷寧霍山三縣知縣丁艱旋里適遇歲歉請予當事勸里中殷
戶助賑全活無算服闋往四川嘉慶壬申署雲陽知縣

沈方大字純之號直夫光祿子工書法任安徽潛山縣丞陞桐城縣

知縣署無為州知州

王本祖字純伯任北城兵馬司吏目

陸寅字曉堂任嵩明州吏目

忻潮字浙門溥弟任江西泰湖縣丞

李念昔字有懷邑志作慰泉高郵時堡司巡檢邑志山陽縣板閘巡檢

曹焯字章漢號雪橋廩貢生任餘杭縣學處州府學訓導

陳天鏞字師夔廩貢生任衢州府學訓導讀書好義出俸資捐助

濮之南橫街及幽湖橋事載桐邑志

沈世騮字駿先任羊寨巡檢

吳瀛字芳洲號青峯奕傳子嘉慶辛酉拔貢任廣西象州思恩

天保恭城富川知縣補灌陽知縣

陳鎮字洪萬號蓀湖廩貢生任處州府學訓導

程廷選字鑑齋號菊塍嘉慶乙丑由城遷鎮丁卯科舉人任象山

教諭以上瑣志參紀聞

附記漢川紀略有國學掾史兩門不著時代無從排列先後僅錄官職姓名於左

劉洪智字四聰四川射洪縣主簿

于道標字方壺山西蒲州府通判 以上國學

張問志字華南廣西倉大使

王 徵池州府照磨

郝敬愚太和典史

楊可鈔經歷

沈在田上杭典史 以上掾史

歸國倫武魁福寧州海潭把總兼指揮僉事

科目 已仕者詳載鄉達

宋朱勝非上舍登第

濮輝如 崇德 紹熙四年癸丑科陳亮榜進士

濮世昌 崇德 原名焰寶慶二年丙戌科進士

濮一之原名徐涑寧宗朝進士

歸謙吉度宗朝進士

元石朝用 崇德 進士 科分無考

朱 釗 嘉興 進士

鮑 恂元統己亥科解元

濮 鉞 崇德 字左黃延祐時舉人 誌畧云至正間鄉進士

明楊景春 嘉興 永樂六年戊子科舉人辛卯進士

楊 述 崇德 永樂二十一年癸卯科解元

楊 青 桐鄉 景泰元年庚午科舉人辛未柯潛榜進士 邑志云本邑科甲從此始

鍾 鏞 桐鄉 成化元年乙酉科舉人

朱 綬 嘉興 成化二十二年丙午科舉人丁未進士

馮 孜 桐鄉 嘉靖甲子科舉人隆慶二年戊辰進士

施爾志 嘉興 萬歷四年丙子科舉人壬辰進士

陸 階 桐鄉 萬歷丙子科舉人

岳元聲 嘉興 萬歷十年壬午科舉人癸未進士 榜姓樂

岳和聲 嘉興 萬歷十九年辛卯科舉人壬辰進士 榜姓樂

岳金聲 嘉興 萬歷三十四年丙午科舉人庚戌進士 改名駿聲

馮登瀛 秀水 萬歷丙午科舉人癸丑進士

朱大猷 萬歷己酉科舉人創為義塚

吳應旻 萬歷乙卯科舉人 桐邑志 徽州籍

朱治貞 嘉興 萬歷四十三年乙卯科舉人

施有恒 秀水 萬歷四十六年戊午科舉人應天中式

姚 遲 秀水 萬歷戊午科舉人

朱治憫嘉興天啓元年辛酉科舉人

項毓槐嘉興崇正九年丙子科舉人

岳瀚嘉興字天水崇正十二年己卯科舉人

濮有容一作宏分水籍原籍秀水崇正癸酉科舉人

國朝鍾元圭桐鄉改名彝順治三年丙戌 恩科舉人

鍾超桐鄉元圭弟順治五年戊子科舉人順天中式原名元超

顧高嘉原名項嘉順治十四年丁酉科舉人戊戌進士以上紀聞參紀略

濮鏊嘉興原籍桐鄉字仲宣號雋茹草堂之孫九歲能文康熙五

年丙午科舉人時有駐防官兵安福善寺鏊與項仲生等白諸

當事舟覆石門而卒人咸惜之辛酉寺僧佛眉重過濮院晤項

仲生詩曰見君欲墮淚為我幾殺身試看濮墳草青青十四春

謂仲宣也紀聞參略眉聞見錄

朱鳴吉秀水康熙八年己酉科舉人

朱振嘉興康熙十四年乙卯科舉人已未進士

陳飛聲桐鄉康熙十六年丁巳 恩科舉人

傅允諧桐鄉字霖蒼康熙二十六年丁卯科舉人選會稽教諭未赴

而卒

鍾鳴盛桐鄉康熙三十二年癸酉科舉人

曹士瑋仁和高籍康熙四十一年壬午科舉人順天中式

歸倫桐鄉字粹倫號遜齋康熙四十四年乙酉科亞魁

葉祥光桐鄉康熙五十二年癸巳恩科舉人二月鄉試八月會試

王應綵桐鄉康熙五十九年庚子科舉人雍正庚戌進士

屠嘉正桐鄉拔貢生雍正元年癸卯恩科舉人四月鄉試九月會試甲辰

進士

高志桐鄉本姓葉字嵩山雍正癸卯科舉人文思敏捷一日可成

數十藝所讀書過目不忘每遇一題未有無熟文數篇者

鄭世元字亦亭號黛參由姚江入籍秀水居莊涇器宇不凡雖屢

空不改其度館于湖其門人江星刻其集曰耕餘雍正癸卯中

順天鄉試弟蘆村亦能詩文為廣寧知縣子虎文字炳也號誠

齋乾隆壬戌進士授編修典河南鄉試督湖南廣東學政歷左

贊善著有吞松閣詩文集

方學沆桐鄉雍正四年丙午科舉人

卜義明桐鄉雍正十年壬子科舉人

李枝昌桐鄉乾隆十二年丁卯科舉人戊辰進士五經中式

曹鎡桐鄉字鳴廷邑志作銘亭乾隆丁卯科舉人

濮啓元桐鄉乾隆十五年庚午科舉人癸未進士

周讓之

桐鄉字項人號若谷乾隆十七年壬申

恩科舉人

二月鄉試

八月會試

若谷工隸篆印章家貧早年廢學逾弱冠始發憤自勵嘗

擁書網機且織且讀

沈琳

秀水乾隆二十一年丙子科舉人辛巳

恩科進士

吳襄

桐鄉原籍休寧改名瓌乾隆二十四年巳卯科舉人

鄭邦柱

桐鄉原籍吳江乾隆巳卯科舉人

陸震

桐鄉乾隆二十七年壬午科舉人

吳奕傳

秀水乾隆三十五年庚寅 恩科舉人

周京

桐鄉字次豐乾隆三十六年辛卯科舉人

忻溥

秀水乾隆辛卯科舉人

陳徵餘

秀水乾隆辛卯科舉人

項焜

秀水字經天號改村乾隆辛卯科舉人

歸敦

桐鄉字坤傳號元圃乾隆辛卯科舉人未放榜而卒

乾隆辛卯年自縣試至錄科居首者計十一人秋闈中式者項

焜忻溥陳徵餘周京歸敦凡五人為幽湖盛事惟歸於未揭曉

前已故人共惜之

胡琢

桐鄉乾隆三十九年甲午科舉人

葉家琬

桐鄉字琛獻

號素堂祥光孫乾隆四十二年丁酉科舉人府志云事繼母孝能曲體其意遂于經術嘉善周震榮宰永清重其學延請禮敬為刊所著養蒙術人爭寶之以為讀書法

鄒上貴 桐鄉 字佑賢號晴嵐乾隆四十四年巳亥 恩科舉人

沈潤芳 桐鄉 乾隆四十五年庚子科舉人

朱均 桐鄉 字學庭號錦塘乾隆庚子科舉人

朱垠 桐鄉 字曜南號瑜山均弟乾隆五十一年丙午科舉人

項熊 秀水 乾隆丙午科舉人 以上紀聞參瑣志

楊澐 桐鄉 字秀漪號湘帆又號少辛改名為金乾隆五十四年巳

西拔貢中式舉人兩輯家譜著有策學鏡海爾雅音準一經樓

詩賦就正編 瑣志參桐 溪紀略

屠本仁 桐鄉 乾隆巳酉 恩科舉人

沈鴻逵 桐鄉 乾隆五十九年甲寅 恩科舉人

程廷選 桐鄉 嘉慶十二年丁卯科舉人

武科 已仕者詳載鄉達

楊 奇字瑞元 桐鄉 順治丁酉科舉人

夏天祚 石門 康熙壬午科舉人

朱光國 秀水 康熙壬午科舉人

孫起亨 石門 康熙壬午科舉人 以上紀聞

周天機 康熙辛卯科舉人 紀略

周呂桐 桐鄉 雍正甲辰春 恩科舉人 按府志雍正二年甲辰補癸卯鄉試

鍾光烈字承哉 桐鄉 雍正甲辰科舉人

高 亮字旣白號夢花 桐鄉 嘉慶戊辰 恩科舉人 以上瑣志

附記

歸國倫武魁科無考 紀略

[Faded bleed-through text from the reverse side of the page, including names like 許天林, 許天林, 許天林, etc.]

職監 互見篤行文學

濮詣泓字長民 董孚字交如 濮光孝字行先長民子

濮宏孝字經在行先從弟 曹煥字德維 周瑒字容佩

以上考授州同知載徐邑侯縣志

周峻字臨初 陳飛穎字丹書 曹國楨 以上三人載徐志

張授麟字素臣考授州同知

岳昌源原名淮字魯山號泗庵考授州同知由涇南遷居菱湖曾

應京江張相國之聘與諸名士相唱酬著有經野堂詩集八十

卷

曹 字六史長木橋曹家園其故居也 未詳

鍾塘字南思明字公元孫考授州同知

陳德星字朗瞻考授州同知 陳元星字南光 陳宗字源夏朗

瞻子 以上候補州同知

陳煥字明上候補布政司理問

王青選字儀可萊堂公之子候補刑部司獄

楊紹基字崑田候補州同知 陳增字如川候補布政司理問

曹豹字端臣候補州同知

王昌裔字恭先號芝圃候補布政司理問性質直里黨偶有爭端

輒為排解值歲饑率先捐資并勸各殷戶助賑為當事所獎

屠中柱字一擎號梅麓 未詳

陳天鏡字鑑民如川嗣子候補布政司理問

濮燾字廣含號東屏候補州同知 贈朝議大夫

鍾振富字方穀號杏村候補布政司經歷嗜金石搜羅漢唐以來

石刻六百餘種

楊步蟾字桂巖號梯霞崑田子候補州同知

濮廷輝字襄雲號霽村廣舍子候補州同知加四級

鍾錫章字金綬號雲嶠方穀子候補刑部司獄

陳錦字織雲號雲崖候補刑部司獄

陳鎔字容金號墨樵候補布政司經歷

濮承鎬字澗東號杏園武姚公元孫候補布政司經歷以上漁艇紀聞



貢生 已仕者載鄉達

明施宏令字明初嘉興學歲貢

施恩字濟民正德己巳貢 以上紀略

鍾應官字太始號雅初天啓辛酉副榜 家譜

岳淙字濬伯崇正戊辰科副榜 金陀世譜

鍾元英字華宸崇正辛巳歲貢 紀略

國朝曹士瑛字韞山康熙辛卯 恩貢卽選訓導改補縣丞未赴

任卒與兄士璋同輯禮記精義

沈鳳翼字蜚卿號丹巖秀水明經 家譜云 有文名康熙壬子奉文

修志桐邑令僉舉蜚卿及桐鄉文學沈鈺介石鍾貞蒞若三人
共相採輯後三韓徐公諱秉元復請仲宏道編纂蜚卿盡出所
藏互相讐校而邑志始成

程士樞字鼎臣康熙年歲貢生選蘭溪訓導未赴任卒善學窠大
字嘗捐貲重修翔雲觀三清閣

賀聖武字右文康熙庚戌桐庠歲貢杜門讀書候選訓導未赴而
卒 以上紀聞

曹德光字斗文康熙年歲貢

李登瀛字武青康熙年 恩貢

俞宗浩字滄洲康熙年 恩貢

楊 鎬康熙年府學貢生 以上紀略

濮 楨改名聯元字維周號北三康熙年府學歲貢善詩古文詞
精鍾王書法兼通醫所著有醫學揭要 瑣志參家乘

徐 忠字錫純康熙年 恩貢考授州同知

鍾光皓字曉蒼康熙年 恩貢考授州同知 以上紀略

鍾 鼎字漢年雍正年 恩貢

張宏範字倫表號霽陽乾隆庚辰年府學歲貢桐鄉籍天資敏妙
長於詩文嘗親炙蔣季眉范巨川諸前輩又與鄭耕餘陳謹堂

陳古銘諸先生迭主詩壇極幽湖一時之盛書學晉人風流亦頗似之晚年專精古籍生平手錄積九十餘冊壽八十臨終有口占辭別詩云禪家果有輪迴說重抱書包做學生意致殊豁如也著有霽陽詩鈔四卷

周世瑱字夔音乾隆壬申年桐庠

恩貢

吳振鵬字軼青乾隆壬申年桐庠歲貢

項元槐字廷三乾隆丙子年桐庠歲貢

施日新字敬身乾隆年府學歲貢

周世堯字欽表乾隆辛巳年府學

恩貢文章言動為後學模

楷遊其門者甚眾丁卯科試藝闈中已定元發刊矣尋以三場卷被焚置之考官為之扼腕晚年病足嘗坐一榻以文酒自娛遂自號榻髯以上瑣志

陳猷嘉字峙南乾隆辛巳年秀庠

恩貢植品端方為鄉黨推

重

沈鐸穎字起雷號劍文乾隆丁酉年桐庠歲貢文行兼優以義方教子卒年七十餘子潤芳由舉人任知州

沈廷相字在巖號鈞門乾隆庚子年

恩貢家貧力學名噪一

時著有書笏草堂集督學雷鉉實光霏咸許其文近昌黎

桐邑志

學教諭獎借後學成就甚多樂善好施老而彌篤庚寅秋俸友

王武錫卒于官清俸分賻著有經學述詩韻課虛漢川所聞記

項廷貴字良哉號揚菴乾隆庚戌桐廬歲貢

鄒際盛字紹唐號文麓嘉慶丙辰桐廬 恩貢

沈浚都字旃望號衙郊嘉慶庚申桐廬歲貢任嵯縣訓導

錢熙字雍陶號涵春嘉慶壬戌桐廬歲貢

沈惟賢字立方號竹留嘉慶丙寅桐廬歲貢

沈渭興字熊占號交杜^杜嘉慶庚午桐廬歲貢

吳陳勳字樹堂號琴逸又號落堂桐鄉籍嘉慶丙子優貢丁丑以

教習留都五載道光辛巳銓授台州府學訓導戊子登賢書甲

年二月卒于官廨著有梢雲山館詩鈔

岳洙傳字魯源號小彭一號古香道光壬午桐廬歲貢

翁履綏字南樛號篔圃道光甲申秀庠 恩貢捐職州同

鍾賢祿字斗瞻號梅村桐鄉籍道光庚寅歲貢善吟詠精岐黃叔

振民序其詩曰姪梅村有白云詩情得處如爬癢世味嘗來似

嚙冰其風標學識不同凡艷也可以知其人矣著有且間樓詩

文集

鍾賢禧字雲瞻號香泉道光壬辰桐庠歲貢

岳沂春字與曾號笑山道光甲午桐庠歲貢

蔣煜字燈午號月心道光丙申桐庠歲貢

沈松字貢青號聽濤道光戊戌相庠歲貢

篤行 已載鄉達諸門者不重錄

宋張德明貢士理宗時建三教院見冢宰陸德輿碑記 瑣志

元糜孝子佚其名貝清江嘗贈詩云幽湖老人七十餘一身如蝨

隱圖書朝廷不起常夷甫鄉黨已知徐仲車題為糜孝子云按

里有糜節婦清江傳云糜正妻生二子以儒名於世孝子或即

正之子歟正二子一名實 紀聞

張全真建南涇道院有趙子昂碑記

狄守真狄氏為鎮巨姓至正丙午建福清道院

附記濮川殘志云福清道院明之公建明初狄提點重建

劉 祥字原善邑志云其他姓卜居者前有貝劉燕朱按劉氏家譜祥始遷鎮贅朱提領宅元末隱居不仕信義著於鄉里友愛篤於孔懷祥兄弟五人以詩禮傳家生三子長永昌字西隱壽九十七賜冠帶次永昂三永昭其時聯姻者皆吾鎮巨姓厥後支派繁衍迄今已十三世矣所謂劉者或即指此歟漁艇紀聞

明施 茂字德懋與郡中楊公任為姻婭靖難時黃子澄謀恢復走謀楊公事泄族誅親黨皆坐戍因連及永樂九年同范小孫等十一人永成順天武清衛茂承先訓以孝友率其家雖羅无妄不圖苟免戍者例以長屬行茂諸子各篤恩誼不忍長兄獨

蒙其害乃倣古代戍意更番赴操人咸以敦睦歸之

施 晟字默菴以長當戍僉謂公老成能督家務宜留耕綜理賦役則祭祀有託而因以所入慰遠行乃先之以次弟昇繼之以五弟昱而晟與三景四旭各受祖田二十六畝竭力操作以籽粒買金時輸戍所戍者大約十年而迭休居與行勞逸得均焉次第及公之子若孫所謂於患難之中有禮義存焉者乎以上紀聞

濮宗淵字魚樂洪武時濬築皂林以北官塘千金不吝其畜濮圓齡有祖風景泰中大旱宗淵發粟五百石募役濬河以便行舟宏治中尤旱又復捐米千餘石自南幽湖濬至運塘水得以

不涸當道義而旌之府祀忠義祠志

施 玉字一默孝弟樸誠惟知守拙而無他營次當赴衛瓜期既

及代歸優游鄉井以信義著聞昆弟怡怡衣食無分爾我公雖

讀書惟了大義不習為文章卒以盛德享遐齡年九十有三紀聞

陳 本字安善淮安府山陽縣人洪武初攜子端字宗良遷居鎮

之花園坊里中稱涼棚陳氏紀略所云前八家陳居其一公以

善行起家累世書香弗替孫俊德字敏公會孫龍字伯瑞

陳世輝字守拙伯瑞公子以謹厚稱子樸字慕萱少失恃常懷風

木之悲爰終身不茹葷分析之產弟所欲者悉讓焉孫文炳字

孔明號隆陽嘉郡廩膳生通易理熟左氏內外傳曾孫汝陞字

少陽徙居雷潭家譜

岳 商字成卿號東湖兄夏多子商曰我止兩子耳於是田宅讓

而受惡臧獲讓而受老別治子舍奉父母以孝謹稱兄弟皆素

封值踐更及兄卒凡役必肩其難且重者孫三人皆以甲科顯

咸謂孝友之報紀聞

岳九德字心夔以博學困經生間幼子五聲早夭有田三百畝族

人欲瓜分之慨然從其請自曾大父以下子姓輩割膏腴與之

居無何復有持其田來售者仍厚值酬之後以子元聲和聲駿

聲貴馳封資政大夫正治上卿通政司使通政使崇祀鄉賢弟
九臯字心吾號青門和聲嗣父誥封通議大夫資治尹都察院
右副都御史崇祀鄉賢

金陀世譜

濮立仁字宗達樂閒公次子性沉厚言行為閭里法有隣家夜獲
偷兒敲扑不止公起而力勸曰不過爲飢寒迫耳旣無所失當
釋之私與青蚨三千令改行力業公一生好善郡縣高其義旌
以冠帶飲賓配許氏字妙清生三子長真次寧又次謙皆有聲
黌序公於元末出贅烏鎮許氏因從許姓明初移家郡城初居
府治西火德廟相對後徙市心街關廟東

濮彥華更名孟清字子澄洪武初遷仁和永樂初奉詔旋里葺舊
廬復故產食餼崇序力課其子彥行彥英彥能有聲膠庠遡述
宋元以來祖宗相傳之緒輯爲遺章其中闡揚先世勉勵後人
之意反覆詳盡至今子姓奉爲家珍由是遠方聞者亦漸以集
濮院之派得再振

濮煜字堯光號連瑚敦慤天成教子甚嚴四子用行維垣維邦
維坤咸擅譽膠庠又養子侍祖事公甚謹公義視之侍祖次子
元華稟尤沉慧與公之諸孫同就家塾髫齡遊庠由舉人任山
東泰安知州後元華雖移居吳門每譚公訓育遺澤潸然淚下

公之德足以感人也郡邑給冠帶旌之壽八十有四按府志濮元華嘉興

籍萬歷戊午應天中式

濮 勲松之子與弟熙及鰲共敦孝友年八十郡延鄉賓以上誌略

濮文起字三槐邑諸生學古好謀士林推之值倭寇圍桐城河朔

宗霍兩將戰歿皂林督撫胡宗憲延請歸安茅坤及公問計因

出金幣餌賊首徐海愛妾紫雲圍始解東屯乍浦又令妓翠翹

碧桃蠱海乘間攻之海溺水死督撫欲具題重用力辭之祀忠

義祠紀聞

濮文貴以饒裕充靈宿鄉繁役長樸謹而文千金一諾嘉靖丁酉

郡守趙公瀛均平秀水糧則以靈宿東西兩區田瘠不堪並徵

率區民疏請乃得以靈東糧十作九徵計田三千三百四十畝

有奇靈西糧十作八徵計田七千七百一十畝有奇費踰數千

弗惜也建大通橋於陡門鎮郡邑義之勒石於郡治旌善亭立

願建十二橋最後為圓滿橋年八十有一紀聞參誌略

鍾啓明字惟東號思梅大父錡仕崇明遺產悉讓從兄邑城圯捐

資勦築萬歷間歲荒煮糜賑飢全活無算以詩書迪後列鬻序

登賢書者接踵人謂陰德之報祀忠義祠紀聞

按鍾氏家譜啓明捐資勦築邑城奉文給賜冠帶與妻歸氏同

享百齡子應宮副榜孫元圭由舉人任推官元超由拔貢中式舉人任知州曾孫鳴盛由舉人任知縣

濮圓齡號侍涇父應麟祖芳曾祖遠卽宗淵公次子世居陸家橋西大牆宅內佃儻多才繁劇善應為族人首推凡閭里不平必為排解善處兄弟間與應龍子守忠應麟子守恩守愚守惠應鸞子守懋守慧同堂友愛畢生無間言因擴先業以貽子國輔國佐誌略公為人謹愿桐邑令胡公舜允題其居曰鄉約所慷慨樂善有祖風嘗捨宅以建白衣觀音庵祀忠義祠紀聞仲應鶴字九霄性至孝於萬歷末年二十三歲母周氏疾割股療

之祀孝悌祠紀聞

濮椿字文齡號竹菴性仁慈以孝義立身徒手起家富甲一邑善營能忍故多積鮮禍嘉靖甲寅倭寇突至郡佐張瀛峯邀議城守公宵旰畫策捐重資以助賴以保禦有司廉其事授冠帶旌之誌略

楊恩字菊賓萬歷間修葺桐城菊賓傾捐油車漚岸石百餘丈以急公紀聞

濮琦字良玉孟深公之子古道堪型不苟言笑而心平氣和親之者如飲醇醪望重一鄉子周字西郊性最孝承歡堂上甘旨

無間凡一粟一粟不欲假於僕婢之手與妻劉氏雍容舉案有相敬如賓之樂孫哲寧字近泉醇謹老成處已接物恭而有禮濮 鑲字東川近泉公之子資稟聰慧博聞強記凡遇難處之事無不應機立赴嘗慨然曰昔蕭何曹參以刀筆吏勲名垂竹帛大丈夫不當如是耶當事慕公之才重公之學然見機明決終身不仕 以上家乘

朱茂曜字子蕃太傅國祚孫崇正辛巳餓殍滿野曜鬻田葬之不下數千人收棄孩於路為粥僧院活千餘人日走赤日中不目息謂人世大夢錄古今史傳及所見聞凡夢兆之可徵者為徵

夢錄二百卷生平和易接物語及綱常臨大節赴大難毅然有

不可犯之色 府志 朱茂曜萬歷己酉孝廉朱大猷子大猷創為義

塚崇正庚辛飢疫頻仍茂曜偕鎮民踵武增修益置塚地以埋

殍 紀聞

陳國紀崇正十三年捐田十一畝作義塚時疫癘大作復偕朱茂

曜僧岸然韻石遍拾屍骸所埋不下五千云桐邑令閻中張公

如戴嘉之作碑記并請於上憲免糧以旌其義

沈世珍與陳國紀同修舉義塚見戴大尹記

黃仰椿慷慨好義崇正間捨基建靈源菴里人名黃菴 以上紀聞

濮 洋字愛川東川公之子英敏性成好讀書勵名節義所當為
慷慨激烈以從里黨間扶危濟困排難解紛凡橋梁道路有利
於人者必捐資以任之鎮西鳴鳳橋公所獨建祖塋為公所經營建造從
弟某公乏穴公遂義讓而自居於下焉其敦孝友崇族誼如是
紀聞參家乘

濮明聘字忠宇性孝友鄉黨咸稱之慷慨仗義為人謀必忠家乘

楊霖寰性好施捨建香藏菴

施大猷字少泉賦性坦易尤多天趣速老不異嬰兒昆弟間相友
愛晚年始得一子施氏如成事未艾公公父子當次及會宥得免

人謂天相壽八十三 以上紀聞

李成德憫族貧讓產贍之崇正末年飢出粟助賑里人感其惠卒
後祀忠義祠

國朝李尙白成德子康熙庚戌水災能繼父志捐賑鄉里壽九十終
祀忠義祠

李逢年尙白長子有聲鬢序壽七十舉鄉飲賓堅辭不赴學使汪
以三世鄉評表其間

李懋華字舍白樂善好施縣治官塘登瀛橋懋華獨力建造又改
長木橋為石橋人賴利涉當事旌以額卒後祀忠義祠其孫枝

昌位至贛州守 以上紀聞

濮萬鉅字叔盈自幼謹樸不苟言笑就傅儼若成人塾師器之既長敦愛族誼日以濮川誌略爲念康熙丙辰公年已七十矣毅然捐資力任梨棗

濮龍錫字九上號懶雲幼習博士弟子業每試姓名輒不落人後明崇正間曾遊槐市厥後授徒講學以終其身弱冠喪偶痛其能孝於姑守義不再娶撫子洙成立姪涑死有產數十畝應歸公公曰吾平生固窮何忍兄之子死而潤其橐耶讓於姪女秋毫無染止持兄嫂木主以歸居恒好讀左氏春秋至老不倦肆

力古文詩詞或勝客睛牕游情翰墨寸楮尺縑識者競寶之公素醇謹有隱德鄉黨共推重及卒貧無以殮時諸當事高其節孝捐俸相助作歌詩輓之因得與呂孺人合葬焉都閩進士俞公京爲撰義夫傳秀邑學諭舉人周公盛雅撰誌銘郡守進士閩公若琛表其墓曰隱君子鄉達大方伯王公庭稱爲高士云
誌略

濮 淙原名名宰字贊甫號澹軒六世祖宗美及高祖東園曾祖古槐三世皆豪俠好義樹德於鄉因得憲獎尙義之門咸以齒德舉鄉飲賓其大父南庵長齋事佛里黨呼爲佛子父諱守道

號思庵娶周氏生二子先生其仲也長於詩而業賈往來吳門所與游皆當世知名士四歲喪母號哭至三晝夜不輟繼母邱氏遇之嚴曲意承順事兄玉華最恭長姑歸沈門少喪夫守節於弟家先生轉求高賢請於當事誌其貞節焉先生疎於財雖貧乏肯周人急家遭回祿乃父及後母在宅中火圍七匝先生奮身而入左肩擔父右肩擔母狂奔火宅中如騰空踴躍而出者厥後澣雪居又遭祝融之禍焚其所藏書數千卷并自著詩集僅存袖中澣雪居集一卷西泠戴曼公笠浮海至日本向與先生友善喜先生詩迨日本國於江府建祥麟院居之遂以先

生詩集刻行於海外先生豫營壽藏去先塋僅十餘步意在百世不忘先人也 傳略

邑志云濮澹軒集浙江通志濮淙撰釋本黃濮淙傳先生寓吳門無定居初至山塘則有半閒樓詩集遷蘧樓則有蘧樓集遷塔兒巷則有月巢集遷北濠僻徑則有莊廡集

周起龍睦族敦里治家嚴而有法順治三年歲飢斗米三錢人情洶洶龍捐米二百石半價給散隣里一方感悅卒後祀忠義祠周應驊起龍從子康熙十三年路拾珍珠髻一項價值不貲蓋花姓親迎貸諸富家以爲新婦之飾女奴遺失幾起訟端驊見其

使踉蹌至卽以還之不受其謝卒後祀忠義祠
孫嘉麗字爾宣性孝友築園亭以娛其親嘗刻清夜鐘及邵康節
孝弟詩以勵俗卒後祀孝悌祠子起鰲官訓導修學造士得義
方之訓居多

曹德望字渭公秀水籍事母盡孝母疾藥弗效割股肉以救諸昆
弟有困乏者輒助之卒祀孝悌祠子士勲士烈亦知名以上紀
陳有仁字振所慷慨好義積有善行順治五年邑令張鳳羽十六
年郡守劉啓復給匾表其閭屢舉鄉飲賓府志子芬字含芝桐庠
生屢薦不售孫延緒字允長有祖風曾孫曾裕字錫璋太學生

有善行臨終謂家人曰桌上有請我去二帖子一富而不好善
家一好善而不富家作何去處僉曰就好善家為是遂點頭而
逝曾祉詳文苑

俞廷謨字介山桐諸生行止端方居家敦倫睦族教子孫以讀書
明理為要年八十餘舉鄉飲紀聞

濮成名字思庭秉性正直邑令三徵鄉飲不赴韓宗伯慕廬稱為
渾金璞玉娶楊氏家門之內整齊有法夫婦俱登上壽尤西堂
先生贈詩云言坊行作表器宇若澄淵又云神和氣愈靜德邵
仰高年可想見其梗概矣弟成隆字耀庭和光抱璞篤於友于

之誼成義字建庭樸直為懷絕去渣滓鄉黨稱為醇謹

紀聞參家乘

濮成允字實公氣誼敦厚情意真切為鄉黨所推重

家乘

方霽園性好施與適中表某逋負綢債歲暮索迫萬無可支立解

囊三百金助之復贈數金為薪水費歿後濮有賈客渡揚子江

誤脫水中見方力救之問之則曰我此地神也子闇然有父風

楊蒼舒康熙間捨宅建菴曰新菴

張敬萱與同里諸好善者創為施樁之會首捐三十金仲改菴為

作同善會記 以上紀聞

濮詣淵字瑞源天性醇厚絕遠市囂和平中正與物無競能規人

之失成人之美提攜獎勸往往賴之以成家以孫啓元貴 贈

文林郎灌陽縣知縣子宏孝字經在候選州同知 贈文林郎

灌陽縣知縣公與弟駕凡長民兩公輯家乘付梓太傅王公熙

尚書杜公臻侍郎胡公會恩太史許公汝霖咸有序

濮詣潢字駕凡號芝山方嚴自持舉動不苟凡事刻於處已厚於

待人不蹈非禮之事不取非義之財里黨仰其德容而畏其正

直嘗遊京師與杜肇余韓慕廬胡孟綸費風山諸先生善故所

輯家乘作序者皆名公鉅卿子元孝歷任沙河平鄉知縣 以上漁艇

紀聞

鍾 梁字子久號來霞庠生樂善尚義端方自守好排難解紛里人或有齟齬得一言輒冰釋俗呼為百受三世同居有張公藝風雍正五年觀風正俗使王國棟舉賢良方正給扁獎之與鄉飲子孫數十人著有來霞詩集為顧茂倫諸前輩所賞載英華集中子元文國學生克承父志昆弟終身不析產婚嫁以次內外百餘口翕然相聚

邑志參紀聞按來霞集院中丞有序

陸星聚性好施建聚星橋其裔陸震舉人任知縣

沈 對字惟登號鄰橋沈所向字質菴沈選字三菊皆舉鄉飲賓蘇慎卿舉鄉飲賓郡伯黃公家遴給額曰 盛世逸民桐邑侯郭

公金湯給望重鄉邦額 漁艇紀聞

紀畧有鄉飲一門所載馮次泉楊黥川黃若和王泰寰沈華山鍾紫錫仲開一曹六史李含白蘇慎卿周崧崧俞亮工鍾子久

以上

沈隣橋陳有仁周省野沈完吾顧冲字張恭默陳哲人

朱嘉謨字聖言號止齋太學生好施與慨然以利濟為己任天性

孝友置公田若干畝贍戚族課諸子極嚴以敦品植行為先務設義塾結放生社拾人之骸埋之留人之嬰育之夏施蚊帳冬施棉衣薑飲以周貧乏他如葺橋建亭施棺諸好義事詳見沈

歸愚馮樹誠鈕西齋陳古銘諸傳記中 府志參紀聞

宋永齡字如章號盛溪吳江人遷濮康熙戊子歲飢竭力助賑葉孝廉祥光紀其事乾隆三年桐邑舉鄉飲賓卒年七十八 紀聞

王宗仕字殿卿號敬齋休寧人秉性純孝以家計中落棄儒業往來濮川權奇羸以供洗腆遂家焉一生敦倫重義有獨行君子之風以子應綵貴 贈朝議大夫 邑志

朱克綏秀庠生以孝義稱乾隆十五年同里具詞申學憲金壇于

相國耐圍贈額曰黃枕管牀 紀聞

施本孝字懷先號道生少孤養于母家求考妣厝壤不可得日夜

悲泣誓不得骸骨不復歸一夕夢神示以彷彿踪跡訪得之遂

大慟攜柩祖墓焉後以服賈起家子遊庠皆誠孝所致也 瑣懷

先求考妣厝壤適僱舟舟人知其處導至一塚發盆滴血驗之

確遂得葬焉卒年六十四陳古銘為作墓誌 紀聞

陳國梁字坎山雍正十二年父病刲股和藥以進病尋愈里人咸稱之 邑志

曹錫柅字藝初篤學敦行有募櫬啓戒火葬說等篇刻以勸世乾

隆癸亥創瘞埋暴骨之舉賴以入土者甚眾弟瓚字在中太學

生亦樂行善事 紀聞

沈維章原名雍嘉以字行號惺齋性孝友重然諾父患溺不下醫
謂必得人氣吮之乃率弟雍美字謂韶協力救視父病得瘳人
稱雙孝里父後又病痢雍嘉年五十餘矣親自澡拭累月不懈
里有養媳不容于舅姑父母議更嫁夫知而不迎也公呼兩姓
勸諭卒感悟成婚乾隆戊辰米價驟貴傾廩千餘斛貸鄉人不
促其償後償及半念餘皆無力者併取計簿焚之事繼母孝謹
弟兄終身共爨內外無間言凡遇里中津梁公舉無不一力贊
成人亦服其公正

府志參瑣志

濮 枚字恂九太學生性恬靜自號恬坡父元孝博極羣書由訓

導任邑令政聲籍籍恬坡素遵庭訓言動不苟誨子弟先德器
而後才技里中修橋鋪路諸善舉樂施不吝長子應泰字字寧
號魯峯太學生以孝友聞一生和平謹慎人稱長者值歲饑捐
資助賑卒年八十有五季子又華庠生有文名孫懷珍字縵中
號珊瑚園太學生醇謹樸誠有祖父風與兄德瑛共敦孝弟好法
書名畫不惜厚價購得之人以書畫相質別真偽不爽苗髮石
門方蘭坻先生與公契合過梅涇下榻草堂中論詩讀畫終日
不倦

楊 權字斗衡號可庵端方正直舉鄉飲賓桐邑侯蔡公可遠給

國瑞家祥額

楊璜舉鄉飲賓學憲錢公給望重耆英額 以上漁艇紀聞

王嘉魁字士超附貢生能詩兼工隸乾隆乙亥鬻田助賑又募人

粟得千石全活者眾兄景瀾亦好施 志府子達字郡威庠生

楊繡封字帶如太學生性倜儻乾隆庚寅偶遇歉收封首倡捐賑

之議里中匪類糾集開場聚賭博封邀里中矜耆上抗當事此

風乃熄封祖父俱鄉飲賓而封獨不永年僅四十而歿鄉里惜

之 紀聞

張志榮字乾九乾隆庚寅里人出粟助賑張本小康毅然以百石

自任當事給扁獎之 瑣志

陳德星字朗瞻號毅菴考授州同知性至孝父病劇割股以療與

弟元星璇星共敦友愛人稱難兄難弟云子寅字敬廷

陳璇星字寶文桐庠生性清介晚年日啖梵經數頁憬然有悟臨

終云雙手撇開生死路一身跳出是非門跌坐而逝 家譜

陳國祚字禹銓輕財好施有鄭道衡者代人貿易主某姓虧折本

三百餘金情急將自盡國祚約某姓分任代償某諾而食其言

國祚慨然曰我雖貧何忍為德不卒也盡括其資本授之子煥

字明上號慕孺候補布政司理問讓產於弟捨田作祭產捐粟

施衣造橋修路當事表之以子徵餘 贈六品銜孫兆麟字南
園號果亭貢生著有傳家必備書嘉慶十八年建善慶橋向名
蘆塘橋以子鑽官訓導 封修職郎

按明上本姓陳以戴姓行嘗捐資重建迎鳳橋又因陸家橋北
之石條街路窄溝深慮人傾跌乃另採寬石修砌縣亘百餘丈
費及千金 瑣志

吳玉潤字方流休寧人經商桐邑卜居石人涇乾隆壬戌販麥百
石返徽行至小金山適久雨溪漲溺水者順流而下玉潤僱舟
拯救給以衣食濟活無算 府志按吳封公遷濮已久其子瓌由桐

通籍 瑣志

屠有恆字秉仁由青堆遷濮貧困以誠信刻苦成家生平未嘗讀
書然頗識大義嘗為人排難解紛莫不冰釋里中凡有義舉輒
以身率先晚年建祖祠買祭田以供祭祀與鄉飲壽踰八十里
黨咸稱之 瑣志

蔣紹輝字適文廩生性至孝嘗割股肉以療母疾家人初無知者
比卒殮時見其臂有瘡痕始悉 邑志沈世勳輓紹輝詩有孝不願
人知之句

鍾 璽字玉階國學生少好讀書以疾廢舉業事親能色養教子

弟嚴而有方嘗誦爲善最樂讀書便佳之句以爲訓敦姻親恤宗族克繼乃祖梁乃父允文孝友之風 邑志

史彬如居北橫街植品高潔精于醫以濟人爲心遇貧者不受其酬稍有所餘卽周貧乏卒後數十年人猶稱道之

顧贊周本貧家子性孝友嘗割股療父疾父怒輒率兩弟跪牀前伺其解顏乃起伯仲間怡怡如也少失學常竊聽經師講課遂粗知大義陳古銘爲作顧孝子傳 瑣志

曹楠字惺園府庠生父甸邑庠生母沈氏早故繼母徐氏未一年父喪楠少孤能讀父書長因貧故奔走四方以養母積有餘

貲恤鄉鄰修祠宇後爲繼母泣陳苦節得援例請 旌建坊于

陡門之官塘年七十三公舉者士予冠帶子焯廩貢生候補訓

導孫晉墀邑庠生著有僅園存草一卷

周袁勳字樹豐九歲喪母哀毀如成人事繼母得歡心弟三人早

卒喪葬獨任撫姪女如已出有舟人遺人獲于路拾追還之不

受其謝 以上邑志

濮椿字元亭號珠巖太學生事親能先意承志兄弟相友愛族

有貧乏者每月給薪水之費凡喪葬嫁娶悉引爲己任朋友告

貸慨然與之不索其償歲飢捐資助賑年六十餘而卒 贈朝

議大夫家譜

陳宗字源夏號鹿巖朗瞻子候選州同知性孝友與弟時憲至老不析爨好施與乾隆丙子庚寅乙巳歲饑率先輸粟賑濟學使竇公郡伯梁公給扁優獎事載府志子永齡字岱松太學生陳時憲字章甫號華峯力敦善行歲飢輸粟助賑郡守梁公給惠濟維桑額長子雍嘉字太和太學生早卒

家譜

鍾峻字侶韓號瑞麓國學生幼岐嶷長純厚孝友無間言里中稱善士焉

邑志

雷潭鍾氏以孝友傳家公克承先志睦族恤貧歲饑捐資助賑凡里中津梁諸善舉好施不倦以詩書迪其後人

伊郡伯給望重鄉閭額桐鄉李邑侯給扁曰敦厚可風

夏瀚字賡南號檢齋桐庠生居心長厚植品端方善啓迪後學從遊者如坐春風中

楊紹基字崑田號蔭穀庠貢生候補州同知倜儻負氣撫孤姪為弟婦王籲請旌典以彰苦節平生樂施不倦兵巡道潘某給額曰惠周鄉里馮侍御浩有傳事載府志

陳堅字剛中弟墉字弋高庠生薦而不售增字如川家庭雍睦式好無尤乾隆己丑甲辰歲飢輸粟助賑增子天鏞任衢州府訓導早故增復撫堅子天鏡為嗣事載邑志從子雲錦字天裳

庠生有文名

陳氏寄
姓沈

岳孝子名錦文字武乾嘉興籍居鎮南鳳橋村世隆子也世隆戍山左妻嚴氏方孕未幾生錦文及長省其父於諸城縣之百丈河一時有孝子之名縉紳家具酒食邀之留月餘而返越數年又往其父已病故錦文呼號欲絕負骨旋里卜地安葬家素貧窶兩次遠行資用乏絕路遇險巇危而得安巡撫方公給孝義可風額獎之

屠洪緒字葆和廉使子國子生性慤實事親得歡心讓舊宅於諸從兄弟人稱長者以子仕封教諭卒年八十有一載府志

岳國祚字肇基號惺齋少孤母及氏撫育成立事母至孝爲人謹厚端方以詩書啓後子孫咸游庠壽七十有三以上漁艇紀聞

沈鎔經字稼舒號芝山太學生事親能色養乾隆甲戌歲父年六十患瘧瀕危公剖股和湯以進翼日病卽瘳有老媪窺視家人始知之公則終身未嘗言也年七十有四而卒著有自怡集四卷長子鴻達舉人任知縣行略

濮銘字蓉初太學生購地於梅涇橋南合葬族人二十餘棺增輯家譜錢唐梁山舟先生爲作濮氏世家贊

仲均字恒若號樸真太學生性孝友乾隆甲寅年奉母濮氏命

重建迎龍橋嘉慶辛酉重建梧桐橋壬戌又建聚鳳橋兄弟相
輯睦終身不析箸次弟增字金若先卒均撫姪如子族有貧乏
周恤不倦喪葬嫁娶悉引爲己任值歲飢捐資助賑均卒季弟
垠字坤若號春圃子鎮字正先號澹菴亦好施嘉慶癸酉重建
王母橋同里戴文成字秀章年七十餘矣經理匠料不辭勞瘁
如朝陽善慶餘慶等橋皆其所告募督建者 以上漁艇紀聞
陸 炫能服賈養父母與諸弟極友愛家人數十口同爨始終無
間言壽至七十五終 邑志

葉渭連字馨和號蓮舟秀水籍太學生於乾隆甲寅年三十八歲

母及氏年老病篤刲股瘳之其子芸述其事 漁艇紀聞

陳賜麟字玉符幼失恃體素羸長兄泰和三兄蔭喬相繼歿悲痛
不勝繼以咯血父時憲疾篤日夜泣禱無效遂密地割股和藥
以進乃瘳後數月賜麟嘔血亡惟執次兄世昌手以善養老父
爲囑年止二十三邑令李公廷輝給奇行格天額獎之鍾振民
爲作傳 府邑志參紀聞

徐瑞雲字文揚住靈宿鄉原籍上虞嘉慶元年瑞雲二十七歲父
患疽毒瀕危割股以進

鍾振仁字陳卜號最愚太學生性孝友與兄振健振德怡怡友愛

終身共爨好施與歲饑輸粟助賑里中接嬰放生諸善舉踴躍贊成曾撰陳烈婦傳付梓子賢慶字善餘太學生好善有父風惜早卒

周德馨桐邑人父世彪患瘋症手足不仁時德馨成婚甫半載卽共父寢每夜起身四五次與妻邵氏奉湯藥飲食不少懈歷十餘年如一日母張氏患病二載德馨與妻侍疾維謹母死哀毀骨立以上漁艇紀聞

文學

已載鄉達諸門者不重錄

宋濮德鎰郡馬濮奉鎰之弟性好幽閒不樂仕進淳祐中郡馬爲安王所善家聲震耀德鎰獨超然貴盛之外結茅屋于幽湖之渚茹素安禪吟花咏月往來皆布衣交郡馬歲時饋遺俱却不受年九十六端坐而逝

元姚清讀書通達時務爲郡書佐廉平慎飭以不得柔媚取容攜妻子處濮谿耕釣爲終焉計暇日漁農倡酬酣適所著有樂章一卷行世以上紀聞

濮鋼字經之天性嚴正自幼端凝至正末僞周張士誠據平江

招聘諸名士公與楊鐵崖同在聘中公對使者謝曰草野鄙人
一無知識顯榮厚祿非所敢希因是觸怒僞周幾罹不測之禍
而公恬然自若鍊崖至平江亦賦詩而還兩人遂成莫逆明初
奉旨遷嚴州悉散貲財以去後有濮隆中萬歷乙卯順天鄉試
濮有容原名有宏中崇正癸酉浙江鄉試濮應台中崇正壬午浙江
鄉試

國朝康熙甲子科濮應宏濮應龍全榜中浙江鄉試濮文燾中乾隆

戊子科浙江鄉試太平教諭紀聞參家乘

濮 鏡字慎之號敏士博學能文好古不倦生平飭廉隅謹嗜好

而一種和藹之氣穆然如坐春風中識者擬其品在濂溪明道
之間紀聞

明濮守清賦性耿介守正不阿自號曰介如時因分徙後惟公佃
房產以安居謹飭自持不逐浮華日以詩書自娛其朝夕課子
弟勿輟也

濮宗潮原名宗澤字秋濤太學生力學罔懈工於詩古文詞藝苑
名流爭以識公爲幸一時有國士之目以上家乘

濮明徵字賓庭生平嗜古讀書必求實義嘗對子弟云看書當體
認聖賢語氣反而求諸身心性命方有裨益若竟以此取青紫

則陋矣

岳 洵字眉山元聲子廕入太學探究易理著周易綱目晚習禪定端坐而逝年六十七 以上紀聞

馮其隆字景雲明桐邑庠生少積學有聲黌序善書嗜岐黃術及諸子家言神宗朝會學宮圮邑令高公重葺屬公書廟碑筆法有唐人逸致萬歷三十二年敕禮部訪求醫學明理之士衆以公應聘至京授聖濟殿品職賦歸後逍遙蠶水以自適 紀略

曹文運號冲陽邑庠生家貧常至不給與其弟文選閉戶讀書文行爲諸生冠邑侯蔣允儀器重之

顧 問字去疑號九霞桐庠生平時手不釋卷丰姿矯潔以方書

活人年八十校莊郭諸書意旨雋永常出人意表

史漢良字圖南邑庠生善詩書法得蘇長公筆意喜成就後學里中學詩者多宗之 以上瑣志

濮 月字溶生初名梅貧而自好與語如坐春風詩文外兼工染翰推重名流

陸養正字以寧號青霞又號冷臣博古士也善書得放翁筆意詩古文詞無不超越時輩弱冠遊庠見明祚將亡寄情詩酒著有石鳴集 以上紀聞

濮 燦字萬松穎敏力學食貧自甘六奮棘闈傳經徒老事載陸
槐庭傳中至其逸致幽懷了與人異操履潔白尤爲人所欽跋
云

濮 熙敏勵擅文譽學宮推之 以上誌略

濮 煬字抱真號草堂警敏絕人及補博士弟子員鄙夷帖括言
肆力古文詞手不釋卷嘗構別墅顏曰水木塢因稱水木居士
前後詩社唱和皆海內聞人著有草堂十書曰庭語曰貧範曰
詩話曰桑梓異談曰山丁月識曰漫拾曰水木彙編曰自怡篇
曰落照閒談曰逸志又著錦箋樂府選入汲古閣六十家中天

啓乙丑三月廿五日偶示微疾召六子八孫羣至榻前口宣二
偈曰九品蓮臺九品香從今獨坐日芬芳修行何必常持誦一
點慈悲滿十方微命如絲奈若何風花詩酒喜經過樂天預構
蓬萊字老我還歸般若波宣畢而逝公娶賀氏生子可重可遠
繼娶高氏生子侶莊可封庶許氏生子可觀可佳各受遺書覺
譽遞擅公葬秀水白六都蘇家橋之南聞人尙書墓西 誌按釋
寂解著見聞錄載抱真梅花小築自題及諸名士水木塢詩跋
其後云濮明之公第八世草堂公仲宣公之祖也盛宜山瓣香
集中有濮草堂日記錄公當神廟時與二三同志結物外交寄

與筆墨爲詞壇贈炙年七十時曾爲疏禱大士謂世無不死之人願更活十一年得滿九九之數于晚花新筍時微疾而逝無憾矣至歲三月果亡壽八十有一人咸異之見濮氏譜公生六子學問俱優次芸窗公仲宣公之父三侶莊公肖韓公之父皆由草堂公尊賢取友更多漸摩之益以致人文之盛獨悲仲宣公方舉孝廉爲念祖先遺緒以清梵剝竟遭覆舟之慘吾等雍染茲山能無憾乎故集羣公投贈諸咏以懷之草堂本郡居而侶莊曾修濮川志仲宣公力清山寺皆有功于吾里故詳其所自云

紀聞

呂 洽一名道方字圓渚號草亭爲秀邑諸生少時專以性命之學旁及堪輿術數之理晚年一歸于虛靜至于衣食之計一切置之不問突烟不繼怡然無憂至友人家對酒賦詩輒作二三日盤桓歲除詩云一瓢天目水幾片徑山茶其高致可見所著有學庸圖註未及刻詩多不存稿臨歿前數日一老友詢其歸期舉一指相示果于月朔坐逝云

鍾 山字賓王號韻石秀邑諸生也爲人情深而無俠氣故其詩有纏綿感慨之句值李闖之變益落魄不羈雖三旬九食終無折腰之態吳扶九以屈靈均比之可謂善狀其人矣所著有吉

雲集 以上紀聞

濮翰圻號景駕鴻臚公長子自幼警敏入郡庠為文援筆立成平生精工筆墨法書各畫一寓目即別真贗朝夕以此自娛天啓間由雍貢授別駕郡邑皆請謁見公高隱不出年七十有二娶周氏繼娶鄒氏子二麟錫龍錫兵部侍郎徐必達銘其墓

濮之葦字杭之自明初析處遷於郡城寄姓為羅後復姓兄之苻字采之一號太行天啓中循例選授維揚衛幕即投冠歸精岐黃之術施貧窶凡里中利濟事無不為之見郡城鴛彪兩湖佔塞有礙地靈遂力主濬復并築會龍山堤為開源邊流之舉葦

苦志工文採芹食餼之苻七子長瑞淇更名瑞琪次瑞沼三瑞泚四

瑞濤五瑞渭六瑞鴻七瑞藻之葦二子長士衍次士津伯仲九人皆恂恂雅度鬢譽相仍時人以之比荀薛云

濮夢錫字君貺為諸生負雋聲與道水公復祠祀祖與有力焉濮文昇字貞所早遊桐庠潔白自愛推主永安祠祀享必虔廟貌屢葺故祠得經久不廢惜未五十而終

國朝濮侶莊字道水諸生卓犖多才學優行懋輯譜略及垂鎮古蹟

一刻濮川殘志等書崇正丁丑復永安祠教授生徒罔非名雋門下有

登進士者王逋蚓菴瑣語云諸生濮道水順治己亥八月十三

日卒二十九日魂遊城外僱船往濮院在舟自言在南門內南宮後浜今往族姪濮襄甫家到岸道水先入舟子待久不出往詢乃知詢其服式中履俱入襯時所服者又一日陸士愚見公在嘉邑儒學前衣冠大步偉然如生

濮 琦字肖韓少英敏嗜學有文名每試輒優入棘闈十有三次弗售吟咏自適不以功名爲心志累年八十有三而逝著有香石居詩稿 以上誌略

沈 機字爾任號海鷗工詩居梅花涇上自號梅花逋客諸生隱於詩酒所著有鷄笑軒稿四卷梅涇草堂集二卷陳謹堂稱其

硬語盤空獨往獨來不肯傍人門戶真能自闢風氣

吳宗泰字伯讓順治己丑嘗著樵李稗編其自序云己丑夏郡國有修誌之舉曾採近略若干則以備當事萬一遂取郡縣諸志及吳越以來應考之書而參訂之

施 博字易修爾志子明季諸生少篤學不事進取讀易至家人卦悟聖道不離倫常用乃一以務本爲學教人躬行爲重不尙空談聽者罔不感發平生遠標榜未嘗入社著姚江淵源語

錄講義若干卷

府志云按通志作施靜誤

濮國佐字襄甫圓齡子也奕世箕裘儒風素著康熙癸卯爲福善

寺迎僧住持重為輪奐著有安邱子迂言

馮允秀字爾遂居東荒村舍著有梅花逸叟集 以上紀聞

節錄紀略鄉先生八長者小傳 馮爾遂先生諱允秀邑庠生

少壯時卽有老成氣象家中少長相見皆怡怡先生胸中瞭如

但性不喜臧否人物壽九十四而終前數日預作辭世詩命孫

慧才錄之果至期而逝 施京扶先生諱增別號柏年桐邑增

廣生為人溫厚雍睦日寢食書卷中以品節學問自持雖所遇

多艱終無戚戚之態壽九十而終 張行可先生諱和桐邑增

廣生理學湛深為一時儀表其與人交雍雍然不激不隨令人

自敬楊學憲特舉優行給額曰德音是茂 賀君庸先生諱聖

武桐邑廩貢生博學善屬文四方名士咸願與之交其性慈祥

謹慎平時恒齋戒不飲酒不戕物命 陳哲人先生諱紹堯嘉

府庠生丁巳舉人江西上高縣令飛聲之父為人端方持重不

妄言笑不妄交與不輕喜易怒不苟取濫與 沈茂生先生秀

邑庠生賦性恬靜修潔榮利不居於心寵辱不形於色喜寫書

凡古今圖籍俱手錄成帙居家以和順為務訓子弟先德器而

後才技 張恭默先生諱亢光桐邑庠生卓然有文名與楊園

張考夫先生遊以滋培德性崇尚實行為本居家未嘗有疾言

遠色惟存忠信篤孝友敦詩書務勤儉而已壽七十餘 陳鑑
民先生諱觀年十七補秀邑弟子員天性誠懇所行務篤實惡
浮薄平時選詞而言選步而行與人坦易近情故人對之爭競
之心自釋壽八十二終

夏 篆字石書號誠齋由鄉徙濮之西河自幼以孝友聞弱冠遊
庠博極羣書訓子弟文行並勗仲改庵有傳孫天祚由舉人任
千總曾孫圖南字潤蒼號西甸庠生十歲失怙事母至孝撫幼
弟甚友愛元孫朝棟庠生 家譜

陳禹錫佚其名以文章著名性耿介居恒崇尚經術門下士皆恂

恂雅飭如鄭耕餘兄弟阮松巖陳夔一古銘謹堂及朱人千輩
均以文章品望著名其餘從學之士不下數百且有相繼授經
至三世者弟睿聞為邑諸生學問行誼與兄同下帷雪溪語水
間而才豐遇齋亦如其兄焉 紀聞

濮光孝字行先號仁齋又號瀛仙長民公之子 家乘考授州同知著
有學圃集鹽官許焯序云濮川為楊宋舊遊之地流風所及其
人士多好吟咏較他鄉獨盛濮君行先則以蕭閒隱秀之致自
成一家誠此中之翹然突出者也 濮川詩鈔

周映康 本姓 字豐玉號淑元著有雪芸草一卷

周龍雲

本姓濮

號飛藻著有懷孟草集一卷

施元勳字翼聖號韋莊闢小園於長木橋東曰東荒

俗誤稱東瓜浜

繪圖

賦詩當時諸名士咸贈以詩嘗選有明一代文曰巽言集又選

小題文咸俱刻行世

曹士勳字名竹桐庠生以文學著名著有翠羽詞盛宜山之友徐

堅仲嘗錄數闕政之朱太史竹垞太史讀至滿江紅結句云猛

加鞭回首夕陽山蒼涼狀不覺擊節曰此人詞名當不在我下

吾將為延譽矣陳蓮宇謂與楊柳岸曉風殘月同其風韻汪謹

堂填滿江紅調弁其集俱非虛譽云詩有萍梗集

以上紀聞

沈堯咨字飭臣號山臞海鷗之從子也幼工詩克世家學與陳謹

堂刻濮川數十家嘗索序于當湖易窩老人寄詩云及今不收

拾是則誰之咎又云吳地無風詩願附詩繫後其殷殷桑梓之

情亦可見矣設教里中從遊者甚眾其後人多以文學稱著有

晚盥集

紀聞

沈堯咨少慕張履祥之學以孝弟為先邑令蔡可遠

舉優行詩學本諸從父沈機天趣洋溢時有明心見道之言

邑志

子雄飛字柯亭庠生孫鏗穎歲貢生錫庚字星瞻鍾斗字星府

禹字漢儀皆庠生曾孫潤芳鴻達皆登賢書渭興歲貢生潤舍

字琴六號春山廩生屢試前茅數薦不售濬方廩生沖茂瀛登

皆庠生元孫楷廩生累世書香咸推梅涇沈氏

楊炯字曙輝號存齋庠生有文名著有南遊草拾遺草諸集

楊煒字赤雲太學生安貧篤學著有雲竹詩集桐鳴小草

楊燮字爾梅號勗亭少負雋才精醫學及錦囊經術年十三補

桐邑庠生旋食餼與其兄赤雲擅名一時人稱雷潭二楊門下

多知名士吳江潘耒秀水朱彝尊雅重之嘗著性理闡周易或

問毛詩箋靈蘭青鳥要旨及勗亭詩集以上紀聞

張其是字文韓號菊岑著有碧草軒詩一卷又著濮川紀略伊郡

伯探八府志

程琦字再韓號芳夔本姓吳天都人弱冠補諸生性嗜潔而志趣

高曠平生剛正不諧俗著有芳夔集陳古銘稱為幽湖詩之後

勁紀聞

濮詣泓字長民號松巖考授州同知少時從鄉先生稟學一出口

驚其儕偶及長謂蘇子瞻教秦太虛多著實用之書於是購六

經子史宋元人名集以及天文地理山經海志句股醫卜之書

靡不蓄考校魯魚寒暑吟哦他人笑之弗顧也掃地焚香慕韋

蘇州逸致圃花放招友抱琴取醉賦詩倡和言談竟薰文且慷

慨喜施三黨中藉以婚姻火食如胡允聞楊譽青與公為中表

孫其章則內弟也公交譽青最厚重義通財雖傾囊不惜允聞其章均艱嗣公爲允聞置妾其章娶婦以延其祀身後猶撫其遺孤飲食教誨無虛日其他表彰風雅不遺餘力族澹軒先生集行世久恐集板散失償其工移貯家塾中公性恬淡足跡不一履公庭邑大尹及闔邑紳士舉公鄉飲大賓者再謙執不赴年七十二而卒建寧太守李公汝霖銘其墓子光孝考授州同知著學圃集刻入濮川詩鈔孫梁庠貢生節錄墓誌

陳曾祉字鴻園號心隱少孤博涉經史終夜不倦與蔡九霞盛宜山諸人爲忘年交著有心隱詩集

陳光裕字分佩號謹堂秀邑諸生名噪士林詩古文詞并稱擅場集濮川詩鈔教學鄉黨間所刻惟石墩草荻書樓草所著尙多未刻子猷嘉邑明經能世其學以古直稱以上紀聞

濮川詩鈔四十五卷按光裕與沈堯咨同編所採沈機仲安道濮淙周映康馮允秀沈朗周龍雲陳選勳楊煒楊燮陳曾祉張其是徐嘉沈履端鍾梁周甸周駿陳樂濮光孝徐晞張宏牧楊炯曹士勳陳梓張宏範潘亮程琦沈孔鍵沈鍾泰釋佛眉寂解三十一人及光裕堯咨二人之詩凡三十三家府志

沈履端字寅備號坦如桐庠生工詩仿坡翁擇勝亭遺意爲花笠

之飲著有竹岳樓草有悼亡詩十六章繡水鄭亦亭青堆周自

潭為之跋 紀聞

漢 洙字聖源號葆真四壁奇窮三餘苦學下榻秦溪溪人士多
樂與之遊辛未秋父懶翁先生歿毅然曰送死大事也敢不竭
力無奈囊空鬻身從事并奉五十餘載淺土之母棺而合葬焉
盛宜山作慈孝行序云懶雲先生不娶撫孤葆真道兄鬻身葬
父皆古來不數見之奇行也 誌略

周 暎字且雯號緩菴私淑張履祥講道一宗紫陽樸實力行為
務得古籍及先儒緒論晨夕不釋手詩不多作梓緩菴詩鈔數

十首捐資葬張履祥士林多之子世堯字欽表弱冠餼于庠稟
庭訓務實學貢成均以疾不赴選 邑志孫德鈞字以年庠生曾孫
惟準字易書庠生紀聞云緩菴嘗與范巨川陳古銘拜張楊園
先生出古鼎爇香焉好書籍古玩得佳硯每自製銘勒之詩有
順寧樓集

徐 嘉字端木有得月樓詩集其子樹璧號借亭亦善詩嘗與古
銘南谷諸公結玉山草堂菽乳詩會古銘為之序

徐 晞字若初有赤巖集其口占一絕云橋李城南是舊廬秋闈
十戰已成虛今遷寶帶湖千住惟讀三秋五葉書

顧惕菴佚其名在岳家兜陳謹堂結社於濮川惕菴與焉程再韓稱其文似元次山詩似晁无咎年僅四十九而卒

周 甸字鎬瞻本姓濮著有嶧山集以上紀聞

張授麟字素臣號聽松考授州同知善畫松梅尤精畫貓若花鳥蟲魚之類濃塗淡抹姿趣各具嘗於書室粉壁自寫大松次微畫小松並精絕遂顏其室曰聽松書學大米其題款亦道勁有

法

張宏牧字恕夫號懶髯能詩文工篆刻師事眇狂而論識過之凡篆法悉本六書有圖章粉本一册自篆者八百方并唐宋元明

前後五代墨鈎印二册摹名人者二千餘方其用功如是注篆

學津梁一卷增注篆韻二卷篆法行楷俱工詩曰懶髯集以上

陳元星字南光號鏡庵考授州同知著有鏡庵詩鈔子容字度注

號澹村太學生延濮子眉山繪其各祖遺像曰世德圖至今子

姓奉為家珍案字俞讓號晴沙桐庠生博涉羣書兼工書法年

僅二十而卒聘濮氏未婚守志春字字柱中號紉蘭庠貢生著

有自怡軒集孫若奎秀庠生若鈐太學生家譜

濮祖型字元芳號慎夫又號麗邨工詩倡和皆知名士著有竹石

居咏物詩四卷家譜

沈履豐字餘三號卓菴有訓子家言漁山詩集家譜

濮 梁字山儲號井南庠貢生父諱光孝字行先著有學圃集刻

入濮川詩鈔公淵源家學好客廣交與諸名士相倡和遍遊山

川吟咏甚多家本富公性慷慨一揮千金暮年一貧如洗晏如

也壽八十餘著有學圃印藪陳謹堂為作序世居南橫街漁艇紀聞

沈鍾泰字虞尊桐諸生早卒其師陳謹堂為刻其荻書樓遺草一

卷

濮履中字丹葵號又和好吟咏嘗有濮川景址詩五十首年八十

自為七律四章索同人和贈內一聯云命不如人甘守拙天猶

困我豈關貧其寄慨殊深

沈孔鍵字南谷海鷗曾孫著有柴門集小羅浮山人詩鈔以上紀聞

濮 炯字電飛桐邑諸生自少篤學名噪士林棘闈薦而不售年

僅三十五而卒漁艇紀聞

李枝升字嵩亭府庠附貢生屢試不售遂肆力于詩自歷金陵山

左江楚諸名境詩稿益富有白下霞山容江江漢雙江閒居諸

集晚年病目猶自吟咏不衰有以詩請質者聞聲點易靡不嘆

服因自號聽翁而所著詩曰心稿瑣志

仲山含字方岳改庵先生之孫與屠廉使葉松山孟天叙張霽陽

諸前輩切磋最久所學有根柢瑣志某科文已中式填榜時因額

溢抽去

濮景修字敦學號致軒桐廡生試輒高等學歐書有法推重一

時瑣志從弟柱字天擎試輒冠軍甫食餼遽逝長子顥字桐初庠

生鄉黨有不平事輒為之排解人服其公正次子寅字斗初庠

生早卒

朱樞字秉鈞秀水諸生幼時授書日誦八十行長而肆力詩古文

從鈕西齋陳古銘兩先生遊學益進又嫻探著兼嗜草書年僅

三十有五而卒古銘為作傳有遺詩文一卷子廷琛字寶也庠

生工詩

周德鎮字宗岳鍾銓字道曾曹士烈字觀揚皆庠生周試輒前茅

屢薦不售乾隆己亥科房師含淚評其遺卷子惟洪字治中庠

生鍾經術湛深薦而不售曹亦有聲譽序以上漁艇紀聞

呂坤字方大號尚坡桐邑廩生家貧力學有和朱檢討鴛鴦湖

權歌元韻一百首為督學朱文正公所賞又著尚坡集蕩船草

藏於家邑志

濮又華字純夫號仙壺又號他山桐廡生鍾肇封字鎮川號古山

又號蕙畝秀庠生皆工詩文尤精書法濮學松雪鍾學歐書瑣

志云乾隆丁丑桐鄉縣試大令陳虞盛聘請歸愚沈宗伯閱卷時賈繩武濮純夫歸珍三人歷試迭占三名之內遂有賈濮歸之稱

漁艇紀聞

王士竣字涵之號半痴菴堂先生之孫早歲遊庠一時有才子之目未娶而卒著有峨眉山人集

沈元勳字濱載號蟠山桐邑諸生著蟠山韻鈔未竟而卒

鍾錫齡字行可號省園桐邑諸生能文工詩兼精句股惜不永年

其父杏村司馬刻其集曰小山山房存稿

曹晉墀字颺對號僅園邑諸生與弟承垣字亘三號薇客同潛心

舉業而皆早逝其父雪橋廣文刻其遺稿曰二苦合存

卷

明員

折名



著述

欽定四庫全書總目所收及伊郡伯府志所採謹錄以誌人文之盛外此書已付梓或成而未刊另列各人條下

元鮑恂學易舉隅三卷 易大傳義 卦爻要義 西溪漫稿四卷

明貝瓊中星考一卷 清江文集三十卷詩十卷

四庫全書著錄 總目曰兩

浙名賢錄載貝瓊集二十卷明萬歷中所刻乃止三卷此本凡

詩集十卷文集分海昌集一卷雲間集七卷兩峯集二卷金陵

集十卷中都橐九卷歸田橐一卷僅有鈔本 貝氏族譜 杭氏

流傳康熙己亥桐鄉金檀購得之始為刊板 自序 瓊 貝翺舒庵集

江漢月下清遊集 嘉六徵獻錄

朱綬易經精蘊二十四卷 四書補註三卷 清溪草

楊述蘭谷集四卷

馮致貞節錄 明儒要錄 寧儉約 古今將略四卷 四庫全書存目

朱茂曜徵夢錄 惟木散人藁

岳元聲聖學範圍說一卷 四庫全書存目 易說三卷 潛初子

集十二卷 淡漠集二卷 田糧沿革年譜 三邑錯壤說

盛楓曰元聲家居熟悉鄉井利弊嘉善民倡為糧浮田虧之說乞割嘉秀田以益善元聲力持之著田糧沿革年譜三邑錯壤說巡撫以聞詔如故後復核率莫能易其議

岳和聲大成樂舞圖說一卷 辛亥京察始末八卷 續駘鸞集

嘉興仁文書院義田記

岳駿聲闢宮始末一卷 秋窗偶拈一册

陳其德垂訓樸語一卷 四庫全書存目提要垂訓樸語明陳其德撰字太華桐鄉人據卷中災荒紀事稱

生於萬歷初年而作記於崇正十四十五年則明末之人自序稱首蓓多年則嘗為學官也是書皆勸善格言附以遺詩十首卷首同里後學編校而劉去其名未喻何故

國朝陳光裕輯濮川詩鈔三十五卷 四庫全書存目提要濮川詩鈔三十五卷浙江巡撫採進本

不著編輯者名氏所載濮淙滄軒集一卷沈機梅涇集二卷沈朗恬翁集一卷馮允秀梅花逸叟集一卷楊燁雲竹集一卷楊變勗亭集一卷楊炯南遊草一卷周映康雪芸集一卷周龍雲懷孟草一卷周甸嶧山集一卷陳選勳藍染集一卷徐晞赤巖

集一卷徐嘉得月樓集一卷張其是碧草軒集一卷陳曾祖心
隱集四卷沈履端竹岳樓草一卷沈堯咨晚盟集三卷濮光孝
學圃集一卷程琦芳嶼稿一卷陳樂故鄉草一卷曹士勳萍梗集
一卷鍾梁來霞集一卷陳粹容星零草一卷潘亮一得吟一卷張宏範霽
宏牧嬾鬚集一卷沈鍾泰荻書樓遺稿一卷寓硤草一卷石墩草一卷張
陽集二卷沈鍾泰荻書樓遺稿一卷觀張宏範霽陽集後有陳春宇
龍潭集一卷凡二十九人之詩鈔而陳光裕荻書樓稿前題曰
跋稱從祖謹堂公選刻濮川詩鈔而陳光裕荻書樓稿前題曰
謹堂集是編殆即光裕所輯歟

施博姚江淵源

濮淙半閒樓集

莞雪居草

月巢草

蘧園草

機梅涇草堂集

鷓笑軒詩四卷

桐志

云道增定史韻四卷附讀史小論一卷

浙江採集遺書總錄
國朝桐鄉仲宏道因

明趙南星原本而增輯之趙書始漢終元宏道為補帝王世紀
迄秦紀于前而續明紀于後各以史事編為韻語而注其下又
首卷考傳統建都分野田賦戶口等類末卷附讀史
小論皆仲所增意在撮其要以便記誦云 潘末序

子來堂集

改庵偶集二十卷

李邑侯縣志云桐鄉前志仲宏道
著又覺悔集四卷理嶧拙言四卷

翟枚吉蠡洲詩鈔

楊煒桐鳴小草一卷

雲竹詩集二卷

楊燮易論一原一卷

周易或問一卷

勗亭詩文集八卷

張其是碧草軒詩鈔

鄭世元耕餘居士詩集二十四卷

沈德潛曰耕餘詩未嘗求新
立異而留次高朗卓犖可觀

屠嘉正恂齋文集八卷

別集八卷

朱公珪序略曰恂齋先生詩
古文講畫利病如指諸掌

陳梓四書質疑五卷 一齋文集十二卷

沈孔鏡小羅浮山人詩鈔 以上府志經籍

濮川紀略二卷 桐鄉張其是文韓纂

濮鎮紀聞六卷 桐鄉胡琢其章纂 以上府志舊志序錄

濮川殘志 濮侶莊道水輯

濮川誌略七卷 濮孟清子澄叙輯濮煬草堂刪定濮翰圻景駕校

重校濮鑿雋茹參閱濮龍錫

嘉禾百詠 九上增定濮洙聖源重校 以上府志採入古蹟

織作

崇德桐鄉植桑飼蠶次于茗雪 宏治嘉興府志

南宋淳熙以後濮氏經營蠶織輕紈織素日工日多元時濮明之

立四大牙行收積機產遠商雲集爰有永樂市之名明隆萬間改

土機為紗紬製造絕工濮紬之名遂著遠近自後織作尤盛 濮川志略

嘉錦之名頗著而實不稱惟濮院所產紡紬凍絲熟淨組織亦工

是以一鎮之內坐賈持衡行商麇至終歲貿易不下數十萬金居

民藉此為利益由勤以致之也 浙江通志

盧存心嘉禾雜咏宋錦人傳出秀州清歌無復用纏頭如今花

樣新翻出海內爭誇濮院紬

又濮院詩千家鴛杼各紛紛翦下鳴機一段雲花樣簇新常在

眼試看吹皺濮川紋 按濮院紬見于題詠者鄞萬斯同竹枝

詞云獨喜村村蠶事修一村婦女幾家休織成廣幅生絲絹不

數嘉禾濮院紬彼時自誇其鄉之所有耳亦可見濮院紬之得

名久矣

委巷之中接屋連檐機聲盈耳里人業織者多矣詢以杼軸之法

經絡之數一絲一縷有序有倫居其地者類能言之其先務曰絡

曰搖緯皆婦女事亦有男子為之者繼曰寧經曰運經曰刷邊

其授之機軸也曰織手曰拽花織既成而售之有紬行居間者曰

接手鄭世元竹枝詞注每紬一疋接手取銀一分或分餘不等謂

釐頭收佐助者曰看莊曰修紬售既定而熟之有凍坊傭者曰凍

手皆男子事紬音壽許氏說文大絲繒也顏師古急就篇注抽引

總名然則紬亦可謂之繒今紬字或作綢者非綢音儔詩綢繆毛

傳訓纏絲又綢直毛傳訓密直楚辭蕙綢王逸訓縛束皆與紬字

義別禮記綢練爾雅綢枉俱讀如韜與紬字音義皆別紬與綢不

得混而為一也練通作凍周官染人曝練注練其素而曝之考工

記荒氏凍絲說水是也又說文凍繒也玉篇煮漚也
絡絲之具四用木二長二尺許木中銜小木一穿方孔將所銜木
插入孔中以便展合用竹八長可五尺分立兩木上藉以綳絲謂

之絡肚壁間起竹繩繫其中墜以磚使竹軒昂於空中竹之顛設半鉤引絲謂之挑頭削木片六厚三四分廣一寸作米形分兩頭其旁圍細竹六以受絲謂之篋子篋通其中插以木柄長二尺許謂之掉梗一人左手拈絲右手持篋柄旋轉指間使其絲環繞而上是為絡絲亦稱掉絲通俗文云張絲曰棍蓋以脫軒之絲張于棍上軒即纜車棍即絡肚也又云上作懸鉤引致緒端逗于車上懸鉤即挑頭也農桑通訣謂此方用絡車南人但習掉篋取絲此所以名曰掉絲歟

張宏範幽湖竹枝詞可憐辛苦絡絲娘趕經催絨日夜忙歇得新絲一个月男鞵女襪費商量

遙緯之具二木架似木棉紡車而小謂之緯車用細竹管以受緯

緯盈其管浸水盆中俟織者取用謂之緯子絲有經有緯有絨絡

時逐一分記既滿篋一人搖之其聲似絡緯蟲鳴是為搖緯揚子方言

緯車趙魏之間謂之力鹿車東齊海岱之間謂之道執又通俗文云織織謂之緯受緯曰筭故緯車又為維車維音碎說文云着絲於筭車也筭音孚說文云筵織緯者筵音庭說文云維絲筵也筵音管說文云筭也然則筭者其今之緯管歟又據諸書則橫木立柱輪而掉之者為緯車著絲于筵著筵于車踏而轉之者為紡車今有緯車無紡車而搖緯亦可謂之紡

牽經之具三用四木橫二各二丈直二約丈許直木各有齒層累

而上謂之經竿亦謂之扒頭用一竹橫挂空中列鉤于竹謂之撩

眼編竹為櫺木周其四旁大尺餘謂之經窗以所絡之經篋布竹

下引絲鉤中入自經窗復分其緒兩人牽繞木齒橫經其架是謂

牽經三才圖會六經架牽經具也先排絲篋于下上架橫竹列環以引眾緒總以架前經簿一人往來挽而歸之紉軸按此與今制無異特牽者有一人兩人之別耳其云經簿者殆即所謂經窗也

運經之具二以木架置兩處上安機軸相去數丈謂之經床以所牽之經橫布機軸上用木爲梳似經窗狹而長用漿粉梳之良久復轉軸以次收捲是謂運經

刷邊之具一似經窗而小以木爲之謂之邊梳以絲橫經空處一人持邊梳以絲穿其中往來刷漿粉使勻是謂刷邊紉之兩邊所用也

機長二丈許堅木爲之首安轉軸去地咫尺中漸高尾長而削掘地作坎垂以竹軸之前橫竹半面織者坐其上持梭左右擲旋擲旋推機與身俱動兩腳相繼踏竹軋軋有聲輕紉日一疋重紉三四日一疋機之器具凡數十不能一一名之也

鄭世元幽湖竹枝詞機坊今歲竟如何絲價平平貴不多昨夜鄰家能快活手拋梭子唱山歌張宏範幽湖竹枝詞今年生意勝前年織挽工錢總要添東手接來西手去果然梭子兩頭尖機上有木架謂之花樓一人坐其上兩手按花樣扯拽之令開合其絲梭挑越而過則絲浮而亮湊合成花或疎或密皆畢肖是謂拽花

紬既成有接手持詣紬行售之每一紬分値若干謂之用錢紬行日向午赴市收紬謂之出莊其善看紬者謂之看莊歸行再按謂之覆莊紬有絲頭未淨者紬行雇人修剪為修紬以生紬付凍坊每坊傭者數十人名曰凍手煮之漚之曝之炙之而生者熟矣

紬之名重曰界本曰素本輕者曰素長輕重適中者曰大西曰改機有花有素

紬行之名曰京行曰建行曰濟寧行曰湖廣行曰周村行各以其地所宜之貨售於客客賞謂之行李以上濮院志

閨範

元糜正妻張氏年二十六夫亡矢志不二孝養舅姑教二子為儒詳貝瓊糜母節孝傳 府志嘉興縣

司令濮允中號樂閒妾汪氏名佛奴樂閒死誓無二志獨居尼寺

以潔白終

按樂閒公元季仕承事郎兩淮鹽使司令

明濮貴一

元漢鑑次子

妻劉氏年二十八夫亡誓不踐二庭孝事姑嫜

教子成立洪武二十六年旌建坊大街東朴樹灣

崇邑庠生濮宗海妻劉氏二十八歲宗海歿值元末盜起民間艾婦輒遭淫掠劉屏膏沐同農家婦躬督桑麻暴卒過其里皆不

顧而去事姑育子孝慈兼至洪武二十一年詔旌建坊時有濮節婦詩編學博徐一夔作叙傳之

按濮氏譜略濮宗海係彥愈子劉氏貞節坊建於鎮之市街非貴一妻或併作一人誤

濮九娘某氏女也明初歸濮勤事組織膏操家廢居三十餘年累資盈萬永樂時誅戮楊忠烈嫻族濮氏星散九娘嘆曰安有翁姑夫壻骸骨俱埋本土子然女流乃向他方托處乎悉以家業分給貧親施捨梵宇建修橋梁築數椽於墓傍長齋誦佛以終至今鎮中有濮九娘橋

濮彥仁字仲溫妾龐氏唐氏仲溫公元季仕吳興典市官永樂初窮治靖難諸臣仲溫以楊任之戚並坐籍其家二氏俱自經一門雙節貝瓊詠詩以稱之鎮西唐夫人橋有雙節塚鮑文化妻濮氏年十四歸鮑夫歿歲荒無養族人以少年無出欲奪其志氏知之卽縫紉投河以殉事聞勅建貞烈坊嘉靖年事以上府志叅誌略

濮梅菴繼妻楊氏年二十七而寡有二子一僅八齡一僅周歲茹苦歷艱撫子能教長卽抱真以詩文冠江左萬歷甲戌司理張公瑀上其節於監司而表揚之郡守劉公應鈞修輯郡志與陸

節婦合傳焉

別駕濮翰圻

天啓間由雍貢授別駕

繼妻鄒氏夫亡訓孤茹荼操作歷數十

年如一日壽八十有八許郡侯煥旌其門曰寶婺流輝

以上誌略

濮達字直齋妻馮氏夫亡守節孝養尊姑撫遺腹子芳成化中事

濮文昇妻某氏文昇早逝永安祠基糧係氏完辦每至許訟氏率

子名鉞匍匐公庭得復故地賢能尤丕著云

以上濮氏家譜

贈公馮倫妻張氏年二十九倫故遺孤二俱幼熒苦紡績奉姑教

子長孜登隆慶戊辰進士仕至方伯封宜人次敏中翰疏請旌

揚詔建貞節坊坊建桐邑治西壽八十四太倉王鳳洲作馮節

婦六表詩序墓在鎮之集秀菴西方伯之裔簪纓極盛俱由濮

遷邑所稱馮家河是雍正初年遷居郡城而中翰之後仍居濮

鎮桐邑志參紀聞

馮坤妻夏氏秀邑人夫亡孝事翁姑嫠居五十年撫育其孫夢楨

課以詩書丙夜治女紅相對一鐙熒然夢楨學成舉南宮第一

氏封淑人

按紀聞等書馮公夢楨不載鄉達中疑非鎮人

鍾鐸妻呂氏鐸居鄉讀書好善誤為耕犁所觸遘疾而亡

府志云呂年二

十呂氏苦節七十餘年壽至九十九嘉靖二年題旌後以上壽

復得邀寵錫故其居有雙旌堂之額

劉尚文妻孫氏年十七適劉三載而尚文卒撫孤守規

府志作廷

圭成立守規歿媳沈氏亦年十九矢節時有雙節之譽次子廷

圭克振家聲孫驥邑庠生

劉守規妻沈氏

詳上

仲應鸞妻徐氏年二十一夫亡止生二女未幾次女殤氏攜一女

不辭艱苦貞節自矢卒以壽終

以上桐邑志

濮相妻楊氏夫亡教子成立有司表之

府志秀水縣

曹元甫妻朱氏少寡撫孤泰寧又早世媳歸氏亦守節人稱姑媳

雙節

曹泰寧妻歸氏

詳上

周思誠妻曹氏年二十八思誠卒遺孤應驥應驊俱幼氏撫孤成

立應驊子璋瑄俱遊庠應驥病卒無子妻王氏亦勵冰操

周應驥妻王氏

詳上
以上桐邑志

濮應麟字梅涇繼妻羅氏苦節隆慶間特旌子一元齡

瑣志

庠生鍾應宮妻呂氏宮積學敦行爲鄉里冠以王事卒於京家產

日落時諸孤尙未成立姑壽九十有五氏奉上撫下各盡孝慈

子貞游庠次彝鳳翔司理次超濮州太守並有廉辨稱

庠生鍾鴻是妻高氏年十九夫卒誓以身殉姑再三慰勉服未闋

絕粒死邑令王旌之 以上桐邑志

府志云按桐鄉徐志載高氏御史高欽舜姪女適庠生鍾鴻是年十九鴻卒云云吳志亦作鍾鴻是惟通志於前明既載鍾鴻是妻高氏于國朝又載鍾鴻妻高氏事蹟俱同是必一人誤為兩人也

張節婦濮氏年二十歸張踰年夫死氏家欲謀嫁富室艤舟鄰村以探親給之往氏堅執不從謀遂寢尋抑鬱死施于海傳云天

啓間事

顧令侯妻吳氏九霞先生之媳年十九夫亡守節三十餘年嘗居止一小樓歲時拜舅姑外不見親戚亦不歸寧僮僕罕見其面病革時指所坐木椅謂厥媪曰覩此可知一生心事視之而椅

已穿穴矣此恬心守節一身之外俱斬然截斷也

王錫恩妻曹氏年十四適王時遭兵燹氏操家事姑俱有禮法十九歲稱未亡人撫姪王者治為子有聲鬢序卒年五十六臨終時誦諸相非相即見如來二句 以上紀略

蔭生岳冲妻沈氏年二十一夫亡遺孤杖又歿時遭兵燹艱苦備嘗守節三十五年 府志嘉興縣

文學濮泖妻錢氏夫亡止一女苦志守節歷四十餘年卒

濮雲寔媳都氏深知大義閨中之傑出者 以上誌略

國朝仲九霄妻山氏秀水山翠峩女及笄贅九霄徽柔勤淑不減孟

光生子宏道幼善病孺人密爲置側室冀廣嗣續雖終無他出而嫡庶並無一言順治三年九霄病故孺人一慟嘔血數升不數日亦身故以子宏道貴 勅贈孺人 桐邑志

呂貞女學博介華公季女年十七許字秀水諸生濮九上先是九上娶呂氏生一子而厄於產九上憑其棺告之曰吾力撫汝子終不使汝子呼他人母越五載九上母鄒孺人聘貞女時九上下帷蕭寺殆無聞焉結縭之夕始知之而匿於祖塋之舍戚族挽以歸勸以勉遵母命慘焉不怡終不成禮居歲餘弗面也貞女感其誠慨然曰夫婦爲人倫之始從一而終彼旣甘爲義夫

我獨不能爲貞女乎遂賦歸寧長齋繡佛日晡金經藥師普門品一過卽織絰以供膏火呂氏族戚有謀奪其志者貞女之死靡他髮不澤而衣不解者歲餘忽遘羸疾而卒嘉興呂孝廉黃鼎 順治庚子舉人 爲作傳

董崙妻邢氏桐邑人年少而寡勤儉操家積餘貲蓋造房屋撫教二孤長爲娶媳順治癸巳學使翟公給玉湛冰壺額 以上瑣志

歸烈婦王氏夫字慧卿桐邑人府志云氏年二十一夫亡無子次日卽投繯柩側二棺並發觀者無不泣下郡守潘世奇爲之傳紀聞云康熙八年事

沈孝婦周氏沈峩山妻姑年衰病隔氏斷乳乳姑姑疾以瘵癸未二月里中訛傳兵至峩山館于外周侍舅舅命攜兒避他所氏曰舅在新婦焉往卒不去峩山歿子孔鍵三十未娶外氏請婚子服未闋氏固却之女歸桐鄉徐乘龍乘龍早亡誨女守節姑母姚氏無依迎養于家姚歿哀毀卒年六十八節錄陳古銘撰沈孺人傳庠生沈方岳字方聞繼妻項氏守節四十年桐邑志云氏年二十七夫亡誓守苦志歷翁姑及夫若子五喪葬皆合禮節土寇竊發里民爭徙匿氏謂家人曰寇至吾則死耳終不出閫教子履端入泮學使顏公光敷給額曰節孝維風

孝廉濮鏊妻陳氏謹執婦道孝養翁姑孝廉歿撫子婚配以耕桑

苦守二十餘載鏊康熙丙午舉人 誌略

州同濮詣泖妻孫氏華陽公之女侍姑疾十年左右調攝卽厠牖

亦身自洗滌未嘗有難色 節錄建寧太守李公汝霖撰墓誌

翟貞女庠生翟堯相女許字楊煥年十九煥天聞訃奔喪截髮明

志立煥之姪大培爲後康熙十九年事守節五十五年 桐邑康志

熙五十三年題 旌府志秀水縣

俞某妻倪氏康熙五十九年學憲汪公澹給績勤裕後額

沈壽母潘氏沈廷鈺之祖母沈海鷗有壽九十詩

張壽母文韓先生母碧草軒集有壽九十詩

壽母莊氏年九十有九強健如四十五人猶勤紡績去百歲無

幾而終其壻顧子昭年八十餘猶赴人家夜宴以上紀聞

孝女張惜惜張乾之女五歲喪母無兄弟父女相依十載父得病

疾女侍湯藥甚謹父病篤目不交睫者逾月度父病必不起恐

以已貽父憂預為父整衣衾告其父遂不食先父死父撫其屍

上下衣裾針縫密整又具數日糜以遺父越三日其父亦死友

人葬於其先塋而以女耐焉入舊浙江通志

沈文瓏妻劉氏瓏歿事舅姑以孝率羣下以勤教子鳳翼與明經

選桐邑志雍正五年題

旌入節孝祠大吏給額曰柏節松年府志

陸烈婦張氏蠟作街張載皇妹幼字閔家兜陸氏子年及笄陸氏

子病以俗例冲喜成婚後即分榻臥日夜侍湯藥衣不解帶者

逾歲夫病革預縫衣履既屬續即飲滷同牀而死所謂生不同

衾死則同穴氏無愧焉此雍正年事也瑣志

沈子才妻濮氏適沈三載夫亡家貧無子依于母族年八十卒府志

桐邑志云按仲志節婦暮年髭髯忽生長數寸無異男子

施穀鍵妻張氏秀邑人庠生張泮女也結縭甫五載夫以讀書攻

苦病故氏年二十四遺孤二翁相年課徒外不善治生氏茹齋

苦志日夜操作上以孝養其翁下以撫育兩孤艱苦備至年四十八病革命其子於海曰吾不能終事吾翁無以見爾父于地下無令戚黨請旌於當事也

生員沈焯妻濮氏年二十九夫亡事翁姑克孝撫遺孤甄塏俱遊

庠守節四十七年乾隆三年題

旌桐邑志

紀聞云韓慕廬宗伯

贈畫荻遺徽額徐志云開鎮雲孫瑞源女

贈中憲大夫屠有禧妻董氏年二十六夫亡撫二子二女成立子

女又歿復撫諸孫督課嚴而有法族黨欲請旌董聞流涕曰吾分固宜耳豈以博名耶乃寢年七十七卒以孫嘉正貴 贈恭

人

贈中憲大夫屠永貞妻徐氏貴州按察使屠嘉正之母徐為桐鄉望族年十五歸屠事孀姑盡孝養者數十年永貞歿以身支門戶教諸子嚴而有法既仕猶諄諄告誡雍正七年嘉正以刑部員外出為廣西知府

陸辭日陳情歸省

世宗憲皇帝垂問及母年

賜貂皮香珠

封太恭人乾隆三年就養於福建糧道署年六十有七卒以上府志秀水縣

陳延緒繼妻孫氏桐邑人年二十四夫亡撫前氏子曾裕早世又撫遺孫守節六十一年邑令顏其堂曰錚錚女士乾隆四年題旌載府邑志按紀略延緒字允長繼妻孫氏終身默處待家人如賓客年七十猶兢兢如處女藩憲蔣邑令郭金湯廣文鄭吉士俱給額崇獎

生員鍾朱鼎妻莊氏二十九歲夫亡寢食靈側三年如一日撫子汝漢能自樹立孝友克家守節四十一年邑令何金蘭給扁曰柏志松齡乾隆十年曾孫元文請旌

夏延祚妻姚氏年二十五夫亡敬事舅姑子溥甫週歲教之有成

名列庠序守節二十九年乾隆十年題

旌

以上桐邑志參紀聞

秀庠生朱承溪妻陸氏年二十八夫亡誓不欲生翁姑泣慰之乃

縞素終身足不踰閩守節四十六年

府志

向居正家橋塘南值明

季流離困苦孤年十三爲盜掠去一夕大雪伺盜醉潛逃乞食

歸見母母方慟哭幾瞽孤日舐之始愈卒年七十五孤字玉亭

遷於鎮孫天成曾孫載揚聖言乾隆十二年題旌建坊於墓

節錄陳古銘撰朱節婦傳

朱節婦楊氏曹孝廉鉉之祖母孝廉本姓朱婦有紡績課孫圖錢太

傅有題辭

方苞撰朱節母傳云鉉于丁卯歲舉賢書請旌按邑志楊氏朱繼芳妻年二十八夫卒守節四十一年乾隆十三年題旌

庠生方奇妻潘氏姚江庠生映碧女年二十九夫亡遺孤殤撫嗣
子氏茹素終身樓居二十年乾隆十二年題 旌建坊入縣祠
學使彭公始搏給扁曰姜孟同芳

沈雅恒妻曹氏雅恒善鼓琴二十餘歲亡氏撫子女成立婚嫁悉
取辦于針黹壽逾八旬

濮景臺妻沈氏年二十而寡家貧躬自勞苦孝奉翁姑撫子女成
立子死又撫訓幼孫壽七十學憲王公給扁曰挺節凌雲

濮紫衡妻沈氏夫亡貧而無子苦節自甘翁姑喪葬盡禮復耐其
夫于祖塋皆十指紡績所蓄仲改菴題為女申丈夫 以上桐邑志參紀聞

蕭貞女幼字朱鳴盛未婚而朱卒易服登門朝夕擗踊姑憐其志

以長孫克紹為之後守貞二十載 桐邑志 府志云年四十歲卒

庠生濮泮妻呂氏年二十九夫亡遺孤甚幼翁姑年邁而姑又瞽

目 府志云翁令呂嫁不從 氏極盡婦道生養死葬無不合禮遺孤將成立

又天立族子鼎鉉為嗣撫孫涓遊庠守節三十餘年 桐邑志參紀聞

沈節婦濮氏濮澹軒之姑二十歲夫亡守節依父族歷四十九年

苦志以終澹軒得氏撫育曾請當事表揚 紀聞

周玉涵妻徐氏年十九夫亡撫遺腹孤成立年六十一卒

歸泰初妻張氏年二十二夫亡撫遺腹子成立守節五十年 以上府志

桐鄉縣

施節婦張氏按紀略施京扶傳先生所遇多艱令嗣立三早喪長

孫天其早亡節婦張氏慈孝性成

紀聞

曹鏡妻張氏年二十四夫亡遺孤天御弱冠而天媳沈氏年二十

寡姑念家貧無後令改適沈矢死不去守志奉姑里中稱雙節

張年八十二沈年五十九

曹天御妻沈氏

詳上

沈之楨妻馮氏結褵八載楨卒遺二孤尚幼氏年二十有五斷髮

自誓訓子劉汾遊庠卒年六十八

以上桐邑志

沈貞女沈思皇女許字秀邑錢維垣未婚錢卒心喪三年畢欲絕

粒以殉屆壬子歲朝沈不起父使其姊問之沈於枕畔出自誓

文一篇父母知其志不可奪令其過門廟見以成婦道沈請於

翁姑立嗣撫之里人賦詩以記其事陳古銘有秀州沈貞女詩

邑令王應期表之郡邑志俱載

沈某妻鄭氏青年矢節

以上紀聞

徐貞女父晨山自幼訓以詩禮長能詩許字沈氏子父病篤撒環

瑱以奉湯藥父歿越半載沈氏子病故徐年十九

府志作十八

訃至

欲奔喪阻之不可往視含殮誓守終身夫叔母鄭故守志喜曰

此我同心人也遂聯榻寢處徐初歸沈即取舊所作詩草摧燒之或傳其立夏日哭父句云不知地下逢今日也有青梅佐酒

無節錄陳古銘撰徐貞女傳按府志又載沈世勳聘妻徐氏年十九聞訃至夫家易服守

喪紡績以養舅姑姑病侍奉甚謹撫夫從子恪庭為嗣乾隆三十一年題旌

沈貞女幼字鍾天祿之子年二十六未婚夫亡矢志守貞夫家以

禮迎歸拜廟受笄足不踰閭者三十六年乾隆十八年卒紀聞

鍾鼎鈺妻曹氏年二十九夫亡守節子煥甫三齡孝事翁姑教子

成立年逾九十五世相聚學使者旌其門曰柏舟繼美

夏貞女為沈星來之弟養媳不容於繼姑其夫某恐逆繼母意遠

出女誓不他適後某間道歸得女守貞貞耗便飄然去終身不一

見女守貞以老以上桐邑志

徐烈婦本姓馮桐邑徐偉長家婦起敬之妻也父季長止生一女

年十七適徐甫兩月起敬卒烈婦多方尋死咸以救得免庚辰

三月請於翁親祭徐氏祖塋至夫厝所撫棺慟絕五月六日忽

見其夫來前自後悲啼不止季長峻言勸之即服瀆死時年十

八鄭世元有挽徐烈婦百韻詩節錄徐烈婦傳撰傳失其名

劉貞女劉讓木女名有姑許字鍾生未婚天女聞不言而神傷父

母婉諭之閱半載更許字方而女旋病謂母曰病死勝尋死母

勿悲試舉一字令女測遲速指案曰碗女嘆曰我心匪石不可轉也宛其死矣當在今夕是夕果歿年二十二節錄陳古銘撰劉有姑傳

沈烈婦項氏桐邑沈載錫妻年三十夫亡無子女服滿以殉前後祇數刻間載郡邑志

夏節婦夫亡撫子至十七歲子死婦哀怨哭泣嘔血數升死見鄭耕餘詩註

陳嘉齡妻朱氏朱聖成女嘉齡秉姿絕人髫年卽淹貫經史甫弱冠而天無子氏青年矢志飲茹冰蘖者三十餘年見朱光祖撰

陳禹錫先生傳嘉齡禹錫子

贈公方闡然妾范氏寄姓季年二十餘贈公歿矢志撫子汝舟守

節五十年梁蕓林相國贈文云爲妾者未嘗束縛以必終而竟

以節顯此其節爲何如乎桐邑志參紀聞府志云氏年二十一闡然死

邑志又載方闡然妻范氏年二十九寡撫孤汝棕入成均守節四十九年

吳烈婦胡氏爲善奕吳遠公孫婦夫號雲海早卒翁姑欲奪其志

先溺其女遂自縊遠近詞人爲賦詩立傳助錢葬陡門塘畔紀聞

沈時甸字吳山妻朱氏苦節

沈夢槐字文楠繼妻濮氏苦節五十餘年

沈明輔字伯夔妻高氏苦節

沈名揚字振英妻林氏苦節

沈元良字恒可妻鍾氏苦節 以上沈氏家譜

許烈女桐鄉柴窰港人農家女為強暴所逼忿恨自經時年十三
縣令劉公瑄義之為文往祭請於當事表揚焉松陵黃容有詩
紀之載卓行編

徐貞女國學生徐若初女工詩未婚守志其悼亡詩云良玉沉淵
劍化龍人間何處再尋踪傳聞作賦歸天上知在瓊樓第幾重
家貧授弟子以老 桐邑志

王貞女桐邑人許字管氏子府志云未婚管歿守貞終其身

沈烈女陳家木橋農人沈季方女字姚氏子未婚夫死即痛哭不

止自經以殉 紀聞

楊甸英妻曹氏秀邑人年十九夫亡守節撫姪景蕃為嗣景蕃夫
婦歿又撫其遺孤成立茹茶飲蘗艱苦備嘗乾隆壬午秀邑令
爾周孫公贈玉質冰心額壽七十九 府志入桐鄉縣

濮榮妻沈氏苦節乾隆二十二年題 旌 府志

庠生周暄妻曹氏年二十三夫亡守節三十三年非至親不能見
面撫遺腹子世境讀書成立 周氏家譜

桐庠生孔傳偉妻施氏傳偉貧而勤學患瘋疾三十二而歿氏僅

一女母女癯癯朝夕不給依其胞弟長森女長擇壻嫁之畢生
艱苦處之泊如年五十八卒乾隆壬申八月也節錄陳古銘撰孔節婦傳

監生楊煒妻濮氏桐邑人年二十五夫亡撫夫從子肯堂守節三

十九年

桐庠生沈上源字文江妻王氏上源宏聞之次子成婚數月即病

故時康熙六十年五月也氏年二十四身有姪七月歸母家未

兩月生遺腹子元榮字薪傳氏勤紡績茹荼苦撫養成立乾隆

十四年分居花園坊街家漸裕孫曾繞膝守節四十四年以上郡邑

志並載

桐庠生張汝翼字翁山妻徐氏張壽陽之家婦也氏年二十九夫
亡無子止一女守節三十三年

岳恭賢字位中妻及氏桐邑人夫亡守節遺孤年僅六齡撫訓成

立卒年八十有三以上紀聞

府庠生沈震字雨周妻夏氏年二十九寡遺孤欽尚髫齡撫之長

既婚又歿氏與媳蔣孀閨共守苦節終身乾隆二十六年題

旌桐邑志

沈某妻沈氏桐邑人青年守節撫嗣子澹成立沈氏家譜

濮應恒字奕芳妻曹氏年二十四夫亡撫夫兄之次子懷珍為嗣

守節終身 濮氏家譜

濮貞女名蘭州別駕行先公女幼從陳謹堂師通大義許字秀庠

生陳案未婚陳卒訃聞屏華飾矢志不更字陳氏聞之備禮迎

歸為立後時年二十一 節錄陳古銘撰濮貞女傳 氏撫嗣子涵六成立守貞

四十一年乾隆三十九年題 旌坊建陡門塘

桐庠生曹甸繼妻徐氏年二十三夫亡事翁極孝撫前氏子楠及

孫焯成立守節四十一年乾隆四十一年題 旌 郡邑志 坊建

陡門塘

黃履全妻顏氏秀邑人年二十五夫亡孝事孀姑撫五歲孤成立

守節五十三年乾隆四十一年題 旌 府志 坊建陡門塘

濮彩三 府志作采三 妻李氏秀邑人年二十七夫亡守節五十年乾隆

四十二年題 旌建坊陡門塘

桐庠生沈秉良繼妻孫氏年二十七夫亡子女俱歿以族子敬德

為夫後守節三十五年乾隆四十二年題 旌 郡邑志 並載

曹瑾妻張氏霽陽公長女桐邑人年二十四夫亡撫遺腹孤啓豐

成立守節五十一年乾隆四十三年題 旌坊建陡門塘載郡

邑志

俞景安妻濮氏青年守節乾隆四十五年題 旌 府志嘉興縣

濮川所聞記 卷三
濮炎妻沈氏夫亡守節按濮氏譜炎原名榕桐邑志云上事邁姑
下撫嗣子乾隆四十六年題 旌坊建正家橋塘東

濮嘉策字在方妻范氏年二十四夫故子一多病家漸落勤苦自
甘守節四十年無疾而終 旌坊建正家橋塘東

沈天瑞妻吳氏夫亡守節桐邑尊蔡給操凜冰霜額

王士高妻歸氏三十歲寡撫姪爲嗣乾隆五十九年卒壽八十四
監生方章妾范氏年二十九守節撫所生子汝桴號濟川成立七
十八歲終

濮景丹字書廷妻張氏年二十夫亡家貧無子專事紡績以助薪

水善事翁姑年六十三卒 以上紀聞

鍾塤妻阮氏年二十二夫亡足不越閭比鄰罕識其面撫嗣子振

德承祀守節五十三年乾隆四十六年題 旌建坊陡門塘

沈欽妻蔣氏年二十三夫亡葬翁姑撫嗣子源字宗崙入成均守

節四十一年乾隆四十七年題 旌

楊庭堅妻王氏年二十四夫卒遺孤又姪族人以姪步蟾爲後守

節四十八年乾隆五十三年題 旌建坊陡門嶽廟西

楊士發妻項氏年二十七寡孝事孀姑承命撫幼叔比長生子澧

撫以爲後守節四十五年乾隆五十四年題 旌建坊陡門嶽

廟西 以上桐邑志

王本晉妻陳氏秀邑人夫嬰痼疾氏年十六雖成婚禮恒居異室越六年夫亡氏扃戶將縊以救得免父明讓病曾割股以進撫嗣子容度容安成立守貞二十年乾隆五十三年題 旌府志坊建十錦塘

姚申錫妻孫氏桐邑人年十八適姚孝事翁姑家故貧絡緯達旦助夫奉養夫亡氏年二十八哀毀絕粒翁姑勸諭勉進飲食自後翁姑喪葬幼孤成立皆氏竭力圖成壽終七十七守節五十年乾隆年題 旌

杜中揚妻吳氏年二十七夫亡夫弟順洲妻錢氏年二十六寡無子吳遺一子世勲共撫育之吳守節三十年卒錢守節三十一年卒府志桐邑志云二氏執女紅以終事翁姑

杜順洲妻錢氏 詳上

桐庠生莊長春妻陸氏二十七歲夫亡誓不獨生親族勸以奉老撫幼為重氏勉進飲食晨昏紡績奉事翁姑以終天年子二長德馨次德芬德馨聘倪氏養媳過門未婚德馨卒倪守貞以終陸守節二十九年乾隆三十七年卒載邑志

倪貞女幼字莊德馨為養媳年十八府志作十六德馨病故父母憐其

無依欲迎女歸家矢志不從泣告曰此吾家也夫死安歸後奉
夫神主以成禮長齋縞素日勤針黹以事孀姑撫夫弟德芬長
子文蔚爲嗣桐邑志年六十七卒
張元功妻孫氏桐邑人夫遠戍未幾亡家極貧子尙幼艱苦萬狀
族有欲嫁之者氏誓不他適夜寐必引梯置樓上撫子長欲使
遠尋父骨卒以貧不果

曹立仁字體元繼妻沈氏秀邑人年二十八夫亡無嗣撫小叔體
周成立守節至八十四歲卒以上紀聞

秀庠生朱樞字秉鈞妻徐氏監生徐錫爵女事翁及繼姑盡孝秉

鈞樂善好施凡創義塾修橋梁施樽瘞枯放生外如設接嬰施
綿衣給蚊帳需剪裁縫綴者氏不惜身任以省工費年三十六
夫亡子廷琛纔十二齡撫訓成立早歲遊庠廷琛先亡又撫二
孫長晉錫擅譽黌宮次方鎮家聲克紹氏守節四十載乾隆五
十八年卒

岳世隆妻嚴氏嘉邑人年二十六歲府志作三十夫戍山左氏方孕未

幾生錦文撫以成立遠適尋親第二次抱父骸骨歸葬遂有孝
子之名氏苦守數十年壽終八十四以上瑣志

生員葉元棧妻沈氏年二十二適葉未匝歲夫亡遺腹生子涓璞

又天撫嗣子渭瓊成立年六十五卒

府志秀水縣

仲孝女監生仲雲章女乾隆丙申母病篤割股暈絕為姊妹所覺以告母母不忍食遂亡女以哀毀尋卒

府志桐鄉縣

監生蔣汝魁妻劉氏桐邑人年二十八夫亡哀毀絕粒誓欲身殉翁姑苦勸勉進粥糜撫孤四長世城僅髫齡幼尙襁褓教養成立事舅姑以孝迨先後病沒喪葬盡禮操持家政艱苦備嘗守節三十四載嘉慶元年題 旌載郡邑志

黃大成繼妻吳氏桐邑人年二十五夫亡遺孤世昌僅八月上事衰姑下育幼子皆出十指姑歿氏依母族孤長抵家經理家漸

裕年六十四終嘉慶二年題 旌

屠洪業妻鍾氏年二十六夫亡撫五歲孤中柱成立守節三十三年

府志秀水縣

濮沅妻姚氏年二十八夫亡止一女痛不欲生姑泣慰之撫夫弟之子樑為嗣姑病割股以療守節二十四年嘉慶三年題 旌

濮秉恆妻周氏年二十九夫亡遺孤僅百日撫育成立事姑孝姑歿盡哀盡禮守節二十七年卒嘉慶四年題 旌

濮祖垣妻馮氏年二十六夫亡守節四十七年

濮廷鑿妻吳氏年二十九夫亡守節三十年

濮錦妻范氏年二十夫亡成婚僅四十五日工吟咏著有鵲紅集
守節十三年卒

濮廷壙妻倪氏年二十五夫亡遺孤鎔甫四齡後遇痘危倪號于
宗祠願以身代夜夢廷壙以手撫鎔痘乃起及長娶婦汪氏忽
相繼歿遺子女五人倪又為鞠育艱辛萬狀年七十八卒

胡洪妻濮氏年二十四夫亡日勤紡績孝養翁姑撫孤櫟成立年
五十二卒 以上府志

程錦川妻沈氏秀水新城里沈南容女也二十一歲歸程二十九
歲夫亡家故貧以女紅度日苦志守節歷數十年如一日嘉慶

三年卒年七十三歲以堂姪星周為嗣 紀聞

監生唐元吉字載坤妻王氏秀邑人年二十六夫亡遺孤允恭尚
幼門祚衰薄一力支持守節三十八年嘉慶四年題 旌 府志

庠生鍾銓字道尊妻管氏年二十六夫亡撫孤振麟 府志作 遊庠
旋歿復撫孫起賢守節四十六年嘉慶四年題 旌 桐邑志

沈昌宏妻李氏年十九結褵偕夫事舅姑終潔白之養生子朝棟
朝楨乾隆庚辰夏夫病醫禱罔效氏籲天請代早夜焚香以祝
孟秋月吉忽告舅曰婦薄弱不足上感請翁繕疏為助庶有濟
翁弗忍固請乃從之氏奉疏急詣東嶽神案哭禱歸越五日氏

無疾逝而昌宏瘳年二十五邑人馮浩李枝昌俱立傳以紀其

事桐邑志督學朱文正公給孚誠表烈額縣學俱給額表揚四方

士咸繫以詩氏子朝棟彙錄付梓顏曰成仁集墓在翟家廟橋東港

陳貞女幼字桐邑徐世勳字衡銓為養媳乾隆二十二年世勳未

婚卒女年二十矢志守貞日勤紡績孝養姑嫜依兩叔操持門

戶守貞四十二年嘉慶二年學使阮公元給節堅貞璞額邑令

李給扁旌其閭事載郡志

陸景賢字聖傳妻沈氏年二十四夫亡遺孤甫婚復天氏與媳孀

閨共守卒撫孤孫成立府志云力葬三世守節四十年嘉慶四年題

旌 桐邑志

褚天麒府志作天祺妻高氏秀邑人年二十六成婚九月夫亡無子繼

嫡姪德驥為嗣甫三歲撫養成立入太學嘉慶四年請 旌十

二年卒壽八十有六

陸烈女陸秉乾女許字秀邑濮聲和長子廷松女性純孝年十六

母患瘋癱凡起居行動悉力扶掖三年未嘗厭倦成婚有期而

濮暴亡訃至女方執爨聞變慟絕既蘇即除簪珥縞素望空長

號家人恐其殉身多方防護未幾女含哀忍淚潛入臥房自縊

死嘉慶三年正月二十日也濮氏憐其志含殮畢即合葬于廷

松之墓里人咸賦詩紀其事嘉慶四年題 旌事載郡志

王名揚妻姚氏年二十九夫亡日勤紡績操持家政撫孤郁文掌

文長為婚配郁文早亡媳傅氏依氏守節氏於嘉慶五年請

旌十六年卒守節六十載

監生張宗豪字敬立妻張氏秀邑人氏年二十六夫亡結褵四載

無子以夫兄士璜次子繹勲為嗣矢志冰霜守節五十載嘉慶

十年題 旌

監生仲煌字文耀妻濮氏桐邑人夫故教諸子嚴而有法長均字

恒若次增字金若季垠字坤若俱成立力行善事乾隆甲寅氏

年六十戒勿稱觴出貲重建鎮西迎龍橋嘉慶辛酉重建梧桐
聚鳳二橋人無不稱善

監生仲煜字在明妻楊氏夫亡守節撫孤坤成立

夏斯權妻項氏年二十一成婚甫兩月夫亡勤紡績以撫嗣子嘉

慶十四年卒年六十餘載桐邑志

張友王繼妻孫氏年二十九夫亡撫孤天祿天時天時早卒與媳陸

氏婦閨共守七十一歲卒

朱培妻夏氏二十七歲夫亡家極貧撫孤鎔拮据萬狀婚後數年

鎔又亡與寡媳陸氏共撫遺孫林春成立卒年七十六

監生朱廷球字鳴盛繼妻施氏秀邑人年二十一夫亡無子以夫兄次子晟爲嗣晟娶于馮婚後數年而卒施與媳共矢冰霜足不踰闕施守節三十二年

錢馭羣繼妻蔡氏年二十三夫亡無子以夫弟長子大忠爲嗣撫養有成孝事翁姑守節以終

陳鎬字王在妻陳氏桐邑人年二十八夫亡撫孤廣心成立乾隆五十八年卒守節四十七年

邱某妻張氏年二十九夫亡邱本農家子氏於蠶績之外兼務穡事茹素終身撫孤成立長爲娶婦卒年九十三

張寶傳妻卜氏桐邑人年三十夫亡家貧勤紡績以撫孤兆奇茹素至八十歲終

陳天鑾字閒六妻皇甫氏年二十二歸陳未期年夫亡無子撫姪爲嗣守節以終

桐庠生周泰字武安繼妻陳氏康熙乙卯舉人周雲淳孫媳雍正癸卯舉人呂桐之媳年二十八夫亡撫遺腹子均原各字震川

成立勤織紝嚴督課守節四十一年

錢某妻王氏桐邑人年二十四夫亡撫子王佐成立守節三十餘年

濮某妻唐氏秀邑人年二十九夫亡無子撫三女長爲擇配守節三十餘年

徐某妻蘇氏年二十四夫亡守節

劉凱妻張氏桐邑人年二十七夫故遺孤光裕字振宗僅四齡撫育成立守節六十一年

董如山妻黃氏桐邑人年二十九夫亡撫八歲孤大章成立日勤紡績孝事尊姑守節四十五年

沈燦鐘妻沈氏桐邑人年二十五夫亡守節卒年七十三

潘景唐妻胡氏桐邑人年二十三夫故撫孤成立六十四歲卒

潘梓妻施氏秀邑人年二十四夫亡撫遺孤君蔚成立守節二十七年

沈克獻字愷士妻于氏桐邑人年二十八夫亡遺孤聖美字大年撫訓成立氏年五十六卒

呂世祚字錫坤妻鍾氏秀邑人年十九歸呂未期年夫亡哀慟幾絕生遺腹子又歿撫姪允傳爲嗣氏性端莊笑言不苟夫亡後長齋奉佛孝事衰姑足不踰閭守節三十六年

王晴初繼妻張氏二十五歲適王越八月而寡矢志守節年五十六卒晴初監生

監生王宁東妻陳氏年二十八夫亡撫孤鴻婚未五年鴻又卒與媳稱雙節焉年五十三卒

桐庠生沈鍾泰字虞尊妻俞氏年二十四夫亡守節以終姪淳懷爲嗣淳懷字熙田庠生

監生沈鈞衡妻徐氏年二十一夫亡守節以終姪浚都歲貢爲嗣

孫桂字景顏松字貢青皆庠生

輔雲山妻董氏桐邑人夫亡撫子玉書孀居三十年備嘗荼苦

輔玉書妻蘇氏年二十四夫亡事孀姑以孝聞撫四歲孤紹裘成立守節以終

歸振家字耀曾妻沈氏桐邑人年二十八夫亡撫孤銑錦成立嫁女娶婦皆氏拮据圖成守節以終

監生鍾士榮妻沈氏秀邑人年三十歲夫亡子肇封纔五歲撫以成立有聲鬻序子死又撫孫學熙守節四十八年

邱公佩妻劉氏秀邑人年十八歸邱十九夫亡無子繼遠族時章爲嗣娶施氏生子女各一而子旋歿施年二十四時章又亡家素裕叠遭變故遂日落劉與施艱歷冰霜勉支門戶撫女旣長招孫景山次子耕樂爲壻以承其祀劉守節五十九年施守節三十一年人稱兩世清操

邱時章妻施氏

詳上

陳烈婦郭氏監生陳元昌字南輝繼妻結褵兩月元昌病篤氏泣禱泰山祠願以身代元昌死欲同棺以殉姑力止之越數日闔戶自縊嘉慶癸亥三月二十有八日也距夫易簣浹耳時年二十有六桐邑侯李給烈並成仁額德清周邑侯給烈婦綱垂額

錢友奇妻張氏年二十九夫亡守節三十三年乾隆四十五年卒以姪星九爲嗣

錢星九妻仲氏年二十八夫歿遺孤鼎元生纔四月孤苦伶仃冰

霜自凜撫孤成立節繼貞姑嘉慶十七年卒守節三十六年

沈廣遠妻張氏秀邑人年二十一夫亡自幼讀書知禮年十六歸

沈孝事衰姑撫孤再安成立守節三十四年嘉慶十五年題

旌

朱文玉妻姜氏年十九夫亡撫遺腹子守節四十九年桐邑侯李給孤芳柏凜額載邑志

馮鼎義妻顧氏年二十七夫亡撫嗣子陞良殯葬舅姑守節四十四年桐邑侯李給飲冰嚙雪額載邑志

顧友瞻妻錢氏夫亡守志撫二孤成立五十一歲卒

沈運倉妻賈氏夫亡守志拮据撫孤五十八歲卒

朱士華妻朱氏夫亡守志撫子元杰成立卒年六十五

史景山妻戚氏秀邑人夫亡無子以姪廣省爲嗣家極貧饑咽糠糝誓無變志娶媳儲氏生孫寶傳甫百日而廣省病亡姑媳矢志撫孤孫成立氏年六十九卒時乾隆五十一年也

史廣省妻儲氏年二十一夫亡辟纊以事孀姑織紝以育孤子艱苦萬狀娶媳成家卒年五十三

姚洪如妻張氏秀邑人年二十九夫亡無子以夫甥歸明爲嗣明又早卒以胞兄張悅田之孫號崑和爲孫家貧勤針黹猶不能

給薪水糟糠以餬其口守節四十二年

張載璜妻吳氏嘉邑人年十九夫亡無子以姪禮傳爲嗣撫訓成立長爲娶婦守節四十一年乾隆六十年終載邑志

吳聲遠妻祝氏桐邑人年三十歲夫亡長子佩芳出爲楊氏後次子玉章歲未及週氏撫孤守節勤苦終身卒年七十六

監生潘勲字以功妻高氏秀邑人年二十九夫亡淚枯繼血絕而復甦者數次翁姑慰勉再四乃舍哀成服勉作未亡遺孤二長名墀僅四齡次名均甫七月撫訓成人長爲娶婦事翁姑盡孝翁歿歿葬合禮并爲姑營壽域氏於嘉慶十六年卒年六十一

歲卒之日猶以不得終事姑爲恨十七年題旌

錢銜瞻妾戴氏秀邑人衛瞻亡所生子僅三齡嫡子二克遵庶母命俟遺孤樑字景楠及冠始分析樑娶于鄭未期而鄭卒繼室氏顧生子三樑年三十二而亡氏與寡媳俯育三孫備嘗艱苦嘉慶十二年卒年七十九

桐廩生陳雲錦字天裳妻濮氏夫亡撫孤登瀛成立壽終八十有八守志五十餘年

監生施燿妻嚴氏夫亡守節撫子成立年五十八而卒
謝某妻邱氏年十八適謝二十歲夫亡無子有女甫一歲氏守節

於母家數十年其女適俞覲王

監生楊埰繼妻盧氏桐邑人年二十八夫亡撫嗣子如己出卒年七十載郡邑志

高勝成妻張氏秀邑人年二十五夫亡繼遭回祿家業蕩然益勤婦功以撫孤錫龍娶媳數年生二孫子又死同媳撫二孫旣而二孫皆婚後逾年而歿氏年七十九卒

徐立朝妻邱氏桐邑人二十六歲寡時腹有遺孕忍死待其誕育已而產一男名上成撫養成立婚後又歿與媳同矢冰霜嘉慶十三年卒年七十一

監生沈鍾淑繼妻周氏年二十九夫亡撫六歲孤秉孝成立艱苦
備嘗守節四十三年

沈朝植妻黃氏年二十餘夫亡撫姪為嗣守節數十年

馮浪字履和妻蘇氏年二十三夫亡無子善事舅姑勤儉自處後

患足疾在牀第尚勤紡績以姪梅為嗣氏于嘉慶十一年卒

朱貞女幼字張元瑞為養媳未婚夫亡誓死靡他請於翁姑筭而

拜廟執婦道撫嗣子宗獻成立守貞至四十三歲卒時嘉慶十

三年也

朱紹邦女夫
亡時年廿四

方貞女西蜀參軍方學沆次女許字曹未婚夫故性貞烈矢志不

可奪足不踰閫長齋以終嘉慶七年卒年四十八貞女名石千

曹名左春

陳鳴山妻濮氏秀邑人年三十夫亡無子止一女守貞不字以養

母氏苦節終身

沈貞女沈德明女許嫁張宗堂年廿一未婚夫亡誓無二志父母

議擇配女輒絕粒年二十八抑鬱以死

沈烈女桐鄉沈錫蒼第三女幼字孫臨川第五子垆垆以力學成

疾而卒女聞訃遂澹粧蔬食屏處一小樓後有竊與議婚者女

謂母曰兒受孫氏聘肯為他家婦乎母察其志不可奪告其父

絕之歲餘又有議婚者至父恐女聞佯應之以速其去不意女已聞之矣是夕投繯死嘉慶六年六月初八日也年二十二孫

氏憫其志以女棺與珂合葬焉節錄楊蔭軒撰沈烈女傳

桐庠生朱潤林字傳霖妻潘氏年二十七夫亡哀毀幾絕祖姑及

舅姑示以撫訓遺孤為重乃稍稍節哀上事重闈下撫三孤孝

慈兼盡數年後哀毀如故遂抑鬱卒年三十三以上漁艇紀聞

補遺

費文光字元芳繼妻沈氏桐邑人涵章女年二十五夫亡遺孤楚

相字仕三尚幼族人欲奪氏志屢受凌逼又陰搆穿窬箝篋一

空氏斷指截髮竟欲自盡賴兄弟慰勉更稍稍飲助遂積銖累

寸撫孤成立納粟入成均康熙五十八年梁邑尊給丸熊比美

額五十九年吳郡尊給松貞竹茂額學政汪給冰霜勁節額雍

正九年卒守節四十七年載入郡志

吳以學字于儒妻汪氏年二十三夫亡撫姪長鏞成立守節六十

九年休寧邑侯給芳年植節額按氏休寧人其族孫瓌入籍桐鄉

沈子發妾莊氏桐邑人子發死氏年二十四子發繼妻施所生子

甫三齡施性剛而多能同守志數年能得施之歡心施病革隱

以私貲數百金交氏收貯施歿益勤紡績操家計撫孤成立長

為娶婦受托之
取用也其貨後付
會孫氏於乾

隆十一年卒守節六十四年

徐漢卿妻張氏桐邑人二十四歲夫亡勤儉操持撫孤彩寧成立

乾隆二十二年卒守節六十一年

賈仲榮妻祝氏秀邑人三十歲夫亡撫育六歲孤又山成立五世

同堂里黨稱羨乾隆三十三年卒守節五十一年

鄭玉山妻沈氏秀邑人年二十七夫亡撫孤士榮士魁成立乾隆

三十六年卒守節四十一年

朱日章妻黃氏桐邑人年二十五夫亡子殤孝事祖翁後老病卒

勉措喪葬以夫堂弟秀乾子安慶為嗣乾隆五十五年卒守節

五十二年

沈成六妻蘇氏桐邑人年二十二夫亡無子依母族苦守乾隆五

十五年卒守節五十六年

金良揆妻王氏桐邑人年二十九夫亡乾隆五十八年卒守節十

五年

許景芳妻沈氏桐邑人沈成六女年二十一夫亡生遺腹子廷玉

撫教成立乾隆六十年卒守節四十三年

蔣國瑞字肇豐妻張氏秀邑人年二十九夫亡撫孤廷相成立長

爲娶婦守節三十五年

張殿先妻俞氏秀邑人年二十餘夫故撫三歲孤國華成立蠶繅紡績至老不怠長齋繡佛以終嘉慶二年卒壽八十四
監生曹文華字韜士本姓鍾妾錢氏桐邑人文華亡家中落氏所生子名上尙幼氏以賣花爲事上事主母王下撫遺孤主母卒氏拮据殯殮氏于嘉慶三年卒壽八十五

監生范廷璋妻俞氏秀邑人夫亡守志撫嗣子朝綱成立嘉慶三年卒苦節二十四年

曹印洲妻郁氏年二十九夫亡遺孤瑞齡字聖昭僅四齡家酷貧

織機度日守節三十年

桐邑志

邑侯李給蓬茅苦節額嘉慶四

年題旌

鍾友高妻趙氏年二十二夫亡孝事翁姑遺孤兆隆撫訓成立嘉慶四年卒守節五十年

朱翰維妻吳氏秀邑人年二十六夫亡是歲十月被竊一空家徒壁立益勤女紅以撫育二孤次子早亡又教育二孫成立嘉慶六年卒守節五十六年

張敘皇妻沈氏秀邑人幼爲張養媳年二十八夫亡姑因喪子喪明氏奉侍益孝因無子有勸之嫁者氏曰夫兄之子在何謂無

子卽撫夫兄羽皇子載文爲嗣姑歿哀痛幾絕茹素三年嘉慶九年卒守節四十九年

倪兆騏妻沈氏嘉邑人沈載揚孫女年二十歲夫亡無子以夫堂弟兆龍次子銓立嗣家貧苦節自甘嘉慶十五年卒守節四十九年

錢明載妻劉氏桐邑人年三十夫亡無子撫姪成立艱苦備嘗嘉慶十七年卒守節四十七年

閩範二 現存

劉鑑妻李氏年二十五夫亡家益落氏啜粥齧藜竟以守府志云力營殯葬撫遺孤山舍成立嘉慶四年題 旌桐邑志建坊十錦塘現年

七十五歲

朱廷璧妻濮氏桐邑人年二十八夫亡辛勤紡績葬翁姑撫四子鈐鈞鈺俱成立曲盡孝慈李邑侯給皓月爭光額現年八十餘按氏貢生濮聯元號北三第三女

鍾之源繼妻賈氏桐邑人年二十九夫亡撫孤秉鈞成立入成均娶婦姚氏妾許氏無子未幾秉鈞卒時姚年三十許年十九並

勵操事姑兩世三節桐邑尊李給冰雪同操額賈氏於嘉慶四
年題 旌現年七十姚已卒許現年四十餘

監生鍾秉鈞妻姚氏妾許氏 並詳上

包彩成妻莊氏桐邑人年二十八夫故遺孤五歲殤矢志冰霜長
齋繡佛現年八十餘

王大奎妻姚氏年三十守節撫子以年成立現年八十七

錢大章妻顧氏桐邑人年二十夫亡生遺腹子正發家赤貧傭工
度日孝事姑十四年奉侍翁十七年撫子成立苦節難以縷述

現年七十四

贈公濮椿字元亭妾嚴氏青年守節 封宜人現年七十餘

劉少陽妻錢氏桐邑人年二十九夫亡撫孤至八齡家故貧族人
引其入徑山為僧氏痛夫亡子又遠離誓無二志勤紡績以自
給孤苦自甘者數十年以姪依智為嗣現年七十餘

陸蔭堂妻項氏桐邑人夫亡守節撫子成立子卒又撫兩孫氏現
年七十一

監生施燦字星如妻沈氏年二十九夫亡撫孤紹基丕基現年七
十餘

訓導陳天鏞字師夔妻鍾氏妾歐氏天鏞由廩貢生任衢州府學

訓導三十四歲卒時歐年二十二與鍾共勵冰霜繼姪祖命爲嗣鍾現年七十一歐現年五十八

貢生陳若奎字魯躔繼妻程氏秀邑人休寧縣候選州同程義方女夫亡守節撫六歲孤曦字明方成立氏現年六十八

王郁文妻傅氏秀邑人孝廉傅允諧孫女年二十五夫亡遺子女各一子三歲又殤寡姑姚氏性矜嚴鮮可意者氏恪盡婦順矢志堅守勤紡績以度日積餘資以嫁女以夫弟掌文次子士英

爲嗣氏現年六十七

盛堪妻吳氏邦助女年二十歲適盛宿耀長子堪爲室結褵二載

夫因貿易出門不返徧訪無踪存亡難決氏朝夕懸望悲泣不已翁姑曲爲解慰迄今四十五年時望夫歸姑已歿翁現年八十餘奉事甚孝撫夫弟長子鎬爲嗣現年六十七

錢致和妻洪氏桐邑人幼爲錢養媳成婚後年二十四夫亡生遺腹子撫至十四歲又殤翁姑年邁竭力侍奉以終現年六十餘

監生潘球妻錢氏秀邑人年二十一成婚未一載夫亡撫嗣子上英成立現年六十餘

桐庠生賈繩武字禹門妻許氏夫亡撫孤亦達及長娶於陳未幾而陳寡姑曰我寡幸有子汝曷守乎婦曰婦承姑志誓死靡他

僕川新聞記 卷三

姑媳伶仃恒至絕食許現年六十七陳現年四十三

賈亦達妻陳氏

詳上

張蘭妻葉氏秀邑葉如山次女適監生張在衡之孫蘭年二十八

夫歿撫育遺腹孤壽祺現年六十餘

李某妻周氏年二十九夫歿撫孤秉良苦節自甘現年六十六

桐庠生葉揚華妻莊氏年二十六而寡撫嗣子青靄成立現年六

十餘

監生王彝鼎繼妻葛氏桐邑人年二十九夫亡守節撫前氏子及

所生子耀端成立現年六十六歲

吳潛字盈科妻鍾氏秀邑人年二十九而寡事姑孝家貧藉鋤耨

以奉姑二十餘年現年六十一

蔣廷模字介臣妻金氏夫亡守節時姑已歿翁召周年邁氏不惜

十指之勞以供甘旨翁歿拮据辦喪具煢煜燿三子俱幼撫訓

成立及長爲之婚配煢監生煜桐庠廩生

監生鄒士魁字冠英繼妻王氏桐邑人夫亡守節撫孤熊及炳熊

婚後數年而歿炳繼夫之弟士楷爲嗣氏與媳唐氏共勵冰操

現年六十一

鄒熊字鳳苞妻唐氏年二十四夫亡孝事孀姑撫孤子坤

陸思純字粹然妻曹氏桐邑人年二十七夫亡守節現年五十九
劉宗全字崑揚繼妻陸氏桐邑人夫故守志撫前氏子之綱及所
生子維之綱蜚聲譽序繼夫兄振揚爲嗣氏現年五十九

張天時妻陸氏年二十二夫亡守節孝事孀姑孫現年五十八

宣應山妻顧氏桐邑人年二十六夫亡家酷貧撫孤守節族有欲
嫁之者氏矢志不從忍饑寒勤紡績以度日孤早死氏現年五
十八

劉憲章妻葉氏桐邑人年二十八喪夫撫堂叔桂芳成立以其子
爲嗣勤儉持家備嘗荼苦現年五十七

孫大順字如臨妻朱氏桐邑人年二十四歸孫甫一歲而夫亡奉

翁姑終餘年依弟家勤刺繡兼紡績積貲爲翁姑及夫營葬并
自營生壙以姪汝明爲嗣現年五十七

王茂先妻錢氏桐邑人青年守節孝事翁姑撫訓子女後翁姑喪
葬子女婚嫁皆藉十指力現年五十七

監生王鴻妻夏氏秀邑人二十九歲夫亡孝事孀姑陳氏越二載
姑亡泣曰吾不卽從夫地下者爲姑在也至今日事已畢矣哀
痛絕粒誓不欲生親族慰勉乃止依母族守節現年五十六

方孝女方菴園季女幼讀書以父母年邁生母又患癩症朝夕不

離左右遂撒環瑱期於至老不嫁事父母及生母終餘年女年
已四十與守貞之姊氏共居一樓勤女紅以自給現年五十六
孫大受字鴻遠妻沈氏桐邑人年二十三而寡以姪光烈為嗣現
年五十五

及秉鈞妻徐氏桐邑人二十一歲喪夫家貧無子竭十指之力奉
事髮姑以夫之弟坤揚子為嗣現年五十四

濮金初妻程氏年二十八夫卒依母族守節現年五十三

錢景楠繼妻顧氏秀邑人二十九歲寡家貧躬織紉忍飢寒以仰
事髮姑俯畜三孤艱苦難言恃母族得通緩急姑歿長子熊幼

子然相繼天撫次子耀成立氏現年五十三

高錫龍妻沈氏秀邑人年二十九夫亡事孀姑以孝撫兩孤以慈
疊遭子夭悲號欲絕以堂姪為嗣現年五十三

張文龍妻張氏秀邑人年二十四而寡善事翁姑拮据撫子日紡
木棉現年五十二

沈志均妻費氏二十八歲夫卒哀號欲殉親族以翁姑衰老遺孤
幼穉相勸勉因節哀脫簪珥以務家業孝慈兼盡苦節自甘後

翁姑喪葬兩孤娶婦皆氏竭力圖成現年五十二

孫大為字偉人妻陳氏桐邑人年二十五歸孫歲餘夫卒以姪浚

明爲嗣現年五十二

陸昌字愛祺妻嚴氏桐邑人年二十三守節現年五十二

濮茨字勝南妻胡氏州同濮光孝孫媳枋之媳也年二十九夫亡

止遺三女長爲擇配艱苦守志現年五十一

顧懷璋妻夏氏桐邑人年二十四守節現年五十一

朱鎔繼妻陸氏二十六歲夫亡事嫠姑夏氏以孝撫孤林春擇配

成婚現年五十一

朱西龍妻范氏二十九歲夫亡苦志守節現年五十一歲

錢宿初妻曹氏二十二歲夫亡守節撫夫弟盛都之子爲嗣現年

五十歲

呂貞女桐邑人幼字蘇衡爲養媳未婚夫亡悲號欲殉舅姑泣慰

女慟稍止矢不二天孤苦自甘者數十年現年五十歲

夫亡時年十九

蔣世埰字采京妻曹氏桐邑人二十三歲歸蔣世埰力學攻苦以

疾卒氏年二十四無子孝事翁姑以夫兄辛爲次子元鉉爲嗣

現年五十歲

廩生孫士熊繼妻朱氏孫字驥揚桐邑撥入府庠氏年二十九夫

亡家貧苦守撫姪大成爲嗣現年五十歲

監生葉渭漣字聲和妾陳氏青年守節撫育子女長子芬字蘭谷

秀庠生次子荃字香圃監生季子蘅
夏桂妻張氏二十五歲夫故撫孤震煥成立

戎廷桂妻唐氏桐邑人二十九歲寡撫孤在東成立
高雄伯妻朱氏夫亡守志遺孤五齡族無依忍苦撫育成立

桐庠生沈份字宗陶妻朱氏年二十二夫亡無子依夫之叔衮華
守節

顧文初妻王氏桐邑人年二十四守節家貧藉十指以自給
戎廷槐妻張氏夫亡守志撫育二孤
曹翰宗妻顧氏二十六歲夫亡守志

王雨亭妻錢氏夫亡守志撫育二孤

莊德本繼妻夏氏夫亡守志撫孤成立德本監生

孫士驥字見輿妻蔡氏桐邑人二十四歲寡孤大醇甫週歲勤苦
撫養與妯娌朱稱雙節

桐庠生馮浚字敬六妻張氏年二十五夫卒善事舅姑姑病常在
牀蓐竭力奉侍以姪梅爲嗣

及朝柱妻陸氏二十五歲寡撫孤成立

曹慰祖字季傳妻項氏桐邑人監生項益初女二十一歲寡止一
女事姑盡孝以夫堂兄芬餘次子爲棟承嗣

李寄昌妻夏氏二十五歲夫亡撫育二孤

監生錢廷瑚字肯堂妻曹氏桐邑人夫亡止二女氏矢志靡他

夏德順妻徐氏三十歲夫亡撫遺孤二齡依母家守節

夏雲昭妻朱氏夫亡守志撫育藐孤

沈大源妻錢氏桐邑人二十七歲夫亡守志

朱晟字恒初繼妻馮氏秀邑人年二十八夫故止生一女夫係廷

璣次子繼於廷球爲嗣廷球繼妻施氏孀居姑媳伶仃飲冰茹

蘖氏勤紡績以奉姑撫姪爲嗣

桐岸生沈光藜字青照妻黃氏青年守志拮据撫孤堅

顧士元妻夏氏夫亡守志

馮濬川妻范氏夫亡守志

馮鵬承妻張氏夫亡守志

桐岸生張元瑞字秉桓妻柴氏二十六歲寡撫姪爲嗣

陳昕妻吳氏秀邑人年二十六夫亡守志繼子福齡爲嗣

吳佩雲妻薛氏年二十二夫亡止一女時姑因貧窘衣食不繼勸

之改適輒痛絕紡績自給備嘗艱苦

監生朱守曾字正傳妻岳氏秀邑人二十六歲夫亡守志

陳松齡字蔭喬妻曹氏年二十七夫故守節

桐庠生鍾錫齡字行可妻金氏年二十五夫亡事祖姑暨舅姑以孝處妯娌以和善撫二孤慈嚴兼盡長子步羸弱冠遊庠

王宗寧妻吳氏秀邑人廿八歲夫亡家人令其他適誓死不從府庠生嚴和字春靄妻張氏夫亡守節撫育二孤

陳守仁妻徐氏年二十九夫故守節

職監濮廷輝字襄雲妻楊氏桐邑人年二十八夫亡事姑嫜以孝聞矢志守節

職監陳錦字織雲妻嚴氏秀邑人年二十七夫亡痛不欲生家人再三慰勉乃止樂善不倦自奉惟茹菽衣素

曹承垣字亘三妻陳氏承垣力學攻苦忽遭時疾卒氏年二十一矢志守節孝事舅姑撫姪爲嗣

監生劉建勳字彙征妻徐氏妾沈氏青年守節孝事翁姑

職監陳天鏡字鑑民妾錢氏桐邑人天鏡亡守志撫孤三辛

蔣元鏞妻俞氏年二十六夫故孝事舅姑撫教二孤

葉方華妻呂氏年二十餘夫亡守節撫教遺孤成達長爲娶婦

陸永高字維嵩妻陸氏二十歲夫亡撫孤槐慈而兼嚴

茅某妻康氏結褵兩月夫亡年二十一歲事髦舅盡孝撫姪國培

爲嗣茅名大成

夏嘉連妻顧氏桐邑人夫亡願守節撫孤

吳可宗妻張氏年二十六夫亡次年姑張氏歿叠遭顛沛拮据殯

殯家極貧忍饑寒勤紡績撫子光大光遠艱苦萬狀

周敦桂字林一妻朱氏桐邑人秀庠生朱廷琛女年廿八夫卒哀

痛欲殉祖姑暨翁姑勸以有兩女需撫育乃止撫姪爲嗣

黃榛號松田妻賈氏年二十二夫亡守志

秀庠生張兆初字錫遐妻蔡氏夫亡守節事翁姑以孝撫幼子經

成立

張兆祥字旋吉繼妻樂氏秀邑人夫死守志孝事舅姑以夫弟之

子綸爲嗣

陳宗妻張氏鎮北張鵬程女適塘北陳氏甫一月夫亡氏年二十

一誓無二志事翁姑深得婦道

夏德焜妻陳氏二十四歲夫亡守志撫孤連城

夏德煥妻孔氏年二十七夫故守志

岳棹字尹棠妻嚴氏嘉邑人年二十六夫亡守節孝事舅姑

劉鏞字聲宏妻岳氏桐邑人年二十四夫亡恪謹事姑儉勤處已

撫孤汝能以慈兼嚴

徐珍字上成妻于氏年二十一而寡撫螟蛉子徐士賢爲嗣事嫠

姑邱氏十四載曲盡孝道姑歿喪葬之費皆氏拮据圖成
梁敦書妻李氏夫亡守志孝事邁姑撫育二孤

鄒覲王妻許氏桐邑人海寧許進士樹棠胞姊也年三十二適鄒
未期夫卒苦志守節

屠宗曜字星九妻陸氏桐邑人陸省堂之孫女年二十四夫亡遺
孤惟城尙在襁褓忍死撫之家貧惟藉鍼黹以度日

監生濮承銀字衛君妻沈氏桐邑人年二十三夫亡守志

桐庠生柏三錫字承恩繼妻沈氏夫亡家徒壁立勤紡績以撫前
氏子洪及所生子溶

桐庠生徐麟徵字春郊妻沈氏夫亡守志

沈魁字雲巖妻徐氏桐邑人年二十一歸雲巖雲巖多病氏奉湯
藥惟謹未期雲巖卒無子冰霜自矢奉事髦舅尤加孝謹

沈森字茂田妻陳氏桐邑人年二十二夫亡遺孤甫週歲翁遠宦
晉省氏孝以事姑勤以育子

陳芳澍字心蘭妻施氏夫亡守志

張渭熊妻沈氏桐邑人年二十而寡無子與姑勤紡績以作生計
趙某妻某氏夫亡守志撫育遺孤

俞升黃繼妻莊氏夫故守志

周震妻章氏二十五歲夫故守志

朱某妻茅氏二十六歲歸朱未期夫卒撫育遺孤

沈士樑妻顧氏桐邑人年二十四夫亡撫孤成勲

監生方德升字翼初妻王氏桐邑人年二十三夫亡無子女繼姪

上達爲嗣

陳孝女秀邑陳鳴山女五歲喪父母濮氏撫女守節女長欲爲之
覓婿女曰女適人何人奉母甘旨願學北宮之女以終焉年三
十三而母卒哀痛幾絕家貧藉十指之勞以自給稍積餘貲於
嘉慶十八年冬殯葬其祖父母今年冬將葬其父母撫大房在

岐第三子士芳以嗣其先人

補遺

王孝女秀庠生王廣廷次女淳安教諭張大德繼室乾隆甲申年
割股療父疾人稱其孝

錢士珍妻楊氏年二十八夫亡守節現年六十三

監生范廷宣繼妻朱氏秀邑人監生朱景元女年二十八夫亡守

節現年六十一

富永南妾徐氏震澤人永南亡氏年二十七矢志守節現年六十

一

朱鈞妻歸氏桐邑人年二十四夫亡撫嗣子齡成立現年六十歲
顧嗣爵字立鈐妻朱氏秀邑人夫亡守志撫孤世祥成立現年五
十八

顧聞昌妻徐氏年二十一夫亡守節現年五十七
賈士信妻曾氏年二十一夫亡撫二歲孤藉十指之力以度日飲
冰茹藥誓不二天現年五十六歲

監生陸鈞字聲宏妾朱氏桐邑人聲宏死朱年二十三自誓守節
現年五十三

桐邑庠生高挺繼妻金氏夫亡矢志撫夫兄玉峯之孫爲嗣現年五

十二

張鳴臯字聲遠妻仲氏年二十二夫亡無子撫姪嘉齡爲子甫十
歲殤苦節自甘現年五十歲

岳世英妻徐氏桐邑人夫亡守志家赤貧藉絡絲以撫二孤

平陽縣儒學訓導胡琢號珠船繼妻徐氏年二十一夫亡所生子
殤撫姪孫賜曾爲嗣

贈朝議大夫濮燾字廣含妾黃氏廣含卒黃年三十撫孤守志

監生歸政字性天繼妻鍾氏桐邑人青年守節撫孤保寧

桐邑生員張世球字夔鳴妾陶氏青年守節撫孤寧成立

濮琛字貢南妻沈氏桐邑人沈友仁女平鄉縣知縣濮元孝之曾孫媳年二十五夫亡守節

陸厚成妻吳氏秀邑人夫亡無子依母族守志

劉瑞周妻賈氏秀邑人年二十夫亡遺孤興宗生纔四月氏撫孤守志

孔禹城妻陳氏年二十夫亡遺腹孤生纔一載又殤事孀孤以孝聞

監生鍾賢慶字善餘妻曹氏桐邑人年二十九夫亡無子撫姪良濤爲嗣事孀姑甚孝

曹玉峯妻唐氏秀水人夫亡守節撫孤大經成立

徐壽霆妻唐氏桐邑人夫亡守節撫孤溶

曹系衍妻朱氏庠生大來子婦年二十四夫亡守志

藝事

元朱顯道業醫得九鍼補瀉法於金華王瑞安實出竇文貞之傳
非一時庸醫所及性急於治人而賴以全活者甚衆其始祖某
爲宋文林郎待科院官歷思明仁甫皆仕至顯道凡四世獨以
醫顯嘗葺環碧堂於幽湖與貝清江朝夕唱和清江爲作記
明施容字廷儀號春菴施氏以力耕轉戍至容始發憤下帷偶
讀岐黃遂精其業正德辛未大疫他醫裹足容獨毅然往視全
活甚衆由鎮之下西街遷郡之瓶山以孫貴贈通政大夫雲南
布政使以上紀聞

濮梅字澹仙號蘆菴工於山水更精於畫鸞

紀略

濮秋水雙瞽茹齋精於星學兼通禪乘朱文恪公養淳初為少宰

時予告里居聞而訪之秋水不知為公也及推庚運大駭曰此

豈尋常貴顯者哉不越三年當大拜矣公默然退明年庚申光

宗御極果拜武英殿大學士北行之日復過其廬題詩贈之曰

廿年貧自樂枚卜不關情何物能知我寒潭秋水清

濮世培字德甫學易二十餘年賣卜郡中人叩之無不響應嘗捐

資修葺祖塋

以上誌略

吳肖仙名世恩新安人世居於鎮以粗筆寫人物筆筆生動深得

江夏小仙意幾欲過之 紀略

陳謝表號左山祖沂宋高宗時詔醫康后獲效賜宮中掌扇以便

出入禁闥由是刻木為記萬歷中謝表卜居禾郡至皂林風阻

不前吹泊康涇問之則桐鄉也因占籍縣市醫名噪一時為女

科冠其子孫至今猶世其家 邑志有居吾鎮花園街者已數世矣

國朝陸子晉精於篆章自負雪漁小民所鑄之刀切玉如泥海鷗贈

詩云寶刀劃空風雨來是也

范鋪 一作鑄字稽山人稱為范癡能寫水墨牡丹尤精雪蕉寒鶴

性孤介罕有識者故流傳絕少與張次薇為筆墨交嘗少周其

空乏然終不肯以貧累人遂至窮餓以死今其真蹟人爭寶藏焉

沈 恕本姓陳字子如由梅里遷濮精痘科著幼科述古一書又善寫墨蘭子斯皇銘常孫山雷世傳其業

沈珮聲新城鎮城一作睦沈君御之姪遷居于濮專精外科

濮成恒字贊公性情恬淡精於堪輿之術四方之屢常滿戶外生平好義樂善當事給額獎之濮氏支分派遠舊譜散失公敦宗睦族不惜辛勤遠稽近考

劉恒龍字蘭亭幼嫻醫術人號火藥劉言其效之速也從錢塘徙

居濮鎮五十餘年壽七十無疾而逝其家猶世傳其業

沈經方字亮夫善鍾王書法臨摹殆盡一筆不苟中年卒無子所書佛經及唐宋人詩卷冊頁小楷散落人間皆珍藏爲法帖

吳廷樞字寰中新安布衣也書法甚精善書者多遜之有法帖行世詩律蒼秀而所傳絕少其子亦善書然遠不及乃父矣

沈 朗字仲韜號白山善書學法鍾王外舅王氏郡中稱工書者朗以子婿更委贄請業焉遂得其家藏晉唐法帖臨摹殆遍其所書不過二三寸大凡單條屏幅流傳最廣無嗣詩文稿多散失濮川詩鈔僅刻其恬翁集一卷

張軫字次微號耕埜工山水尤善寫松人咸呼為張松書亦道勁

濮漢字成章善寫山水人物而漁家樂尤擅場子眉山克繼父學以上紀聞 漢一作璜 國朝畫徵錄云以寫真名

徐魯屏善奕棋品格古雅紀略

陸仲貽善畫兔子蘭言家世寫生尤精白描羅漢其山水人物亦

鬆秀蘭言一作蘭英

張宿之桐溪日者精於易多奇中所著有河圖洛書纂記當時名士咸贈以詩

俞廷諤字揆千號葵軒亦曰眇狂精印章為三橋別派師事徐士

白傳懶髯文氏篆學惟梅里幽湖得其傳而眇狂實幽湖之鼻

祖也

莊允錫字廷占一曰浣躬工唐隸小楷尤精印章為文氏別派

凌咨字正堯工花鳥人物水墨大士尤佳

及揚武字孔威工篆刻亦為文氏別派

及元號復揚山人工繪事

張宿字漢水天資穎異天文地理醫卜諸書無不研究訓蒙不

給乃更岐黃活人甚衆遂少復故產立分稻法與佃均收欲上

當事通行兩浙不果乃爲鄉約正以孝弟化導閭里人畏敬之
卒年六十四

曹誠之精痘科善用藥方書靡不究人稱爲醫學書厨幽湖痘科
曹氏首屈一指

劉大楠字讓木號復齋年十二補邑弟子員有俠氣一揮千金家
素饒至復齋而消耗殆盡然持節不苟晚年以岐黃餽口尤精
咽喉十八症無子業遂不復繼以上紀聞

周天祿字受之善傳神工花鳥人物剔墨尤佳瑣志

何聖梅工樓臺園林尤善小影人面如瓜子大無不酷肖寓翰林

許醇夫家數年年三十餘卒

馮時昌字開甫明中書馮敏子秀庠生善書以上紀聞

阮煜一姪字軼張號石農擅印章硯杖銘尤稱得手瑣志

金世儀字叔宣嘉邑庠生精於醫由郡遷濮父廷相字紫台工詩
所刻有步中峯和尚梅花詩一百首子文在字南聲以兒科著
名

金鉉字玉相南聲子專門痘科與沈山雷齊名子淮字曉瀾號
漁艇廩監生繼其業世居大街八籍桐鄉

葉應麟字庭萊吉暉廣文子工書法香海寺臨水扁額可見一斑

瑣志 著有竹漁小草篆隸考子家琬舉人

邵世德字濟字專精痘科活人無算雖平時有嫌怨者必求治焉

紀略

俞大勳字載盟習堪輿術能以理爲斷故持論頗正戎玉川傳其

術 瑣志參紀聞

胡吉士字祥甫以瘡瘍名於時凡疑難險症無不應手而愈嘉湖士大夫家咸器重之里中徐曾龍患背瘡形如覆盂尅期求治云非用刳法不可取刀縱橫劃瘡行嵌藥綫然以火調治一月而瘳又一婦生乳癩索金約指一枚令束食指中節復自肩敷

藥及指云七日指甲有清水溢出卽愈矣已而果然 邑志

吳祚長專外科雜症今其家並世傳其業裔孫吳達字渭飛尤稱繼美

邵明虬字伯先善山水花鳥晚年尤善寫大士像隨筆所至儼然慈母也

蔣 旭字滄崙善花鳥

張鳳春專外科老年尤精

曹體周自幼失明以下爲業門常如市遠近無不知其名者 以上瑣志

沈 湧字仁可秀庠生精外科其子履端克繼父業

顧舫如毛君臯周遇天朱振聲皆以醫學著名顧為南樓太史之孫毛住燕場世傳咽喉科近有聞姓者繼之周素不習醫忽得秘方遂精外科朱咽喉科兼兒科

濮潤淞字銀臺號桐園世業醫著有醫書八種

流寓

周范 蠡少伯送西子於吳三年而達嘗棲遲境內自昔相傳有范蠡藏兵塢洗足灘諸遺踪在幽湖畔而市上又有妝樓臙脂滙之名世遠蹟湮姑傳其舊至於生女能言以誣少伯則陸廣微吳地記之誣前人已辨之矣紀府志云幽湖有范蠡泛舟處相傳扁舟浮海始於此夫人

宋輔 達慶源人少隸背嵬軍繼從楊和王征討屢立奇功南渡家邑之永新鄉孝宗欲處以邊境問其能勝任否曰當以家法治之又問何法曰子視軍民愛惜財賦遂除泰州果大治子廉

廣庠康誌略載入濮院因鎮西有輔氏祠堂其子孫現存耳然
輔達是否曾寓濮院姑仍舊說以俟考

瑣志

元趙孟頫字子昂號松雪吳興人與濮提舉鑑善嘗往來鎮上濮
氏捨宅建寺爲之題樑夫人管仲姬畫竹於寺延祐己未謁告
歸提舉已歿子昂復假館園亭盤桓數載爲提舉作墓誌銘而
曹太史半葬塔銘亦其所書曾繪幽湖泛月圖

楊維禎字廉夫號鐵崖山陰人少遊濮川因館於濮氏仲溫父子
創爲聚桂文會一時文士以文卷赴鐵崖評其優劣張士誠招
之不赴明太祖定天下應詔纂修禮樂書濮氏桐香室松月寮

等記俱出其手過雙賢橋者猶想見其人焉

程克柔字德剛讀書涉大義元末辭官結廬梧桐鄉宅有柳百餘
株因號柳庄居士與鮑仲孚貝清江結社濮川

明宋 濂字潛溪浦江人曾讀書濮鎮之梅涇與江朝宗鮑西溪
輩相往來後輔太祖定天下爲學士一時大著作皆出其手在
梅涇時青田劉基亦相過從寧海方正學孝孺其高弟也一時
聚合亦見地靈云

江 漢字朝宗會稽人元季落魄不羈客遊濮川濮氏館之留居
數載洪武初以文學召爲翰林院編修嘗應制賦元日早朝詩

賜以緋袍後請老遂家於濮每遇宴會被賜緋以彰君德云著
有月夜清遊集 以上紀聞

方孝孺字希直寧海人潛溪高弟微時嘗寓濮川有泊舟幽湖詩
瑣志

文徵明號衡山吳人官待詔館於楊菊賓家爲書啓明樓及嘉樂
堂額文氏鐵筆里人遂得其嫡傳

戴笠字曼公杭州人能詩工篆隸潛究素問諸書嘗縣壺於鎮
之北橫街崇正中泛海至琉球後其子訪之彼國造祥麟院以
居其父尊爲戴夫子隔水通問乞同父歸不許其國厚贈其子

而還

府志云崇正中楚蜀亂慨然曰此非君
子避世時耶遂從番禺人去不知所終

陳素字涵白號澹仙居桐鄉崇正甲戌進士詩文皆清勁有法

官至給事中李闖陷巢廬素卽棄官歸里縞衣綦巾自稱天山
道人創正心書院於邑治西北隅屢過梅涇與沈海鷗輩遊著
有開泰政略行世康熙己卯學憲陸式廬表墓奉其主祀於鄉
鄭光祚字四維餘姚諸生善天文明季隱居梅花涇友人招赴省
試作老女詞見志授經講學不履城市自號剝碩山人卒年八
十著有樵父吟子典字子韶庠生工詩且孝友著廡下吟幽湖
集廣陵古蹟諸集王阮亭擊節其詩欲客之不可自號友陶居

士

國朝陳文沂字宗韻松溪人往來濮川與濮澹軒戴曼公沈海鷗以詩酒相唱和

施芳字殿揚茗溪人人品高潔長於古詩留鎮數年而去

畢緯前字西臨吳縣學生有詩名爲楊瑞元之壻寓居濮鎮鍾來霞詩云猶憶當年擇里居風淳却愛梅花市寒軒密邇日周旋拂拭頻蒙不我鄙當時投贈者甚衆著有詩集旋散失

徐臻號而庵松江人與佛眉交來遊福善寺有癱疾旋與佛眉同往徑山

張宏保字石村海寧人書學董文敏康熙丁亥戊子間寓寺之永照房墨蹟甚多釋豁眉曾刻其所書趙松雪濮鑑墓誌銘楊長史寺碑及千字文帖

王獻字補雲盛澤人畫學李唐郭熙久寓濮院見推於朱竹垞先生

沈之璜字于王鑪鎮人爲甬江仇滄柱門下士湛深經術以五經屢試不售設帳濮鎮及門中甲乙榜者八人

錢聖山自姚江遷濮鎮居施家東荒小圃詩詞歌劇書法印章皆非凡手所及尤善花鳥嘗遊杭寄佛慧寺爲溫州守聘去卒於

溫鄭耕餘贈詩云文章工後卽飄零洵不誣也

鄭 梁字寄亭靖江人書法宗衛夫人謝太傅

姚子仁號紫瀾新安人三歲時從其父來居濮川至七十三歲復歸故鄉在格山之姚村一時異之諸名士咸贈以詩

陳選勳字碩公餘姚人遷於濮鎮著藍染齋集子樂字夔一有故

鄉草 以上紀聞

陳 梓字俯恭號古銘選勳子舉止方正私淑張楊園先生詩古

文詞一時作手書宗懷素自成規格有客星零草寓峽草及四書質疑一齋文鈔偶存集等書督學雷翠庭先生有五布衣詩

古銘居其一

瑣詩與北地李隱君錯齊名有南陳北李之號
府志

吳鳴甫吳江人擅剔墨燈

潘 亮字燭微越人寓居幽湖著一得吟一卷

沈 銓號南蘋德清人工花鳥賦色極濃麗曾寓濮川其孫宋字

則庵世其業里中吳江吳鳴甫以剔紗擅絕一時至今珍之宋以寫生繼其後寓濮幾二十年其表章吳烈婦徵詩請額尤卓

然可傳者其同鄉陳槐三沈海籌並擅寫生往來亦久

范時濟字巨川杭諸生工詩古文館於幽湖與陳謹堂陳古銘張

霽陽輩遊嘗與古銘及周緩菴私淑楊園先生講性命之學後

卒古銘爲作傳 以上瑣志

釋宏禮字具德靈隱主席康熙甲辰里人邀主福善師命首座佛
眉應之因偕行至濮時里中適有與修之舉師作重興福善寺
募引居數月去釋豁眉曾刻其引於巽瞻堂 紀募引云濮川爲
濮氏舊井里里有福善寺爲濮氏先世提舉公諱鑑者捐貲建
奉住庵僧曰東溟浩者爲開山迨妙用體公自武原之法喜來
規模益宏殿閣雄麗屹然東南巨刹之一歲久日就頽落今年
春濮氏之裔孫文象居士暨頌調居士謀聚族中金共爲修建
欲以予言爲引濮氏裔孫之志洵可嘉也康熙甲辰初夏靈隱

宏禮題於福善之枕溪堂

周雲淳字元龍仁和人康熙乙卯武科舉人好讀書工詩文慷慨
仗義後遊濮川遂家焉 贈武德將軍子天機武科舉人呂桐
入籍桐鄉由舉人任守備天樞諸生天權考授州同知 漁艇紀
姚雨若擅寫真

王 仁字樂山錢江人善白描人物尤善澹墨雲龍曾寓香海寺
五鶴堂

沈小休吳興人師杭人朱碩士窮神墨竹題款亦精詩句亦佳
潘 江字藻如山陰人有懷古軒詩集一卷

張 令字次亭松江人書學晉人能運肘

陳周倚夔一從弟習形家言

蔣拭之字季眉雍正年以堪輿來鎮一時以詩文請質者甚眾

戈守智字達夫平湖諸生書學黃庭靈飛等帖著漢溪書法皆手

自書寫付梓字畫勻稱可觀嘗主沈封君惺齋家翔雲觀位正

天樞四大字是其手筆

以上瑣志

吳懋政號蘭陔海鹽人由進士任博羅令改處州教授告歸後以

文章教後進遊其門者輒掇高第去歲庚子上舍楊峻天延訓

其子澧桐岸生周惟準鄒士龍咸師事之

按府志吳懋政著有粵程稿八銘堂詩集

方 薰字蘭士號樗菴石門人工詩詞善繪事著有山靜居詩稿

山靜居詞稿鮑氏知不足齋叢書刊其論畫論書論詩數種上

舍濮珊園好法書名畫樗菴先生嘗主其家董棨楊培立咸師

事之嘗為珊園寫松陰晏坐小像頗覺神似惜未及補圖而疾

作歸卒於家此圖遂為先生絕筆云

漁艇紀聞

王 錦字雲章號怡亭以堪輿來鎮其學宗蔣大鴻地理辨正與

朱右滄沈楚白董性天岳文相諸先生遊寓濮數載

金學超字理階嘉興人由舉人任麗水教諭曹雪橋廣文延訓其

子晉墀

黃景昭字文光海鹽人以工畫寓濮川已數十年矣晚年尤精於寫真嘗有添毫欲活之妙

瑣志

孔繼麟字石徵號珊客諸生梅里人工詩館於香海寺之三振軒學詩者咸就正焉

方外

釋氏

宋惠忠

一作宗

宣和間為開拓淨土禪院

即化壇

之祖

一云宋元間暴兵所經枕屍遍野濮氏設壇瘞之故名

智明嘉祐間從靈隱來依里人陳德明以居為之結庵曰三教堂禪師行業碑記尚在

元志浩字東溟初居崇福庵福善寺成為當寺開山之祖

月庭字了生本居積善庵濮鑑創寺與東溟同延主院事遂合二庵名其寺題梁並列二師之名於上

克新字仲銘號雪廬主席於郡之水西寺與江朝宗友善過濮川
司令濮樂閒留居化壇講經三載往來唱和皆一時名彥著有
雪廬詩集 以上紀聞

府志云克新字仲銘號雪廬自稱江左外史鄱陽人宋尚書左
丞余襄公九世孫始業科舉朝廷罷進士乃更爲佛學博通外
典務爲古文元末住秀州資聖寺與楊廉夫顧仲瑛遊明初召
至京師克新等三僧往西域招諭吐番圖其山川地形以歸初
著南詢稿燬於兵今惟雪廬集行世 至正庚申倡和集

又按府志古蹟雪筠齋元濮敬之建釋克新有題辭

琦楚石名梵琦一字曇曜象山人姓朱氏祝髮於鹽官之福臻院

十年行脚大闡宗風至正五年講法華經於化壇村夫販豎皆
得講義禮拜盈庭濮司令留主福善寺固辭明洪武初徵赴京
師作大法會事竣賜黃綾戒衣一襲高麗鉢一握仍回鹽官示
寂學士宋濂爲塔銘著有淨土詩編 紀聞

徐尚書石麒因僧月輝之請作募修淨土庵疏云濮鎮距市而
南二里許有淨土庵故宋濮氏之化壇也元至大間司令濮君
慮隳先業延國師琦楚石說法鼎葺語在項襄毅碑記中 誌畧
府志云梵琦字楚石小字曇曜象山人姓朱氏出家天寧永祚

寺吳興趙文敏器之爲請牒得雍詣徑山元叟端禪師諮決不
假辭色令自證會元英宗詔令金書藏經聞譙樓鼓聲豁然大
悟由是徧主法席名滿海內晚歸天寧築西齋退老明興再被
詔徵設法蔣山恩禮甚隆洪武三年復徵入問鬼神事館天界
寺忽趣左右具浴更衣書偈而逝奉詔歸葬賜諡佛日普照慧
辯禪師宋濂爲撰塔銘著有楚石語錄載明史藝文志和陶諸詩北遊
鳳山西齋三集姚廣孝謂梵琦於淨業一門至老力行不倦雲
棲宏禪師亦推爲明朝宗師第一海鹽圖經參
橋李詩繫
明妙用名原體初住法喜寺永樂癸巳主福善寺寺宇傾頽僅存

一殿師毅然以興復爲己任是年重修殿宇越四年丁酉建天
王殿又三年庚子建大悲殿宣德丙午購巨鐘一口爲樓覆之
正統己未千佛閣成明年刻大毘盧像千佛法身庖厨廩園與
凡一切器用之物靡不畢具戊辰樹二綽楔于通衢南曰江南
福地西曰浙右名山居寺凡二十三年有功于本寺甚鉅瑣志
德琳先是寺非大刹住持無正員正統中德琳具興創始末詣僧
錄司自陳始領檄爲住持遂得與東南大刹齒
似碧德琳繼席未期月兩廡煥然一新凡未竟之業盡次第舉之
守誠字敬堂古杭聖果山廣無際之孫主化壇

宗裕字綽庵守誠弟子繼主化壇二僧以興復爲任古殿一新復建松月堂置田七十畝

智深字大淵宗裕弟子殫力院事念師與祖重興拮据遂構樓立塔以其遺骨瘞焉

文淵字近川俗姓劉居鎮西北少祝髮于福善寺之崇遠房繼爲楞嚴監院與請大藏賜紫衣爲三教菴住持福善荒頽以經營自任自隆慶戊辰至萬歷甲申凡十有八年而功竣馮祭酒夢徵作記副使包檉芳篆額太傅朱國祚書丹

以上紀聞

文澗文溥明恩與文淵同時興修寺院

可傳隆慶戊辰修鐘樓

以上瑣志

閻如一作如閻鎮人某氏子祝髮于縣治惠雲寺邑志云正統七年任

天僧會司成化間委署海鹽縣事

秀峰天啓間福善寺僧日誦法華經寒暑不輟壽九十七而化荼毘時蓮花無數見火光中

心傳字受囑里中董氏子也創建郡之碧光菴明季多盜有鎮將服其高潔得請兵護難民數百人賴以保全後住持楞嚴寺

幻兮爲文節法師之嗣鼎新賢授禪院操行高脫後主蘆菴院事遂命其徒戒予成其遺緒

以上紀聞

了空俗姓吳鎮人捨宅建賢明庵削髮苦行日食飯一盂棗七枚
餘皆不食年六十有一臨終語弟子曰吾屍不腐三年後開龕
以漆吾身疊手而逝里人異之迎于市有異僧見之曰不迎他
更好衆卽止葬於庵後紀略庵無考

國朝真悅字兑心福善寺僧後居天寧寺終其身焉聞見錄嘗錄其

詩

天鑒住福壽禪院有奇勇馬踐其寺手麾之馬幾斃嘉會兜羣盜
爲患張參將彪奉檄駐防濮鎮師偕張除盜盜悉平不知所終
以上紀聞

一初住永正禪院閉門靜坐參西來秘密所謂用面壁功者也於
將逝一月前預別同門友至期端坐而逝塔建永正方丈之旁
紀略

三談住福善寺方丈能啖肉數十觔酒無量與沈海鷗交海鷗有
螺杯旁鐫海翁大雅四字是其所書相傳師爲青堆施閨章之
族嘗自題其像曰這漢力舉千鈞下筆萬言固知非常人也
西來不知何許人初至鎮人問何來曰西來問其名亦曰西來見
水月菴止一老僧遂與同居好焚香古鼎間有僧道來訪中夜
或笑或泣人莫知其因嘗于酒後舞鐵杖瓦石不能入臨化取

所貯文卷向同住僧曰此我一生事留之無益以上紀聞

妙璞字含輝楊止垣次子出家于福善寺之南隱房杜門課徒不

妄交接工于吟咏其鳥啼詩云似惜春殘花事老所思人去柳

條低見豁眉筆記瑣志參紀聞

佐惺字佛眉山東博平人由靈隱來主福善丙午重建大悲閣又

建東西二樓築基之三日有五鶴來止千佛閣因名丈室曰五

鶴堂詩有豪氣書法瘦硬通神後退居水木菴終于徑山壽七

十五著有龍潭集

諦輝由靈隱主席福善寺未幾去師後有聲靈隱而於濮川緣淺

齋厨索然人咸惜之

鶴峯由徑山來主福善寺宗律湛深溫恭謹樸期年有一鶴翱翔

殿閣康熙戊午重修正殿仲改菴記云師念正殿自雷震壞門

垣柱礎尙無整理乃募施鳩工不憚勞瘁

明修柴窰港人向在福嚴寺職運水後供役福善寺康熙丁亥亢

旱出資開井供眾里人李貞素陳鑑民等各捐金構亭其上名

曰延年井顧南樓記張石村書

巨莖主席福善寺募建殿前巨鼎修鐘樓顧太史贈序後終老於

揚州靜室

計位字良庵南隱房僧善蘭竹水墨山水與人交然諾不苟以上紀聞

若水名圓泉住福壽禪寺師事鶴峯康熙三十二年捐鉢資建佛

閣四十年建東西兩廂樓房及伽藍祖師殿其餘厨漏松寮亦

咸備四十八年又建彌勒殿仲改庵為之記

戒雷名上震俗姓步福壽寺僧為其師鶴峯粹語錄臨終十日前

出鉢資百金囑同門若水建彌勒殿仲改庵有序

成衡一作恒字天鑒號湘南香海寺西房僧府志云戒行精嚴兼工書畫入都

聖祖巡幸天津

寵眷甚厚為海光寺開山之祖康熙六十一年

敕賜香海寺額并紫衣一襲萬壽爐一座心經一卷

御書金扇一柄時已三兩

錫名山 賜紫衣海寧查編修慎行嘗贈之以詩後

住持天童坐化府志云復歸香海終焉有詩文刻集旋散失紀聞

寂解字豁眉寺西房僧勤修好學至耄不倦喜詩書習形家言生

平抄錄甚多率皆散失年九十三化去著開山一覽本寺修造

記聞見錄隨扣詩集又有集古方外詩話長洲僧為之序稱其

集自晉世遠公歷唐宋元明諸高僧詩采取最博惜其書已散

失瑣志參紀聞

涵輝名滿如主席香海幾十年臨水建山門於香花橋建韋天殿

整理之功最多樸訥無文里人嘉之後歸老於杭之半山紀聞
迴塵主席香海乾隆四年以延年并亭久圯易瓦屋覆之

質宜主席香海能作擘窠大字

心鑑名覺順水閣房僧嘗主海光寺著秀野草堂詩集又語錄四

卷俱付梓

澳洪乾隆年住賢授菴與陳古銘徐借亭李松艇諸先生往來倡

和詩為古銘所許以上瑣志

朗聞名福音主席香海建觀樹堂整鼓樓亦通儒書兼精書法後

退老於石門之洲錢紀聞於方丈之北構靜室三楹後大因暨今

巽亭兩主席先後葺治之余題其室曰三振軒瑣志

祥昌字大因主席香海寺工詩與諸吟士相倡和

際學字進源修持精進嚴整禪規住香海寺一載坐化

際困字液川主席香海寺工詩善書畫

續齡字祥齡號宗輝關帝廟僧募施重建殿宇山門

道家

悟法師不知姓氏相傳五代時初立元明觀者說見秀邑侯李名

培碑記乾隆丙申興工重構大殿東北一楹上書宋女俞秀姑

捐是相傳之說已非無因瑣志趙子昂撰提舉公墓誌云創道觀

曰元明據此則觀非創於五代矣錄以俟考

元鄒道寧元明觀住持提點也元統中濮允中建三清閣道寧題

樑岳罔卿稱其潔志虔修云

紀聞

明姚道安福清道院道士洪武間重修西觀

紀聞

徐松溪正德間元明觀道士徧歷名山受異人正一符籙金簡玉

字以年老未試授其徒思齊於是歷有法士

羅思齊字雲泉少負奇志骨相殊絕受其師元秘闔門靜鍊召神

伐崇靡不奇驗嘉靖壬子夏大旱郡伯延師禱雨甘澍立應年

八十猶赴四方之請時稱十雨法師以其十禱十應也

錢有德字仲賜思齊嗣孫萬歷間人雙眸炯炯容貌絕偉歲遇旱

澇有禱輒應有司每獎異之 以上見秀邑侯李名培碑記

潘爛頭前朱廟黃冠也有道術能呵致風雨往來濮川有玩月者

不禮於潘潘於壁畫月形以片紙粘之月遂雲翳其人求潘

去紙月如故嘗一日召天神至側無事神以硃筆點其頭頭

爛故號為潘爛頭云 邑志故老相傳謂其嘗寓翔雲觀云 紀聞

陳默庵福清道院道士明時為法官凡所祈禱無有不應 紀按福

清道院第一殿供關帝像第二殿供真武像中有濮鎮名山扁

趙子昂題東名列丹臺扁 國朝蔡邑候可遠給西玉壇名扁

扁馮公景夏題皆爲沈容辰立東房有琅函靜發扁盧郡伯崇
興徐邑候秉元爲高宏舜立東品振宗風扁當事爲道會司

立西利濟秋禾扁李邑候銓爲劉文炳立默庵無攷

王文正字衡石兼通儒業專精元教崇正間頻遭旱魃奉檄禱雨
悉有神效當事給扁額冠帶實錢有德之嗣孫也

國朝沈容辰西觀西房道士嘗學諸穹窿山有禱輒應

李秉忠字書誠土地廟東房道士鬚眉整潔言動不苟張真人府

給額曰名高青簡

以上紀聞

許卓字立齋翔雲觀道士美鬚髯性冲澹自號澹雲道人寄情

翰墨歛容彈碁雖終日不舉火晏如也閭里欽其端肅以重整
翔雲事委之師日夜經營不辭勞瘁者十餘年從此殿閣輝煌
神像莊嚴年七十坐化徒郎大夏字禹聲以謹約稱與師相繼
而逝姪孫黃堅字坤一善畫嘗追述梗概囑師之孫徒朱光奇
呂汾付諸剞劂項孝廉焜爲之跋

比邱尼

元古心名文鑑濮氏女先世雄於貲年十四卽斷葷穢禮廣福禪
師爲嗣復受記於天目中峯本公卽濮院建大利請於朝敕賜
福壽禪寺日率其徒精修慧業至治間住持廣福後歸福壽坐

化其徒以其骨之半分葬兩寺元侍講學士曹鑑撰半葬碑銘

趙承旨書石 瑣志

大猷和尚滿禪師元季濮氏娶朱暘谷女夫死出家為尼捐資建

寺題請賜額慧安禪寺賜金監袈裟金鉢孟禪尺及歿諡大猷

和尚滿禪師慧安寺毀于嘉靖六年 誌略引朱氏家乘按慧安寺在郡城元朱暘谷總督

府提督海運諸路總管兼理軍務都統制

